

ԽՈՐԵՆ ՍԱՐԳՍՅԱՆ

ՄԱՆՈՒԿ ԱԲԵՂՅԱՆԸ ԵՎ ՀԱՅ ՀԻՆ
ԳՐԱԿԱՆՈՒԹՅԱՆ ՊԱՏՄՈՒԹՅՈՒՆԸ

891-99.0
1971-2025

8174

4-25 Անդրադաս, Խ.
Վ. Խոթայանի հիմքում-
կանոպսիանով. Կը

Ա - 25

ՀՍՍՌ ԳԻՏՈՒԹՅՈՒՆՆԵՐԻ ԱԿԱԴԵՄԻԱ
Մ. ԱԲԵՂՅԱՆԻ ԱՆԼԱՆ ԳՐԱԿԱՆՈՒԹՅԱՆ ԽԵՍՏԱԿԱՆ

Ապրիլի 2 1961 թ.

ԽՈՐԵՆ ՍԱՐԳՍՅԱՆ

ՄԱՆՈՒԿ ԱԲԵՂՅԱՆԸ ԵՎ ՀԱՅ ՀԻՆ
ԳՐԱԿԱՆՈՒԹՅԱՆ ՊԱՏՄՈՒԹՅՈՒՆԸ

81474
A-II
31478



ՀՍՍՌ ԳԻՏՈՒԹՅՈՒՆՆԵՐԻ ԱԿԱԴԵՄԻԱՅԻ ՀՐԱՏԱՐԱԿՈՒԹՅՈՒՆ

ԵՐԵՎԱՆ

1946

Տպագրվում է ՀՍՍՌ Գիտությունների Ակադեմիայի
Նախագահության որոշմամբ

Պատ. խմբագիր՝ Ս.Ս. Ա.Ս.ՏՐՅԱՆ

Х. САРКИСЯН

Манук Абегян и история
древнеармянской литературы
(На армянском языке)
Изд. АН Арм. ССР, Ереван, 1946 г.

1944 թ. լույս տեսավ Մանուկ Արեղյանի «Հայոց հին գրականության պատմության» առաջին հատորը։ 1946 թ. լույս տեսավ նրա երկրորդ հատորը։

Ա՞րև է Մանուկ Արեղյանի այս մոնումենտալ աշխատության բովանդակությունը։ Ո՞րն է նրա ընդգրկումը։ Որո՞նք են այն սկզբունքները, որ գեկավար են հանդիսացել այդ աշխատանքը հորինելիս։

Այդ հարցերին պատասխան տալուց առաջ հարկ է մեզ հանգամանորեն կանգ առնել Մ. Արեղյանի նախորդների վրա, հայկական բանասիրության այն ներկայացուցիչների վրա, որոնց ջանքերով ստեղծվել է ինքը այդ դիսցիպլինան՝ «Հայ գրականության պատմությունը», առանձնապես նրա հին շրջանը՝ նշել նրանց նվաճումները, տեսնել նրանց առավելություններն ու թերությունները, իրար հաջորդող բերունդների գործի մեջ գիտել զարգացում, եթե այն կա, ու այս քննության հիման վրա ակնհայտ դարձնել այն նոր խոսքը, այն մեծ ներդրումները, որ պատկանում են արդեն Մանուկ Արեղյանին։

1

Առաջին դեմքը, որ գրավում է մեր ուշադրությունը այս կապակցությամբ—դա Ստեփանոս Նազարյանն է իր երկու գրքով՝ „Беглый взгляд на историю Гайканской литературы до конца XIII столетия“ և „Обозрение истории Гайканской письменности в новейшие времена“, լույս տեսած Ղազանում, առաջինը՝ 1844 թվականին, երկրորդը՝ երկու տարի անց՝ 1846 թվականին։

Հայ բանասիրներից ումանց կարծիքով՝ Նազարյանի այս

գրքերը մի կողմից ինքնուրույն գործեր չեն՝ աշխատասիրված-լինելով գերմանացի հայագետ Կ. Ֆ. Նեյմանի հետևությամբ, որինախորդը, իր հերթին, եղալ է Մխիթարյան վարդապետ Սուքիաս Սոմալյանը, մյուս կողմից նրանք՝ առավելապես առաջին-գիրքը՝ ազգային կյանքի պատկեր չտալու պատճառով պատմություն էլ չեն, այլ գրավոր հուշարձանների սոսկ արձանագրում դարից գար՝ համառոտ տեղեկություններով հանդերձ նրանց բովանդակության ու հեղինակների մասին¹

Եվ իսկապես. Նազարյանի երկու այս գործերն էլ առավելապես բիբլոգրաֆիա են անոտացիաներով հանդերձ և ոչ թե պատմություն բարիս իսկական առումով. ու այդ տեսակետից նրանց մեջ սկզբունքային տարրելություն չկա, ինչպես այդ փորձում է գտնել Լեռն հօգուտ երկրորդի, „Օбоօրենիւ-ի² Բայց հարցն այն է, որ Նազարյանի գրքերի բնութագրումը բիբլոգրաֆիայով չի սպառվում: Հարցն այն է, որ երկու այդ գիրքն էլ սոսկ գիտական չոր շարադրանքներ չեն, այլ քաղաքական ուղղություն ունին, հրապարակախոսական շեշտ, ելնում են հայ ժողովրդի ազգային կյանքի տնօրինման նպատակից, արձարձում են հասարակական նոր ու առաջավոր գաղափարներ:

Ըստ Նազարյանի հայ հին գրականության պատմությունը սկսվում է 5-րդ դարում ու ավարտվում 13-րդ դարում. դա հին գրականության սոկե ժամանակներն են: Հայ ժողովրդի քաղաքական ինքնուրույնության անկման հետ միասին 14-րդ դարում՝ սկսվում է նաև նրա գրականության թե՛նոր շըջանը և թե՛ անկումը, որը ավելի ու ավելի խորանում է 15 ու 16-րդ դարերում: 17-րդ դարում նկատելի են վերանորոգության նշույլներ, իսկ բուն վերտնորոգությունն արդեն 18-րդ դարն է՝ կապված Մխիթար Սեբաստացու գործունեության հետ:

Հայ գրականության պատմության վերելքի երկու այդ:

¹ Տես՝ Ա. Պալասանյան—«Պատմություն հայոց գրականության», Թիֆլիս, 1865, էջ 11—13; Հմտ. Լեռ—«Ստեփանոս Նազարյանց», առաջին հատոր, Թիֆլիս, 1902, էջ 120 և շար. Նեյմանի գիրքը՝ «Քննություն հայոց գրականության վրա» լույս է տանել Լայզլիգիում, գերմաներեն լեզվով, 1836 թ., իսկ Սոմալյանի գիրքը՝ «Երջան Հայաստանի գրականության պատմության»—վենետիկում, իտալերեն լեզվով, 1829 թ.:

² Լեռ—«Ստեփանոս Նազարյան», հատոր առաջին, էջ 129:

Հըջաններին—ոսկեգար՝ հաջորդ մի քանի դարերի հետ միասին ու Մխիթարյանների գործունեության դար—Նազարյանը տալիս է բարձր գնահատական:

Հայ հին գրականությունը—ասում է Նազարյանը—ճիշտ է, չունի արաբական, պարսկական, հնդկական և չինական գրականությունների հետաքրքրությունն ու հարստությունը, բայց, այնուամենայնիվ, նա արժանի է հոտուկ ուշադրության: Իսկ հայ մատենագիրների առատությունը մի կողմից, մյուս կողմից հայերի կիրքը՝ ամենավատթար պայմաններում անգամ հրապարակել իրենց գրական հուշարձանները—ցույց է տալիս հայ ժողովրդի բոցավառ սերը գիտությունների մշակման ուղղությամբ:¹

Նազարյանը առանձնապես բարձր է դասում հայ պատմիչներին. «Հայաստանի մատենագիրների մեջ առանձնապես կարևոր են պատմիչները, որոնք ծանոթացնելով մեզ իրենց հայրենիքի գործերին, հաճախ լրացնում են մեր թերի գիտելիքները ասիական մարդկության բախտի ճակատագրի մասին»—ասում է նա: Ապա ապացուցելու համար իր թեզը մի քանի օրինակներ բերելով, շարունակում է. «Ի դրվատում հայ պատմիչների պետք է գիտել նաև, որ նրանք շարագրվող դեպքերի ընտրությամբ, ոճի մշակվածությամբ՝ գերազանցում են արարական և պարսկական պատմիչներին ու բյուզանդական պատմիչների մեծ մասին»: Կերպում Նազարյանը, համաձայնվելով Սեն-Մարտենի հետ, մեջ է բերում նրա հետեյալ խոսքերը. հայ պատմիչների մեջ կան շատերը, որոնք ոշարագրության նրբակերտությամբ, ոճի մշակման մաքրությամբ, հոետորական պարբերությունների գիտական կառուցվածքով արժանի են եվրոպացու ուշադրությանը և ընթերցանությանը՝ նոր Եվրոպայի և հին կրտսերի աշխարհի մեծ օրինակելի երկերին հավասար»:²

Հայի հին գրական լեզվի, գրաբարի մասին Նազարյանն ունի միենույն բարձր կարծիքը. Խոսելով հունարենի աղղեցության մասին հայերենի վրա, Նազարյանն ասում է. առնչված լինելով հելլենական մտածողության ու արտահայտության կեր-

¹ Стенан Назарянц.—Беглый взгляд на историю Гайканской литературы до конца XIII столетия*, Казань, 1844, էջ 6.

² Անգ. էջ 7—8.

պերին; հայոց լեզուն, այնուամենայնիվ, «կարողացավ ինքնուըռույն գործունեությամբ ամեն օտարերկրայինը դարձնել իր սեփականություն, և արդյունավետ անալոգիայի հողի վրա զարգացնել ձևեր, որոնք ընձեռեցին նրան չտեսնված հարստություն»:¹

Խոսելով Աստվածաշնչի հայերեն թարգմանության մասին, Նազարյանն ասում է. «Աստվածաշնչի թարգմանությունը դարձածան է ստեղծում հայ մատենագրության մեջ: Հենց այստեղ է լեզուն ձեռք բերում ամուր հիմք ու իրեն գալիք բոլոր ժամանակների օրինակ՝ կազմում իրեն բնածին ձևերի անսպառ հարստություն»:²

Խոսելով, վերջապես, հայ ժողովրդի պատմական տիտուր բախտի մասին, Նազարյանն ասում է, որ իր ուժերի կենտրոնացման հնարավորության բացակայության և բազմապիսի ու անդադրում պայքարի պայմաններում անգամ, նա կարողացել է ստեղծել մի լեզու, որ «գիտական է ու նրբակերտ բոլոր հնարավոր ուղղություններով»:³

Ինչ վերաբերում է հայ ժողովրդի գրականության պատմության վերելքի երկրորդ շրջանին, այն է՝ Միիթարյանների գործունեության դարին, ապա այս դարին Նազարյանը այնպիսի բարձր գնահատական է տալիս, որը—որքան մեղ հայտնի է—չի տվել 40—60. ական թվականների և ոչ մի հայ գործիչ:

Սխալ է այն կարծիքը—ասում է Նազարյանը—իբր Միիթարյանների նպատակն է ամբողջ հայ ժողովուրդը կաթոլիկ դարձնել: Հոռմին նրանք ենթարկվել են հարկադրաբար, պատմական-աշխարհագրական պայմանների թելագրանքով, իսկ նրանց հիմնական ձգտումն է հայ ժողովրդի «բարոյական-մտավոր աղնվացումը»:⁴

Անհուն են Միիթարյանների ծառայությունները հայության հայ հին գրավոր հուշարձանների տպագրության, հայկական

¹ Անդ, էջ 4—5:

² Անդ, էջ 17:

³ Անդ, էջ 7:

⁴ Степан Назарянц—„Обозрение истории Гайканской письменности в новейшие времена“, Казань, 1846, էջ 73.

բանասիրության, հնախոսության, պատմագրության, աշխարհաւզրության, թարգմանական գրականության և մանկավարժական գործունեության ասպարեզներում: Միիթարյան միաբանությունը ունի «այրեր», որոնք իրենց խելքով, գիտնականությամբ և աշխատասիրությամբ պատիվ կարող են բերել Եվրոպայի յուրաքանչյուր գիտական ընկերության»:¹ Հայ հին լեզուն, գրաբարը նրանք մաքրել են միջնադարի կեղափեց ու այնքան բազմակողմանիրեն են մշակել ու այնպիսի ոգեշնչան են հասցրել այն, որ «մեր դարի հայը կարող է նրա միջոցով մարմնավորել ու արտահայտել Եվրոպայի մեծ մտածողների ամենավերացական գաղափարներն ու զգացմունքները»:² Հայկազյան բառարանի վրա, հայրենի գրականության սույն փայլուն հուշարձանի վրա—ասում է Նազարյանը—հայը հոգարտանքով պիտի նայի. «ավելացնենք—շարունակում է նա—սույն մեծագործության վրա համեմատական բառագրության ասպարեզում, որի հավասարը չկա Եվրոպայում»:³

Վերջապես, Նազարյանը լի է անհուն հարգանքով դիպի ինքը Միիթար Սեբաստացին, որին նա անվանում է „великий гайканец“, «համաշխարհային այր», «երկրորդ Մեսրոպ», «նախարարության ընտրյալ»⁴...

Սակայն, որքան էլ բարձր լինի մեր հին կուլտուրան հանձինս ոսկեգարի՝ հարակից դարերով հանդերձ ու Միիթարյան գիտության, որքան էլ մենք հարարու լինենք դրանցով հանդեպ Եվրոպական մարդկության, այնուամենայնիվ, այսօր նրանք մեզ չեն կարող բավարարել, այսօր նրանք չեն կարող ունենալ ազգային/նշանակություն: Այսպես է մտածում Նազարյանը: «Հինձնել, ասում է նա, որը այլևս չի համապատասխանում նոր ծագած կեցության, և որը խորթացած լինելով ժողովրդականն կյանքին ու հանված հասարակական շրջանառությունից՝ կորցրել է իր նշանակությունը, չի կարող ներկայի զավակներին ծառայել իբրև կրթության միջոց: Նա պետք է անհրաժեշտորեն վերածնվի,

¹ Անդ, էջ 94:

² Անդ, էջ 75:

³ Անդ, էջ 98:

⁴ Անդ, էջ 59, 55, 74, 73:

սերտ, բարեկամական դաշն կապի հավերժ երիտասարդացող կյանքի հետ, ու ամեն կերպ պահպանի նրան։ Մի խոսքով, անհրաժեշտ է ազգային նոր գրականության զարգացում, որը համապատասխանի մեր գարի պահանջներին»։¹

Ահա թե ինչ եղրակացության է հանգում Նազարյանը։ Նա ասում է, որ հայ ժողովուրդը կանգնած է իր հոգեոր կյանքի երրորդ վերելքի, երրորդ վերածնության շեմքին։ «Հայաստանը, բոր գիշերվա գարերից հետո, սոսկալի բարբարոսության դարերից հետո, իհարկե, արդեն ներկայացնում է իր մտավոր վերածնության առավոտը»։²

Այդ վերածնության բովանդակությունն է, ինչպես արդեն տեսանք, նոր գրականությունը, որ ի նկատի ունենալով անցյալի մեծ փորձը՝ խօսում է ռկենգանի ներկայի մասին։ Այդ վերածնության բովանդակությունն է—ինչպես ասում է Նազարյանը իր գրքի վերջին մասի այլ և այլ էջերում—նոր լիդուն, որ յուրացնելով գրաբարի «բազմակողմանի մշակվածությունը» և «անսպառ հարստությունը» միաժամանակ միանգամայն մատչելի է ժողովրդական լայն զանգվածներին։ Այդ վերածնության բովանդակությունն է, վերջապես, ազատագրումը եկեղեցու կապանքներից, նոր գպրոցը, համաժողովրդական պարբերաթերթը։

Հին գրականության տեսությունը, այդպիսով, առիթ է դառնում Նազարյանի համար առաջին անգամ արծարծելու գեռ 40-ական թվականներին իր լուսավորական առաջավոր գաղափարները։³

Վերածնությունը՝ հենված անցյալի վրա—այս կետն անընդհատ կրկնվում է Նազարյանի մոտ—անհրաժեշտություն է ոչ միայն գարի առաջավոր կուլտուրան սահմանափակ մարդկանց սեփականությունից գարճնելու համար՝ ինչպես կասեր Աբովյանը՝ «հարյուր հազարի» սեփականություն, այլև նրա համար, որպեսզի հայ ժողովուրդը կատարի իրեն վերապահած դերը ժողովուրդների ընտանիքում։ «Հայերի կոչումը պատմության մեջ—ասում է Նազարյանը—իրեւ Արեւելքի քրիստոնեական ամենագլխավոր ժողովրդի ոչ այլ ինչ է, եթե ոչ ճանաչել իր անցյալը

1 Անդ, էջ 147, 148։

2 Անդ, էջ, 147։

3 Անդ, էջ 155, 153, 150 և այլն։

Նրա ըոլոր հարաբերություններով ներկայի հետ և ընդունելով
իր մեջ եվրոպական կրթության ծաղիկները, մշակել այն յու-
րատեսակ կերպով, և գրանով առաջ բերել իր ընդերքում ժո-
ղովրդական կեցության պայմաններ»:¹

Նազարյանը բազմաթիվ առիթներով ակնարկում է և ասում,
որ ոռւսական պետականությունը հայերի համար ստեղծել է
նման պայմանների իրականացման հնարավորություններ և առ-
հասարակ առաջադիմելու նախադրյալներ։ Հետևապես, բացական-
չում է նա „Օբօրենից“-ի վերջին էջում՝ «այսպես է ժամանակի
պատգամախոսությունը Ռուսաստանի հողի վրա ապրող հայկա-
ցյան սերունդների ապագայի մասին։ Կամ գեպի առաջ՝ դարի
հետ, կամ քարացում և հոգեոր-բարոյական մահ»:²

Նազարյանի զույգ գիրքը հայ գրականության պատմության
մասին գիտական գրքեր են, իհարկե, բայց ունին հրապարակա-
խոսական շեշտված նպատակասլացություն։ Նրանց բազմաթիվ
էջերը՝ առանձին վերցրած՝ գիտական շարագրանք են, բայց ամ-
բողջությամբ վիրցրած գրանցից յուրաքանչյուրը իր ժամանակա-
շրջանի հասարակական այրող հարցերի մի մի վառ փաստաթուղթ
է։ Այսպես է սկսվում հայ գրականության պատմության ուսումնա-
սիրությունը։

2

Ս. Նազարյանը „Օբօրենից“-ում ասում է, որ Մխիթա-
րյանների գործունեությունը ծառայում էր «գերազանցորեն սոսկ
գիտական պահանջներ բավարարելուն»:³ Անա հենց այս տեսան-
կյունից պետք է մոտենալ Նազարյանի երկու գրքից մի քանի
տարի հետո լույս տեսած Մխիթարյան վարդապետ Հովսեփ
Գաթըրճյանի «Պատմություն մատենագրության հայոց» գործին:⁴
Բայց եթե Գաթըրճյանի գործը չունի Նազարյանի գործերի հրա-
պարակախոսական շունչը, ապա դրա փոխարեն նա ունի այն

¹ Անդ, էջ 151.

² Անդ, էջ 158.

³ Անդ, էջ 148.

⁴ Հովսեփ վ. Գաթըրճյան—«Պատմություն մատենագրության հայոց»,
Վլիենա, 1851:

առավելությունը, որ մի նոր խոռք է ասում հայ գրականության գիտական հետազոտության ասպարիզում:

Հովսեփի վ. Գաթըրճյանի գրքույկը լուրջ ու հիմնականում գիտական ճշղրիտ ուղիով ընթացող հետազոտողի աշխատանք է: Հայտարարելով, որ «ազգի մը պատմության ծանրաշափն՝ իր մատենագրությունն է»,¹ Գաթըրճյանը իրավացիորեն պնդում է, որ յուրաքանչյուր ժողովրդի մատենագրությունը կամ գրականությունը ունի աղքային նկարագիր և որ այն ամենասահրա կերպով կապված է «բոլոր պատմության ընթացքի հետ»: Արձարձելով գրական երեսութների զարգացման, էվոլուցիոնի գաղափարը, Գաթըրճյանը նրբուն գիտում է, որ «ազգի մը... քաղաքացին վիճակի հանկարծական փոփոխումը՝ անմիջապես (ընդգծումը հեղինակինն է) մատենագրության մեջ ալ հեղափոխություն մը միշտ չի բերեր»:²

Գաթըրճյանը բնականորեն ժխտում է ամեն մի հեղաշրջում, ամեն մի ցատկում. «սոստումը միշտ անբնական է»—ասում է նա: Բայց գիտող մարդ լինելով, ասում է, որ «շատ հեղ ինչպես ապագան՝ նույնպես անցյալը գեռ ներկային մեջ կենդանի է, թեակետ վերջին շնչովը»,³ ու միաժամանակ զգուշացնում մեզ արդիականացումից. ճշմարտության չենք հասնի, ասում է նա, եթե մեր հին երգերն ու երգիչներին «ժամանակին ու պարագայից տանելու տեղ՝ զիրենք մեր ժամանակին ու պարագաներուն բերենք, այսինքն՝ մեր հնոց բանաստեղծությունը մեր հիմակվան ճաշակով»⁴ ու արվեստովը գիտել ու զատել ուղենք...»:

Գաթըրճյանի գիրքն ընդգրկում է միայն հայ հին ժողովրդական բանահյուսությունը. բայց այս համեմատարար նեղ սահմաններում անգամ նա մեծ գործ է կատարում՝ նույն այդ հայ հին ժողովրդական բանահյուսության արժեքն ու նշանակությունը հայտարերողներից առաջիններից մեկը հանդիմանալով: Բարձր գաղափար ունենալով մեր նախնիների նյութականանտեսական կյանքի մասին—«ոչ լեռնորդյա աղգեր են եզել և «չ

¹ Անդ, Էջ 2:

² Անդ, Էջ 5:

³ Անդ, Էջ 5:

⁴ Անդ, Էջ 31:

հնության ան աղգերեն՝ որոնք աղքատ ու ողորմելի ապրուստով ու հագուստով կյանքերնին կպահեին»¹ — Գաթըրճյանը շեշտում է հայ հին երգերի աշխարհիկ բնույթը, պնդում, որ նրանք «ազատ ու բաւն ազգային մտաց բերքն ու բխումն են» (ընդգը-ծումը հեղինակինն է):²

Առանձնապես հետաքրքրական և ուսանելի են Գաթըրճյանի դիտողությունները հին այդ երգերի արվեստի մասին, որին նա նվիրում է հատուկ գլուխ («Երգոց արվեստը, հոգին ու լեզուն»): Լսու երկույթին, «ամփոփությունը» համարելով գեղարվեստականության հիմնական տարրերից մեկը, եթե ոչ ամենահիմնականը, Գաթըրճյանը մեծ հմտությամբ ու ճաշակով վերլուծում է Վահագնի երգը, հայտարերելով նրա իմաստի գեղարվեստական զարգացման «կոհակաձև» ընթացքը, հակիրճ, բայց սպառիչ բառերով բնութագրում է Արտաշեսի հայտնի անեծքը Արտավազդին, այդ՝ «մանր մանր բառերի շինված, ստեղծ շեշտված ու կտրուկ մնացած հատվածը»,³ «ճաշակագետ» ընթերցողի ուշադրությունը դարձնում «ամբողջն քակված ու քայքայված» խոսքերի վրա, ինչպիսիքն են՝ «ուլունք Շամիրամայ», «կոել կոփել զգուռն Երուանդայ» և այլն, կամ այնպիսի ողորկ բառերի վրա, ինչպիսին են՝ «ծիրանի ծով», «սեաւ» (Արտաշեսի ձին) և այլն:

Գաթըրճյանի շարադրանքը, իր հերթին, ամփոփ է, փաստեր՝ անհերքելի, եղբահանգումները՝ զուսպ: Միխիթարյան գիտնականի գիրքը կառուցված է բանասիրական մեծ փորձի, նուրբ ճաշակի ու ժողովուրդների զրականության—առանձնապես՝ դասական—քաջ իմացության վրա:

Վերին աստիճանի ուշագրավ է Գաթըրճյանի հայ գրականության պատմության պերիոդիզմիան: Լսու այդ պերիոդիզմացիայի ամբողջ հայ գրականությունը բաժանվում է երկու «միջոցի»—«առաջին միջոց»՝ քրիստոնեությունից առաջ, «Երկրորդ միջոց»՝ քրիստոնեությունից հետո: «Երկրորդ միջոցը» իր հերթին բաժանվում է երկու շրջանի՝ առաջին՝ հայերեն գրու-

¹ Անգ, էջ 12:

² Անգ, էջ 10:

³ Անգ, էջ 38.

թյունից առաջ, երկրորդ շրջան՝ հայերեն գրությամբ ու լեզվով (406 թ. ք. հ. մինչև 1850 թ.),

երկրորդ շրջանը, իր հերթին, բաժանվում է երկու մեծ ժամանակահատվածի: Առաջին ժամանակահատվածը սկսվում է 406 թ. ու հասնում մինչև 1300 թ., երբ հայ գրականությունը զարգանում է հունական քրիստոնեական մատենագրության ազդեցության տակ, երկրորդ ժամանակահատվածը սկսվում է 1300 թ. ու հասնում մինչև 1850 թ., երբ հայ գրականությունը զարգանում է հունական (լայն իմաստով) քրիստոնեական մտենագրության ազդեցության տակ:

Հունական ազդեցությունը տեղի է ունեցել թե «ուղղակի», ինչպես, օրինակ, 406—500 թ. թ., և թե «անուղղակի» ու «միջնորդապես», ինչպես, օրինակ, 750—1050 թ. թ. կամ 1250—1300 թ. թ., ըստ որում Գաթըրճյանը տարբերում է նաև—ինչպես այդ ընդունված էր հայ բանասիրության մեջ—«թարգմանության» զանազան ժամանակներ («ատենա»)՝ առաջին, երկրորդ և երրորդ: Հունական ազդեցությունը ևս, իր հերթին, միապաղադ չէ, այլ ունի իտալական, ֆրանսիական, գերմանական և այլ շրջանները:

Այդպիսով, ըստ Գաթըրճյանի, ամբողջ հայ գրականությունը սկզբից մինչև վերջը զարգացել է ազդեցությունների տակ,—մերթ հունական, մերթ հունական,—եղել է վերջին հաշվով մի տեսակ թարգմանություն: Թե ինչպես նա պիտի ապացուցեր իր թեղը՝ մեղ մնում է անհայտ, որովհետեւ Գաթըրճյանը չի իրագործել—կամ եթե իրագործել է, ապա չի տպագրել—իր ծրագիրն ամբողջությամբ, այլ նրա մի շատ փոքր մասը միայն, այն է՝ առաջին «միջոցի» («քրիստոնեութենե առաջ») առաջին «անգիր» բաժինը, ուր, ինչպես տեսանք, նա, հակասելով իրեն, հենց հակոռակ գրույթն է զարգացնում, ապացուցելով, որ հայ հին ժողովրդական բանահյուսությունը եղել է միանգամայն ինքնուրույն և ազգային:

Գաթըրճյանի գրքի քննարկման սկզբին մենք ասացինք, որ այն սոսկ գիտական գիրք է, առանց հրապարակախոսական շեշտի: Այժմ գրան պետք է ավելացնենք, որ այդպիսին լինելով հանգերձ՝ Գաթըրճյանի գիրքը միաժամանակ հիմնական ում արտահայտում է իր զարաշրջանի հասարակական առաջավոր գաղա-

փարները, արձագանքում է դրանց՝ որոնելով ու գտնելով հենց այն ժողովրդի թեկուղ անցյալի հոգեոր զանձերը, անգիր բանահյուսությունը, հանուն որի վերածնության կրքոտ կոչ էր արվում:

3

Գաթըրճյանի «Պատմություն»-ից 14 տարի անց լույս տեսավ Ստ. Պալասանյանի «Պատմություն հայոց գրականության» գիրքը:¹ Գաթըրճյանի «Պատմության» պես Պալասանյանի «Պատմությունը» ևս չունեցավ իր շարունակությունը կամ երկրորդ մասը, թեև հենց այդ երկրորդ մասը—ինչպես ասում է ինքը հեղինակը—«մեր աշխատության գլխավոր և ավելի ամենով մասը պետք է կազմեր»:² Պալասանյանի գիրքն էլ պարունակում է հայ հին ժողովրդական բանահյուսության տեսությունը միայն—ճիշտ Գաթըրճյանի գրքի նման:

Շատ բարձր գնահատելով պոեզիան՝ իբրև արվեստների համագրություն ու նրա պատմական-հասարակական գերը, հայտարարելով, թե բանաստեղծության գիրեալներն են որ ժողովը դրդի առաջ ճանապարհ են բաց անումք³, Պալասանյանը, բնականաբար, դիտում է այդ բանաստեղծությունը և առհասարակ ժողովուրդների հոգեոր կուլտուրան ոչ թե անջատ իրարուց, այլ ընդհակառակը, սերտ կապված իրար հետ. «Մասնավոր երևույթը ճիշտ կերպով բացատրելու համար—ասում է նա—հարկ է անդադար ընդհանուրին դիմել, որովհետեւ ազգերի զարգացման օրենքները միևնույնն են», ու իբրև հետեւնք այս ճշմարտության «մենք չենք կարող հայոց հոգեոր գործունեության պատկերը նկարագրել—սինդում է նա—առանց ընդհանուր ազգերի զարգացման պատմությանը դիմելու»:⁴

Մի այլ տեղ նա ասում է, թե քանի որ «ազգերի զարգացման օրենքները միևնույնն են», ու իբրև հետեւնք այս ճշմարտության «մենք չենք կարող հայոց հոգեոր գործունեության պատկերը նկարագրել—սինդում է նա—առանց ընդհանուր ազգերի զարգացման պատմությանը դիմելու»:

¹ Ստ. Պալասանյան—Պատմություն հայոց գրականության, Թիֆլիս, 1865.

² Անդ, էջ 58.

³ Անդ, էջ 131—132.

⁴ Անդ, էջ 57.

որեւէ խնդրում բացառություն կազմել չեն կարող և Ռւբիշ բան է թե—շարունակում է նա—ժողովուրդ ժողովրդից արագ է առաջ գնում, ուրեմն և շուտով իր երեխայական դրությունից աղա-տում,—և այս բանը կարելի է տեսնել, եթե համեմատելու լինենք, օրինակի համար, հունաց և հայոց սկզբնական ժամանակների կյանքը»:¹

Այս խոսքերը կարեոր են այն տեսակետից, որ մինչդեռ Գայթը յանը (անկախ իր սիրուց և նվիրվածությունից հայկական մատենագրությանը) հակված չէ շատ էլ բարձր գնահատելու մեր հին հոգեոր կուլտուրան՝ համեմատությամբ անտիկ ու Արենելքի մի շարք ժողովուրդների կուլտուրայի (հայերը շատ երջանիկ պիտի զգան, ասում է նա, թե իրենց հին մատենագրության հա-տակուորները դիտվեն թեկուզ իրեր երբայեցոց պոեզիայի առկար արձագանք մը» կամ «աղքատ հավելված»), Պալասանյանը, ընդ-հակառակը, ազատ է այդ նախապաշտունքից ու բնավլ չթերա-գնահատելով, օրինակ, հունական հոգեոր կուլտուրան ու օրինակելի համարելով այն,² չի նսեմացնում հայկականը, դիտելով երկուսն էլ իրեւե միենույն ընդհանուր օրենքի այլ և այլ արտահայտումներ:

Հիշեցնելով մեզ ընդհանուրի կարեռության մասին, Պալա-սանյանը ոչ միայն չի սոսանում, այլ ընդհակառակը, անընդհատ շեշտում է մասնավորի նշանակությունը: Մասնավորը նրա մոտ չի լուծվում ընդհանուրի մեջ, չի կորցնում իրեն, այլ մինչև վերջը պահպանում է իր ինքնուրույնությունը: «Դրականությու-նը ձիգ կապված է ժողովրդի արտաքին ու ներքին կյանքի հետ, ասում է նա: Երկրի բնությունը, ազգայնության հոգին, կրոնը, լուսավորության աստիճանը, մտավոր ու բարոյական վիճակը, մեկ խոսքով ժողովրդական կյանքի բոլոր տարրերը տեղ են գտնում գրականական հիշատակարանների մեջ... Դրականության մեջ երևում է ազգի անձնավորությունը, այսինքն ազգայնությունը»³: Այդպիսով, ըստ Պալասանյանի, տվյալ առանձին ժողովրդի կուլտուրական անհատականու-

¹ Անդ, էջ 39:

² Գարբրոյան, էջ 32—33, ինչպես նաև էջ 31:

³ Ատ. Պալասանյան—«Պատմություն հայոց գրականության», էջ 154

թյունը բնավ չի լուծվում ժողովուրդների ու նրանց հոգեոր կյանքի պատմության ընդհանուր օրենքներում:

Տվյալ գրականության արժեքը, ըստ Պալասանյանի, որոշակում է նրա մերձավորությամբ աղջային կյանքին, Պալասանյանը շատ բարձր է գասում հռւնաց գրականությունը, որովհետև այն «իբրև մի անհրաժեշտ պիտույք հելլենական հոգու համար, ընդհանուր ժողովրդի մասն է եղել միշտ»,¹ որովհետև այն ելնում է մեր առջեւ «իբրև ամենաճիշտ պատկեր ազգային կյանքի»,² եվ ընդհակառակը, նա ցածր գնահատական է տալիս հոռմայեցոց գրականությանը՝ որովհետև այն «ազգային կյանքից չէ բխում, այլ մի տկար հետեւողություն է հունական գրականության» ու «այս պատճառով հումեական գրականությունը ազգային չէ»:³ Կիրառելով միենույն չափանիշը, Պալասանյանը դատապարտում է կլասիցիզմը ժողովրդի կյանքից հեռանալու ու պատճական և հոգեբանական ճշմարտությանը չհետեւելու համար և, ընդհակառակը, մեծ համակրանքով խոսում նորուումանտիկական դպրոցի մասին, որը «գրականությունը ազգային կյանքի հետ միացրեց» ու դրա հետևանքով էլ «գրականության վրա եղած ծուռ ու նեղ հասկացողությունը փոխվեցալ ու այնպիսի ընդարձակ նշանակություն ստացավ, որ միայն ներկա լուսավորյալ ու մարդասիրական դարում կարող էր կազմվել»:⁴

Մեզ հայտնի է, որ Գաթը ճյանը ևս խոսում է գրականության, մասնավորապես հայ գրականության ազգային նկարագրի մասին, բայց Պալասանյանի մոտ ընդգծված է այդ, գրականության և ժողովրդի կապը՝ շեշտված: Գրականության ժողովրդայնությունը—այսպես կասեինք ունք հիմա—Պալասանյանի դատողությունների ու գնահատականների մեկնակետն է: Հենց այդ տեսակետից մոտենալով հայ հին ժողովրդական բանահյուսությանը, Պալասանյանը առաջիններիցն է եղել, որ միանդամբց բարձրացրել է նրա արժեքը իբրև հայ ժողովրդի ազգային կուլտուրական պատմության կարևորագույն տարր:

¹ Անդ, էջ 18:

² Անդ, էջ 253 (բովանդակություն):

³ Անդ, էջ 18:

⁴ Անդ, էջ 36:

«Պատմություն հայոց գրականության» գրքում Պալասանյանը ենում է իրեւ 60-ական թվականների առաջավոր գաղափարների արտահայտիչ գրականագիտության ասպարիզում։ Զհավանելով Նազարյանի գրքերը հայ գրականության պատմության մասին, համարելով այդ գրքերը այլ հեղինակների հետևությանք կազմած բիբլիոգրաֆիաներ, Պալասանյանը փաստորեն շարունակում է Նազարյանին ու իր հետազոտած հարցերին տալիս Նազարյանի քարոզած դադափարներին ներդաշնակ լուծձում։

Ավելորդ չենք գտնում մի հանգամանքի վրա ևս կանգառները «Ժողովուրդը, թագավորը և նախարարները, — ասում է Պալասանյանը, — որոնց հետ ընտելացել էր ազգը, և հոգեորական դասը երեք գլխավոր տռարկաներն են, որոնց միշտ պետք է աչքի առաջ ունենա գրականության պատմիչը։ Նրանցից յուրաքանչյուրը իրանց օգուտները, իրանց ձգտողությունները, իրանց հասկացողությունները ունեին։ Որոշ կերպով պարզել յուրաքանչյուրի ձգտողություններն ու հասկացողությունները, ցույց տալ այն փոխադարձ հարաբերությունը, որ նրանք մեկզմեկու հետ ունեցել են զանազան ժամանակներում, ահա այս պետք է լինի պատմչի առաջին դործը, եթե կամենում է ճիշտ կերպով քննել ու ցույց տալ ազգային կյանքը»¹.

Սա շատ ուշագրավ հատված է։ Պալասանյանը ոչ միայն ճիշտ կերպով համարում է տվյալ ժողովրդի ու այս գեպքում հայ ժողովրդի քաղաքական-սոցիալական պատմությունը նրա գրականության պատմությունը կառուցելու հենարան (այս բանի մեջ նրան անշուշտ օդնել է հայ ժողովրդի պատմաբան լինելը), այլև սոցիալական իրականությունը իրավացիորեն շերտավորված է տեսնում նա, դասակարգերի բաժանված, ըստ որում, ինչպես անսանք, նրանցից յուրաքանչյուրն ունի իր սեփական օգուտաները, «ձգտողությունները» ու «հասկացողությունները»։

Իր այս տեսակետը Պալասանյանը կիրառում է հռոմեական գրականության, ինչպես նաև հայ հին ժողովրդական բանահյուսության նկատմամբ, հայտարելով առաջինը «հարստների ու

¹ Անդ, էջ 54—55, աես նաև էջ 50—Արշակունիների շրջանի հայկական քեռվալիզմի գնահատականը

մեծամեծների» պարապ ժամերի խաղալիք, իսկ երկրորդը — ճիշտ
հունական միջոլոգիայի պես — «հասարակաց», այսինքն ընդհաւ-
նուր ժողովրդի կյանքի արտահայտություն։ Թե ինչպես պիտի
կիրառվեր այն հայ զբավոր մատենագրության նկատմամբ, որ,
իհարկե, ամենից շատ հետաքրքրություն է ներկայացնում, այդ
մենք, զմբախտաբար, չզիտենք, որովհետեւ, ինչպես արդեն հայտ-
նի է մեղ, Պալասանյանի «Պատմությունը» բովանդակում է
միայն հայ ժողովրդական բանահյուսության տեսությունը։

4

Ա 3/478
Ս. Պալասանյանի «Պատմություն հայոց զբականության»
աշխատության հետ միաժամանակ, 1865 թ., Վենետիկում լույս
տեսավ Գ. Զարբհանալյանի «Հայկական հին զպրության պատ-
մության» առաջին հատորը, որ ընդգրկում է Դ—ԺԴ դարերը։
1878 թ. լույս տեսավ նույն գործի երկրորդ հատորը։ 1886 թ.
վերահրատարակվեց առաջին հատորը՝ «հավելվածներով և փափո-
խությամբ», իսկ 1897 թ. լույս տեսավ նույնի երրորդ հրատա-
րակությունը։

Առաջին հատորի առաջին տպագրության առաջաբանի մեջ
Զարբհանալյանը ասում է, որ իր զբքի նպատակն է «ընդհա-
նուր պատմական տեղեկությունն մը ավանդիլ մեր մատենագրաց
և անոնց զբվածոց վրա, առանց ուզելու քննադատական տեսու-
թյամբ ծանրացնել այնպիսի զբվածք մը, որ վարժարանաց
համար սահմանված է»։ Եվ իսկապես, իրեն դասագիրք ու առա-
վելապես իրեն տեղեկագիրք Զարբհանալյանի աշխատությունը —
մենք ի նկատի ունենք զիմսավորապես առաջին հատորը, որով-
հետեւ երկրորդ հատորը կազմված է այլ պլանով, խառն ու հապ-
ճեալ — մինչեւ այսօր պահպանում է իր նշանակությունը։

Իր աշխատության առաջին հատորում Զարբհանալյանը
ամենայն բարեխղճությամբ տալիս է կենսագրական ու պատմա-
կան-բանասիրական սպառիչ տեղեկություններ հայ բոլոր մա-
տենագիրների մասին՝ թե հայտնի և թե քիչ հայտնի ու ան-
հայտ, հանելով վերջիններիս անունները անցյալի հարուստ պատ-
մական-եկեղեցական զբականությունից։ Զարբհանալյանը ճո-
խացնում է իր հատորը, վերջում տալով «մանր մատենագիր-

ների» շարքը, ապա նաև մատենագիրների, «որոց զրվածքը չհիշատակիր»։ Հաճախ բաժինների վերջում կամ պլուիների արանքում «Հիշատակագիրք» վերնագրի տակ նա նորանոր անուններ է տալիս՝ համառոտ, տեղեկություններով հանդերձ։ Առանձնապիս նա ուշագիր է իր սիրած 5-րդ դարի նկատմամբ՝ մեկ առ մեկ արձանագրելով բոլոր թարգմանիչներին, ինչպես նաև առանձին տեղ հատկացնելով Խորենացու դրանու հիշատակած բոլոր մատենագիրներին։ Զարբհանալյանը չի թողնում առանց հիշատակության անուն, որ այս կամ այն կերպ տոնչված է հայկական մատենագրությանը։ Զարբհանալյանի աշխատությունը ոչ այնքան պատմություն է, որքան բանափուլություն ու նամանավանդ ընդարձակ բիբլիոգրաֆիա, կազմված հմուտ ու բանիմաց հեղինակի կողմից։

Ո՞րն է հայ մատենագրության (Գաթըրճյան), զրականության (Պալասանյան) կամ գպրության (Զարբհանալյան) առարկան։ Այդ հարցին Գաթըրճյանը պատասխանում է այսպես. «Ճարդու մը, աղգի մը կամ բոլոր մարդկության մաավոր կենացը ձայնավոր կամ զրավոր հիշատակարաններուն գումարը՝ նույն մարդուն կամ աղգին կամ ընդհանրապես մարդկացին ազգի մատենագրությունը կամ զրագիտությունը կանվանենք»:¹ Ծավալիով իր աշխատության ներածական մասը, Գաթըրճյանը քիչ հետո ավելի կոնկրետ հասկացողություն է տալիս «մատափոր կենաց գումարի» մասին, բաժանելով այն երեք ճյուղի. բանափորական-պատմական, ուսողական-բնական և փիլիսոփայական-աստվածաբանական։²

Այլ է Պալասանյանի պատասխանը. «զրականությունը—ասում է նա—բաղկանում է այն մատափոր արցունքների բովանդակությունից, որոնց մեջ նկարագրվում է աղգային կյանքն ու ընավորությունը» Եվ որովհետեւ աղգային կյանքը ավելի բանաստեղծության ու պերճախոսության մեջ է երևում, այս պատճառով բանաստեղծության և պիրճախոսության պատմությունը գլխավոր տեղն են բռնում զրականության պատմության մեջ»³

¹ Գաթըրճյան, էջ 1:

² Անդ, էջ 6:

³ Պալասանյան, էջ 8—9:

Տաս և հինգ տարի անց Պալասանյանը նույն միտքն է հայտնում, բանաստեղծությանը կենարոնական տեղ հատկացնելով զբականության պատմության մեջ:¹

Թե ինչպես պիտի կիրառեին իրենց տեսակետները Գաթըրճյանը և Պալասանյանը, մեզ լրիվ հայտնի չէ, որովհետեւ նրանք ոչ միայն չեն վերջացնում իրենց պատմությունները, այլ միայն սկսում են: Ինչ վերըքերում է Զարբհանալյանին, ապա նա, հատկապես չորոշելով իր առարկայի սահմանները, ամբողջ հատորով իր ցույց է տալիս, որ կանգնած է Գաթըրճյանի տեսակետի վրա, «Հայկական դպրության պատմության» մեջ ընդգրրկելով ամբողջ հայ մտավոր կյանքի արդասիքը՝ գրականությունը, գիտությունը իր բազմաթիվ ճյուղերով, գավանաբանությունը: Այսպիսով, Զարբհանալյանը մի քայլ ետ է գնում Պալասանյանից, որի կարծիքով — ինչպես տեսանք — գրականության պատմության հիմնական զբաղմունքը պիտի լինի գեղարվեստական գրականությունը:

Հայ մատենագրության պատմության պերիպետիայի խնդրում Զարբհանալյանը, խուսափելով Գաթըրճյանի պերիոդիզիբայի խոցելի կողմից, այն է՝ ամբողջ հայ գրականությունը մեկնաբանել իբրև համատարած աղդեցության արդյունք, կիրառում է մի այլ նույնպես ոչ ընդունելի սկզբունք՝ բաժանելով գրականությունն ըստ հարյուրամյակների, որի գեմ առարկել է գեռ Գաթըրճյանը. «Պատմության մեջ—ասում է նա—հարյուրական տարվա կամ դար դար բաժանում ըննլու սովորության անբնական բան ըլլալը՝ շատոնց ճանչցըլված է»:²

Ոսկեզար (5-րդ դար), որին հետևում է պնկում (6-րդ դար), ապա արծաթե դար (12-րդ դար, ըստ որում նախորդ՝ 7, 8, 9, 10, 11-րդ դարերի մասին բնութագրական և ոչ մի խոսք), որին նորից հետևում է անկում (13-րդ դար ու առավելապես՝ 16-րդ դար), ապա, վերջապես, Միփթար Արքայի գործունեության առնչությամբ մատենագրության աշխուժացում (18-րդ դար) — ահա և ամբողջ հայ գրականութան պատմության ընթացքի

¹ «Փորձ», 1880 թ., № 6—7, գրախոսություն Զարբհանալյանի հայ մատենագրության պատմության երկու հատորների մասին, էջ 210—211.

² Գարբրինյան, էջ 4—5:

պատկերն ըստ Զարբհանալյանի, որ գծված է գերազանցորեն հայերեն լեզվի հստակության (չափանիշը՝ ոսկեղարի լեզուն): Հիման վրա Ինարկե, վերին աստիճանի ուսանելի է այն «Պատկեր հայ դպրության ըստ յուրաքանչյուր դարուց» տախտակը, որ տալիս է Զարբհանալյանը իր առաջին հատորի սկզբում, վերին աստիճանի կարևոր լուսավորության կենտրոն դարձած վանքերի թվարկումը այդ տախտակում դարից դար—սակայն այս ամենի մեջ բացակայում է դպրագումը, փուլից փուլ անցման ներքին հաջորդականությունը:

Զհետելով Գաթըրճյանին ազդեցության իմադրում, Զարբհանալյանը նույն այդ ահսությունից փաստորեն գերված է հայտաբերում իրեն, երբ ասում է, թե «Քաղաքական ու հեկողեցական պատմություննիս ձոխ է, իրավամբք հետաքրքրական ու ընդարձակ գեպքերով, բայց ոչ նույնպես, ինչպես փափաքելի էր, նաև ազգին մտավորական պատմությունն կամ անոր թողած գրավոր արտադրությունք»: Այս պարբերությանը նախորդում է հետեյալը, որ ունի միենույն իմաստը. «Ճեր մատենագրական պատմությունը եթե ոչ բոլորովին աղքատ, սակայն և ոչ այնչափ ձոխ կրնա ենթադրվելու: Իսկ քիչ հետո հայկական դպրությունը նա անվանում է «չքավոր»:¹

Գաթըրճյանի պես Զարբհանալյանը ևս անհանդուրժելի է համարում հայ մատենագրության համեմատումը հույն և լատին գրականությունների հետ: Մինչդեռ մեզ հայտնի է, թե որպիսի համոզիչ լուծում է տալիս այդ խնդրին Պալասանյանը, միաժամանակ տարբերություն դնելով երկու անտիկ ժողովուրդների մեջ՝ բարձր գասելով մեկը, քննադատելով մյուսը: Իսկ Միխեթարյան հայրերի համար դրանք համարյա միատարբ մի զանգված են:

Զարբհանալյանը, որի ծառայությունների մեջ ցանկի մեջ հայկական բանասիրությանը ուշագրավ տեղ է դրավում նրա «Մատենագրարան հայկական թարգմանությանց նախնյաց» հըմտալից և շատ կարեոր հատորը,² վերջապես, հակված է հայ ինք-

1 Գ. Զարբհանալյան—«Հայկական հին գլուխության պատմություն», Ա. հատոր, երբորդ հատարակություն, 1897 թ., էջ 2:

2 Գ. Զարբհանալյան—«Մատենագրարան հայկական թարգմանությանց նախնյաց», Վենետիկ, 1889:

նուրույն գրականությունից առավել բարձր դասել նույն այդ թարգմանականը. «Իմաստուն Եվրոպա», ասում է նա, երախտագետ է մեղ մեր նախնիների «հմուտ գրչին արդյունք ընտիր պատմական երկասիրությանց, և մանավանդ ընտրելագույն թարգմանությանց համար»:¹

Մեզ հայտնի է արդեն, թե որպիսի խոշոր նվաճում էին հայկական բանասիրության համար Գաթըրճյանի և Պալասանյանի «Պատմությունները»—նրանց մեջ առաջին անդամ հայտարերմից հայ հին անգիր բանահյուսության խոշորագույն նշանակությունը մեր կուլտուրայի պատմության համար: Զարբհանալյանը այս ամենը չի ժխտում, բայց չի էլ շեշտում: Ամբողջ հայ հին ժողովրդական բանահյուսությունը նա պարփակում է «Գողթան երգեր» համառոտ գլխի մեջ. վերնագիրն իսկ ցույց է տալիս, որ Զարբհանալյանը նեղ սահմանների մեջ է դնում մեր հին ազգային պոեզիան, հակված լինելով մեկնաբանելու այն իբրև գերազանցորեն արքունի պոեզիա:

«Գողթան երգեր» զլուխը Զարբհանալյանը հյուսում է ըստ Գաթըրճյանի: Գեղարվեստական գնահատականներն էլ նա տալիս է հետևելով միենույն գիտնականին: Պալասանյանը, Գաթըրճյանից մի քայլ առաջ տնցնելով հայ ժողովրդական բանահյուսության տեսության խնդիրներում, գեղարվեստական գնահատման ասպարեզում, այնուամենայնիվ, ստիպված էր նորից կրկնել նրան: Բայց մինչդեռ Պալասանյանը, միաժամանակ քննադատաբար վերաբերվելով, չէր համաձայնվում Գաթըրճյանի հետ մասնավորապես երբայական բանաստեղծության մասնակի ազգեցության խնդրում հայ հին բանահյուսության վրա, Զարբհանալյանը, ամբողջությամբ հետևելով Գաթըրճյանին, առանձնապես շեշտում է նրա գնահատականների հենց այդ թույլ կողմը:

Պիտի ասել, որ գեղարվեստական վերլուծման վրա—իսկ եթե խոսենք ավելի ընդհանուր առումով՝ առհասարակ գեղարվեստական գրականության վրա—Զարբհանալյանը իր մատենագրության պատմության մեջ քիչ ուշադրություն է դարձնում: Նրան հետաքրքրողը պատմագրությունն է ու եկեղեցական գրա-

¹ Զարբհանալյան—«Հայկական գլուխության պատմություն», հատուք Ա., էջ 7:

կանությունը, մնացածը երկրորդական նշանակություն ունի նրա համար: Օրինակ, Մխիթար Գոշի առակների մասին նա խոսում է ընդամենը կես էջ: Նույնը նա անում է Վարդան Այզեկյու առակների նկատմամբ: Հովհաննես Երդնկացու երգերը զբաղեցնում են նրան նույն չափով և այլն:

Սակայն, մի ասպարեզ կա, ուր Զարբհանալյանը հայտաբերում է մեծ հատություն ու ճաշակ՝ դա ոճն է ու լիզուն և նրանց արժեքավորումը:

Լեզվի սգեղեցկությունը և հոգին իր պարզության մեջ է:— ասում է Զարբհանալյանը:¹ Անանիա Շիրակացու մասին խոսելիս նա ցանկություն է հայտնում «տեսնել ի նմա՝ ավելի ճշտություն ի կարծիս և պարզություն ի բացատրության»:² Սերեսին նա դրվատում է, որովհետեւ նրա «լեզուն մերձավոր է մեր մատենագրության ոսկե գարուն հեղինակաց. գեռ կալահի այն նվիրական հնության ոճն և պարզությունը, որ հաջորդ գարուն մեջ կխառնվի արարական բազմարանության»:³ Թովմա Արծրունու լեզվի հիմնական թերությունը նա համարում է «դպրուն քաղաքական ազգեցությամբ առած եկամուտ ոճը», պերճարանությունը, «որ թեև շատ տեղ սաստկություն կու տան բացատրության՝ այլ ընտիր նախնյաց պարզության շնորհքը չունին»:⁴ Զարբհանալյանի իդեալը ոսկեղարի լեզուն է, նրա պարզությունը, հստակությունն ու թափանցիկությունը: Այս գիրքերից ելնելով, Մխիթարյան գիտնականը, բնականորեն, ամենաբացասական կարծիք է հայտնում Գրիգոր Մագիստրոսի օճի ու լեզվի մասին նրանց՝ «ապահանյալ բյուզանդիոնից» փոխ առած խրթնության և մթամածության համար:⁵

Զարբհանալյանը գովում է Մովսես Կաղանկատվացու կենդանի և վառվուուն ոճը,⁶ Նարեկացու ու մի փոքր նվազ չափով՝ Շնորհալու «աշխույժն ու խսնդը», «որոնցմով քերթողական լե-

¹ Անդ, էջ 471:

² Անդ, էջ 465:

³ Անդ, էջ 440:

⁴ Անդ, էջ 527—528:

⁵ Անդ, էջ 576:

⁶ Անդ, էջ 452:

զուն սրտաշարժ ու աղջու կըլլա»,¹ Հովհանն իմաստաների հայկաբանությունը, ուր «քիչ մը հելլենաբանություն» է թույլ տրված, որպեսզի լեզուն «նյութույն ծանրությանը և մեծավայելչությանը արժանապոր ըլլա»,² նշում է Սերեսոսի կարողությունը՝ «առանց երկար խորհրդածելու կամ նկարագրելու՝ իրաց և անձանց որոշ և ճշգրիտ կերպարանք» տալու, թեավոր խոսքով բնութագրում է միենույն մատենագրի պատմելու եղանակը, նմանություն գտնելով վերջնիս և նրա «գյուղագին՝ հերակլ կայսեր՝ արագ արշավանացը» միջև:³

Նուրբ են ու ձաշակով Զարբհանալյանի՝ գրական հուշարձանների ոճին վերաբերող գիտողությունները: Իգնատիոս վարդապետի մասին նա ասում է. «Միջին ոճ մը բռնած է հեղինակս. ոչ խիստ երկայն՝ որ բառից շատության մեջ իմաստները կորսվին, և ոչ այնչափ համառոտ՝ որ սուրբ գրոց մեկնության հարկավոր տեղվանքն անբացատրելի մնան»:⁴ Մենք տեսնում ենք, թե որպիսի վարպետությամբ է Զարբհանալյանը կառում իմաստի հայտաբերման ինդիբը նախագասության կառուցվածքի հետ:

Մատենագրից Զարբհանալյանը պահանջում է—սերտ կապված ոճի պարզության պահանջի հետ—չափի զգացում: Նա գրվատում է Ասողիկին «համաճարեղ չափավորության» համար, պախարակում Գրասլանակերտցուն, որ նա «ուղելով զարդարուն ոճ մը գործածել, վայելչականնեն անդին կանցնի»,⁵ հավանություն տալիս կաղանկատվացուն, որովհետև նրա հստակ, հարուստ և ընտարի հայկաբանությամբ փայլող լեզուն, թեև տեղ տեղ ճոխաբանություն ունի, բայց այն «իրմին վերջիններուն պես չափագանց չէ», թեպետ և «ոչ առաջնոց չափ ճշտած և սքանչելի պարզությամբ»:⁶ Մենք նորից հասանք «առաջնոց», մեր նախնիներին, ուկեղաբին ու նրա լեզվին:

Լեզուն, ու հատկապես ոսկեդարի լեզուն, Զարբհանալյանի

¹ Անդ, էջ 637:

² Անդ, էջ 480—481:

³ Անդ, էջ 440:

⁴ Անդ, էջ 643:

⁵ Անդ, էջ 513. Քիչ հետո ասված է. «ճարտասանական արվեստը Հովհաննու գրչին տակ՝ երեմն սահմանեն դուրս ելած է», էջ 516:

⁶ Անդ, էջ 452:

ըմբռնումների կենտրոնն է: Իր «Պատմության» նպատակներից մեկն էլ այն է, որպեսզի «ավելի սիրելի ու մեծարուընել... մեր ընտիր և հոչականուն նախնյաց գործածած լեզուն»:¹ Անվանելով, ինչպես մեղ հայտնի է, հայ մատենագրությունը «աղքատ» և «չքավոր», Զարբհանալյանը միենույն ժամանակ հակված է, հակասելով իրեն, նրա լեզուն, ևնախնյաց լեզուն», հոչակելու նոյան լեզու, այսինքն՝ մարդկության առաջին և ամենալընտիր լեզու: Հարյուրամյակների բաժանելով մատենագրության պատմությունը, յուրաքանչյուր դարի զնահատականը նա տալիս է ելնելով զերազանցորեն լեզվից, նրա մոտ կամ հեռու լինելովը ոսկեղարի լեզվին: Վերջապես, մենք համոզվեցինք, որ նրա զեղարվիստական զնահատականների միակ ասպարեզը նորից լեզուն է: Լեզուն Զարբհանալյանի դատողությունների հիմնական մեկնակեան է, ոսկեղարի լեզուն նրա զնահատականների հիմնական չափանիշը:

Այսպիսի տեղ հատկացնելով լեզվին ու մասնավորապես 5-րդ դարի լեզվին, այս հարյուր, հետեապես, չպահպանելով իր իսկ պահանջած չափի զգացումը, Զարբհանալյանը, ուարդ է, մի կողմից գրական լեզվի էվոլուցիան՝ սկսած 5-րդ դարից մինչև մեր օրերը՝ խանդարում պիտի համարեր ու հույսեր տածեր արդի գրական հայերենի ավելի ու ավելի մերձնալուն գրաբարին, մյուս կողմից, հա, անխուսափելիորեն, միակողմանի պիտի քններ ամբողջ հայ գրականության պատմությունը, անտեսեր նրա ներքին բովանդակությունը, նրա զարգացման իդեալուն կորիզը, դարաշրջանների պաղափարական հաջորդականությունը:

5

Զարբհանալյանի «Հայ դպրության պատմության» առաջին հրատարակությունից մոտ 50 տարի հետո ու երրորդ հրատարակությունից 17 տարի հետո, 1914 թ., լույս տեսավ Արքահամ Զամինյանի «Հայ գրականության պատմության» առաջին

¹ Անդ, էջ 6:

մասը,¹ որ ընդգրկում է հին և միջին շրջանները (մինչև 17-րդ դարը ներառյալ), երկու այդ գրքերի միջև ընկած ժամանակա-հատվածը այնքան է երկար ու այնքան է այն հագեցված քա-ղաքական առաջմղիչ գեպքերով (1905 թ. ռեզուլտիան, հայ աղա-տագրական շարժումը 19-րդ դարի վերջում ու 20-րդ դարի սկզբում), և հարուստ բանասիրական հետազոտություններով (Հ. Տաշյան, Գ. Տ.-Մկրտչյան, Ստ. Մալխասյան, Մ. Աբեղյան, Կ. Կոստանյան, Ն. Մառ, Գ. Խալաթյան և ուրիշները), որ Զա-մինյանի գրքին այս ամենը նոր տեսք տվավ, առանձնապես միջին գրականության նկատմամբ, թեև մյուս կողմից Զամի-նյանը գեռ շատ խնդիրներում շարունակում է կանգնած մնալ հին տեսակետների վրա:

Գրականության պատմության առարկան Զամինյանը սահ-մանում է հետեւելով Գաթըրճյանին և Զարբհանալյանին. «գրա-կանություն կամ մատենագրություն ասելով—գրում է նա—ընդհանուրապես կհասկանանք որևէ ազգի հոգերը արդյունքներու համագումարը՝ գրավոր կամ բանավոր»:² Համաձայն այս սահ-մանման նրա «Պատմությունը» ընդգրկում է պատմական, թարգ-մանական, վարդապետական, վկայաբանական, միկնարանական, դավանաբանական, գիտական, հոետորական, իմաստասիրական, քժշկական, օրենսդրական և բանաստեղծական կամ քերթողական գրվածքների բաժիններ, ըստ որում Զամինյանը, հայտարարելով, որ գրականությունը ենթակա է «տնտեսական, քաղաքական և այլ պարագաների» ազդեցության, միաժամանակ առանձնապես շեշտում է նրա զորեղ գործոն լինելու հանգամանքը հասարակա-

¹ Ա. Զամինյան—«Հայ գրականության պատմություն», Նոր Նախիջևան, 1914; Անհամժեշտ ենք համարում նշել այստեղ, որ մինչ Զամինյանը, 1899 թ. Ներսիսյան գպրոցի հրատարակությամբ լույս է տեսել Ստ. Մալխա-սյանի «Խասընթաց Հայոց մատենագրության պատմության» հատորը, ուր գրա-կանության պատմությունը հասցվում է մինչև Տովմես Խորենացին (ներառյալ): Բայց քանի որ այդ գիրքը՝ վիմատիալ լինելով՝ ձեռագրի իրավունքով է հրա-տարակել, այդ իսկ պատճառով մենք հարմար չգտանք խոսել նրա մասին, թեև նա ունի՝ բանասիրական տեսակետից՝ շատ կարևոր ու փայլուն էջեր: Չենք խոսում նաև վ. Փափազյանի «Հայ գրականության պատմության» մասին, այն պատճառով, որ նա ընդգրկում է գերազանցորեն նոր գրականության պատմությունը:

² Անդ, էջ 7:

կան կյանքում, որ «կնպաստե կյանքի դարդացման, որ նոր գաղափարներ, նոր հոսանքներ կմտցնե կյանքի մեջ՝ ազնվացնելով մարդկային սիրտը, ընդլայնելով մտքի հորիզոնը»:¹

Զամինյանը ճիշտ է ըմբռնում հայ հին ժողովրդական բանահյուսության էությունը, առելով, որ նրա մեջ ժողովրդի կյանքը լիուլի է արտացոլվել և ոչ թե միակողմանի, ինչպես քրիստոնեության ժամանակ,² բայց նա, ցավոք, մասամբ տարված է իր ժամանակի որոշ բանասիրների ոչ այնքան առողջ տենդենցիանով՝ տեղաշարժելով եղիշեին ծրագր բարից ծրագը, իսկ Խորենացուն համարելով շրագ գարի մատենագիր: Ավելացնենք, որ Զամինյանի զիրքը հայ հին գրականության պատմությունը շարադրող աշխատություններից միակն է, որտեղ անդրադարձել են բանասիրական այս տեսակետները:

Ինչպես Զարքհանալլանի, այնպես էլ Զամինյանի մոտ զեղարվեստական արժեքավորման ասպարեզը սահմանափակվում է համարյա միայն լեզվով, ըստ որում Զամինյանը ևս բարձր է գնահատում ոսկեղարյան ընտիր գրաբարը և նշում մեր մատենագիրներից ոժանց հելլենաբանությունը (Շիրակացի, Օձնեցի), ոժանց արհեստականությունը (Դրասխանակերպացի), ոժանց էլուսուցիկ ոճը (Արծըունի), բայց միաժամանակ ավելի համարձակորեն է արձանագրում լեզվի թեքումը գեպի ժողովրդականը, ինչպես, օրինակ, Փալստոսի ու Փարպեցու մոտ, ու չի համարում այն շեղում կամ խանգարում: Ոսկեղարի ֆեաթշ դարձնելը, առհասարակ, բացակայում է նրա մոտ:

Սակայն, քանի որ Զամինյանի զրքում բանաստեղծությունը—ինչպես քիչ հետո կտեսնենք—շատ տվելի տեղ է գրավում, քան իր անմիջական նախորդի մոտ, այդ պատճառով էլ գեղարվեստական գնահատման ասպարեզը ինքն իրեն ընդարձակվում է նրա մոտ, թեև ավելի նվազ չափով, քան այդ պահանջում է նյութը: Զամինյանը բավականանում է բանաստեղծների զգացմունքների անկեղծությունն ու ոճի պատկերափորությունը արձանագրելով, ապա հայտարարում, որ աքրոստիքը և առհասարակ նման խաղերը հակառակ են ազատ ու ճշմարիտ ստեղծագործության ու բնութագրելիս տեղանում միայն հասնում, ինչ-

1 Անդ, էջ 7:

2 Անդ, էջ 18:

պես, օրինակ, Ստեփանոս Սյունեցու նկատմամբ, իսկական ողձավորության՝¹

Հայ հին մտքի ու զրականության վրա, ինարկե, կրօնական-քրիստոնեական ուղղությունը հսկայական ազդեցություն է թուզել Զամբինյանը նշում է, որ հայ հոգեոր բանաստեղծության վրա գրոշմվել են Յողոմոնի և Առակաց գրքի հայացքները աստծոմեծավայելչության և տիեզերքի ու մարգու ոչնչության մասին, որ հայ մտավորականի աշխարհայցքի, նրա տեսակետների վրա բնության և աշխարհի մասին մեծապես ազդել են Եփրեմի և Ռոկերերանի ու նամանավանդ Բարսեղ Կեսարացու գործերը, որ, վերջապես, Եվսեբիոսի պատմական գործերը («Եկեղեցական պատմությունը» և «Քրոնիկոնը») խոր հետք են թողել հայ պատմիչների երկերում՝ դարձնելով նրանց հաճախ զյուրահավատ պատմական փաստերի նկատմամբ ու նախախնամության տնօրինության կույր հավատացյալների։²

Սակայն, Զամբինյանը, ինարկե, սխալվում է, եթե այս ազդեցությունը դարձնում է համատարած և հայտարարում ամբողջ հայ գրականությունը շաղախաված կրօնական ոգով. հայ գրականության այլ ուղղությունը, ասում է նա, որ դարեւ շարունակ պահպանվեցավ, կրօնական էր՝ մանավանդ գրականության սկզբնական ժամանակները. Մեր մեծ գործիչներու և նոցա աշակերտներու, որոնք մեկ անունով թարգմանիչ կկոչվեն, միակ նպատակն էր քրիստոնեությունն արմատացնել հայ ժողովրդի մեջ, նորան կրօնապես և բարոյապես վերածնել։³

Բայց Զամբինյանը, բարեբախտաբար, հակառում է իրեն, որովհետև մի քանի էջ առաջ, խոսելով Սահմկի և Մաշտոցի մասին, նա միանգամայն հակառակն է պնդում. «Սոքա անգիր հայ ժողովրդին գիր պարզեցին և սկիզբը դրեն իրապես ազգային գրականության, որ հայի գոյության գլխավոր պատմեշներեն մին դարձավ, որով ազգային արհամարհված լեզուն միւս թյան զորեղ օղակ դարձավ, որով քրիստոնեական եկեղեցին ազգայնացավ. ազգը ճանաչեց յուր անցյալը և ձգտեց որոշ ապագայի»։⁴

¹ Անդ, էջ 179:

² Անդ, էջ 46—47, 47—48, 50—51.

³ Անդ, էջ 42:

⁴ Անդ, էջ 38:

Նա հակասում է իրեն, որովհետեւ, խոսելով Շարդ գարի դավանաբանական գրականության մասին, քաղաքական ճիշտ գնահատական է տալիս այդ գրականությանը՝ համարելով այն «միանգամայն ազգային ինքնաճանաչության գարթնումի նշան»:¹ Նույնը նա կրկնում է 8-րդ դարի կրոնական գրականության մասին, ասելով, որ ազգությունը արաբներից պաշտպանելու նպատակով «պետք է սրբոց վարքերով արիական նահատակության օրինակներ տալ՝ հավատացյալներու մեջ դիմագրական ոգի ու անվեհերություն զարթեցնելու համար»:²

Այսպես է դրությունը հայ հին գրականության բնագավառում, ուր Զամինյանի միտքը, ավելի ու ավելի աշխարհականանալով—սրանով են բացտտրվում ու անխուսափելի դառնում նրա հակասությունները—մոտ է արդեն հասնելու այդ գրականության մեծագրւյն պատմական-քաղաքական իմաստի ըմբռնման:

Ի՞նչ վերաբերում է միջին դարերի գրականությանը, ապա Զամինյանը, հատուկ ուշադրություն դարձնելով նրա վրա և մասնավորապես բանաստեղծության վրա ու օրինաչափ համարելով ժողովրդական լեզվի ներխուժումը գրականության ասպարեզը—գրանով իսկ ժխտում է իր թեզը հայ գրականության գերազանցություն կրոնական լինելու մասին:

Նման պարագաներում, բնական է, որ Զամինյանի տեսակետները միջնադարյան հայ գրականության ու նրա այլեայլ հուշարձանների մասին, կարող էին ոչ միայն տարբերվել իր նախորդի, Զարբհանալյանի, տեսակետներից միևնույն խնդիրների շուրջը, այլև հակադրվել նրանց:

Եթե Շնորհալու համելուկների մասին Զարբհանալյանի մոտ միայն հիշատակություն կա, ապա Զամինյանն ասում է, որ նրանք բանաստեղծի «գրվածներու մեջ նշանավոր տեղ կրոնեն»:³ Եթե Գոշի առակների մասին Զարբհանալյանը ասում է, որ նրանց մեջ գյուտեր չկան, ապա Զամինյանը մեծ նշանակություն է տալիս նրանց, իբրև իր ժամանակվա հայ կյանքի պակասու-

¹ Անդ, էջ 102:

² Անդ, էջ 127:

³ Զարբհի, էջ 641, Զամ., էջ 182:

թյունները հայտաբերող երկերի¹ եթե Սմբատ Գունդստապլիք-Օրինագրքի լեզվի մասին Զարբհանալյանը ասում է, որ այն՝ աշխարհիկ բարբառ լինելով՝ «ազգային գերության շղթայից տխուր արձագանքը կլսեցնե» , ապա Զամինյանը հարգանքով՝ արձանագրում է, որ «սա է միանգամայն առաջին անձը, որ գրաբարեն աշխարհաբար գիրք կթարգմանե»² Եթե, վերջապես, Զարբհանալյանը Հովհաննես Երգնկացու մասին համարյա ոչինչ չի ասում, ապա Զամինյանը նշում է, որ այդ նշանավոր բանաստեղծ «իր գալանաբանական կամ մեկնական գրվածքով չի ներկայանար մեր գրականության մեջ, այլ իրեն բանաստեղծական տաղանդ», որով և նա «մեր գրականության նոր ուղղություն տվավ»³

Զամինյանը, առհասարակ, միշտ պատրաստակամությամբ է արձանագրում այդ նորը, գիտելով այն արդեն ոչ իրեն շեղում ուկեղաբարյան հիմնական տիպարից, ոչ իրեն այլասերում, այլ իրեն նոր ժամանակների նոր խոսք: Խոսելով Հովհաննես Սարկավագի մասին, նա ասում է, որ միջնադարյան այդ բանաստեղծի «Երդ ի սարեակն» գրվածքը «միանգամայն կցուցնե, թե հայ բանաստեղծության նյութերու շրջանակն արդեն սկսած է ընդլայնիլ ԺԲ դարեն»⁴ Խոսելով Շնորհալու մասին, նա ասում է, որ ի գեմս «Ոլլը Եղեսիոյ» հայ գրականության մեջ առաջին անգամ պատմական իրողությունը դառնում է բանաստեղծական երկի առարկա: Միննույն Շնորհալու մասին նա ասում է, որ նա «կհանդիսանա առաջին աշխարհաբար գրող մատենագիրը»⁵

Վերջապես, վերև արգեն մենք տեսանք, թե ինչ է նա ասում Գոշի առակների, իրեն առաջին ռեալիստական երկերի մասին ու Կոստանդին Երգնկացու մասին, իրեն հայ գրականությանը նոր բովանդակություն, նոր ուղղություն տվյալի մասին:

1 Զարբին, էջ 696, Զամ., էջ 187: Իր ժամանակ Ստ. Նազարյանը Գոշի առակները անվանել է „Славная в Гайканской литературе книга“ („Беглый взглядъ“, էջ 42).

2 Զարբին, էջ 774, Զամ., էջ 199:

3 Զարբին, էջ 766—767, Զամ., էջ 213:

4 Զամինյան, էջ 180:

5 Անդ, էջ 183:

Հետաքրքրական է, որ Զամինյանը վերջինիրջու հասնում է մինչև իսկ հռւմանիզմի դադափարին, դուզանեռ դիտելով իտալիայի և Հայաստանի 14-րդ դարի գրական շարժումների միջև: Մյնենակ ձգտում «կյանքը երկրի հետ կապել և մարդկային բնական զգացմունքներու արտահայտության ազատություն տալ», այստեղ, մեղ մոտ, ձգտում օմարդկային բնական զգացումները խեղղելու փոխարեն լիորեն արտահայտել և այն՝ ոչ թե մեռած, այլ կենդանի, բնական լեզվով։ «Աշխարհականացումն թե ըստ բուկանդակության և թե ըստ լեզվի»¹—հղուահանգում է իր դատողությունները Զամինյանը:

Սակայն, ցավոք, Զամինյանի այս միտքը հումանիզմի մասսին Հայաստանում շատ քիչ է անդրադառնում նրա հետագա շարագրանքի վրա: Մինչև անգամ, տեղատեղ, նա նորից—հակառակ ծայրից—հակասության մեջ է ընկնում, ասելով 14-րդ դարի մասին, թե «որքան ալ ժամանակի բերմամբ հայ գրտկանությունն աշխարհականանալ սկսավ», բայց և այնպես պաշտպանեց նա դարձյալ իր նախկին կրոնական ուղղությունը»,² իսկ 15-րդ դարի մասին բացականչելով, թե «զարմանալի կերպով այս դարուն մեջ սակավաթիվ է կրոնական զրականությունը, բայց հարուստ է բանաստեղծությունը»³... Մենք տեսնում ենք, որ Զամինյանի հին թեղը հայ զրականության գերազանցորեն կրոնական լինելու մասին նորից դգալ է տալիս իրեն:

Պերփողացիայի ինսդիրներում Զամինյանը հիմնականում հետեւմ է Զարբհանալյանին, կրկնելով նաև վերջինիս սովորությունը գրականության պատմությունը շարադրել ըստ դարերի: Հարկ է նշել միայն, որ 17-րդ դարը նա, ըստ երեսութիւն, ազգված Մ. Աբեղյանի «Արարատ»-ի 1908—9 թ.թ. համարներում տպադրած հայոնի «Ուրուագծեր»-ից, անվանում է «վերանորոգության» դար ու այդ գերանորոգությունը—նորից Աբեղյանի պես—կապում Մյունյաց անապատի միաբանների գործունեության հետ դարասկզբին:⁴ Մակայն, այս դեպքում ևս նոր հաս-

¹ Անդ, էջ 207:

² Անդ, էջ 209:

³ Անդ, էջ 216:

⁴ Մ. Աբեղյան—Ռուբագծեր 19-րդ դարու հայոց գրականության պատրությունից, «Արարատ», 1908, № 10, էջ 891: Ա. Զամինյան, էջ 230:

կացողությունը չի անդրադառնում հետագա շաբաթբանքի վրա, ինչպիս և չի սահմանագատվում հայկական «Հումանիզմի» դարը հայկական «Արքանորոգության» դարից:

6

Զամբնյանի գրքից հետո, 1916 թվականին, Մուկվայում, ոռուերեն լիզով լույս տեսավ „Պօջայ, Արմենիա հոչակավոր ժողովածուն վակերի Բըյուսովի խմբագրությամբ ու նրա պատմագրական ակնարկ-տուաջաբանով՝ «Հայաստանի պղուղիան և նրա միասնությունը դարերի ընթացքում»:¹

Ընդամենը երկու տարի է բաժանում երկու այդ աշխատություններն իրարից, բայց որպիսի հսկայական տարրերությունը ըբրունութիւնը ու տեսակետների խորության միջև Քաջածանոթ կլասիկական ու եվրոպական լիզուներին ու գրականություններին, ներշնչված իր հարազատ ժողովրդի մեծ հոգեոր կուլտուրայով ու նրան հատուկ լայնախոնոթյամբ և ինտուիցիայով, նշանավոր ոռու բանաստեղծն ու գրականագետը—դդայուն ու նուրբ ճաշակի տեր մի անձնագորություն—այնպիսի մի բարձր, միաժամանակ հիմնագործած և համոզիչ գնահատական տվեց հայ պղուղային, որ այն մի նոր, անծանված աշխարհ բաց արեց ոռու ընթերցողի համար, իսկ հայ ընթերցողին զմայլեցրեց իր համարձակությամբ, մտքի իր թոփչչով, թեև այդ թոփչքը այդ նոր խոսքը—նյութերի կուտակման տեսակետից—նախապատրաստվել էր, իհարկե, հայ բանաստերների տասնյակ տարիներ տևող ժրաշան աշխատանքով:

«Երկու ուժ, երկու հակագիր սկզբունք խաչաձևկելով, շաղկապիկ և միաձուլվելով որպիս մի նոր միասնական բան՝ ուղղություն էին տալիս Հայաստանի կյանքին և ստեղծում նրա ժողովրդի ընավորությունը հազարամյակների ընթացքում. Արեմուտքի սկզբունքը և Արենելքի սկզբունքը, եվրոպայի ողին և Ասիայի ողին... Հայ ժողովրդի պատմական միսիան, որ թելագրված է նրա զարգացման ամբողջ ընթացքից. Արենելքի և Արեմուտքի սինթեղը որոնելն ու ձեռք բերելու է: Եվ այս ձգտումը ամենից ավելի կատարյալ ձեռվ արտահայտվել է Հայաստանի

¹ Հայերեն թարգմանությունը տես՝ «Առինական գրականություն և արվեստ», 1944—ԱՆ 10—12, 1945 — № 1—2; Հրապարակվել է նաև «Բազմավելում», 1918 թ.

գեղարվիստական ստեղծագործության, նրա գրականության, պոեմիայի մեջ—այս բառերով է սկսվում Վալերի Բյուսովի ականարկը:¹

Իր այս հիմնական միտքը հայ ժողովրդի կուլտուրական քաղաքական նկարագրի մասին Բյուսովը ծավալում է երկու ուղղությամբ՝ պատմական և գրական:

Եվրոպական և ասիական մոմենտներ հայ ժողովրդի ծագման ու կազմավորման իսկ բոպեին հանձին հնդկա-հվարական-և ուրարտական տարրերի, ապա դարերի ընթացքում տեսական կուլտուր-պատմական ազգեցություններ՝ մի կողմից իրանականություն, մյուս կողմից հելենականություն, մի կողմից նոր-պարսկական կուլտուրա, մյուս կողմից հառմեական կուլտուրա, մի կողմից Սյուրբիա, մյուս կողմից Բյուզանդիա, մի կողմից մահմեդական Արևելք, մյուս կողմից քրիստոնեական Արևմուտք, մի կողմից արաբական-սելջուկյան տիրապետություն, մյուս կողմից Եվրոպական կուլտուրային հաղորդված կիլիկյան թագավորություն, մի կողմից ասիականացում 14—18-րդ դարերի ընթացքում, մյուս կողմից զրական երկու, թյուրքանայ և սուսահայդպրոցի բաժանում 19-րդ դարում իրեն «երկու սկզբունքների՝ Արևմուտքի և Արևելքի՝ հավիտենական պայքարի վերջին արձագանքներ Հայաստանում»²—ահա հայ ժողովրդի «երկմիանության» արտահայտությունը քաղաքական պատմության ասպարիդում:

Հայ ժողովրդական երգի հուրը մի կողմից, զսպվածությունու ողջախունությունը մյուս կողմից, միջնադարյան հայ պոեմիայի հագեցված լինելը կը թիւ լարվածությամբ մի կողմից, նրա-

¹ «Սով. գրակ. և արվեստ», 1944, № 10—11, էջ 6։ Ավելորդ չենք համարում նշել, որ Ս. Նազարյանն էլ ընդունում էր երկու այլ սկզբունքները։ Արևելք և Արևմուտք՝ «Ըմբանելով—տառում է նա—իր պատմական բարձր կոչումը, զիտակցելով, որ իր մեջ նա կը ունի և տափական մարդկության հոգեոր ապագան և որ նրան վիճակված է խաղալ մի գեղեցիկ օր աշխարհի թատերաբեմում միջամտողի դեր երկու հակողին կենսական սկզբունքների՝ արևելյան և արևմտյան սկզբունքների միջև—Ռուսաստանը վաղուց զգացիլ է արևելյան ժողովուրդների հետազոտության ամրող կարևորությունը» («Օճօքրեան», էջ 142—143)։ Որ հայերն էլ մասնակից են միջամոռղի այդ գերին, այդ մասին տես ն. ա., էջ 151 և սույն հետազոտության էջ 8—9։

² «Պոэзия Армении», էջ 36։

բարեհձեռությունն ու չափազանցված գունագեղության մերժումը
մյուս կողմից—ահա հայ ժողովրդի «Երկմիասնության» արտա-
հայտությունը գրականության ասպարիզում:¹

Միևնույն սկզբունքի արտահայտությունը հայ նոր պահ-
պիտում Բրյուսովը ընութագրում է հետեւյալ խոսքերով. «ուու-
սահայ» և «թյուրքահայ» դպրոցները, «ինչպես արդեն նշեցինք՝
հայ գրականության մեջ եղած Արևելքի և Արևմուտքի սկզբունք-
ների վաղեմի պայքարի վերածնությունն էր՝ նոր ձեռվ, նոր հա-
գուստով: Ռուս գրականության միջոցով, որն անկասկած ազգել
է Ռուսահայաստանի բանաստեղծների վրա, հայ գրականության
մեջ թափանցեց խորացած վերաբերմունքը դեպի առաջադրվող
խնդիրները, ինչպես որ ֆրանսիական զրականության միջոցով,
որ նույնքան աներկրա ազգեցություն է գործել արևմտահայ
բանաստեղծների վրա, թափանցել է ոճի ու ձեփի կատարելու-
թյան ձգտումը»:²

Իհարկե, շատ բան կարելի է ասել ու շատ գիտողություն-
ներ կարելի է անել Բրյուսովին այս կոնցեպցիայի կապակցու-
թյամբ հայ ժողովրդի կուլտուրապատմական էության մասին:

Կարելի է ասել, որ Արևելքի ու Արևմուտքի այդ հակա-
զրությունը ինքնին մետափիզիկական է, իդեալիստական, հիպո-
ստացնում է, բացարձակ սկզբունքների վերածում այն, ինչ
պատմականորեն շարժուն է, էլաստիկ, դյուրությամբ իրար փո-
խանցվող:

Կարելի է դիտել, որ բրյուսովյան տեսությունը հայ ժո-
ղովրդի ծագման մասին հնացած է, քանի վոր պատմագրությու-
նը ապացուցում է այսօր հայերի տեղացի լինելու հանգամանքը,
հետեապես և նրանց «միասնությունը» կամ թերևս «բազմմիաս-
նությունը», բայց համենայն դեպս ոչ «Երկմիասնությունը»:

¹ Խոսելով հայ պատմիչների մասին, Նազարյանն ասում է. «Նրանք չունեն երևակայության այն սանձարձակությունը, որով հաճախակի գրավվում
են արևելյան մատենագիրները՝ հափշտակված պերճախոսությամբ: Հայ հեղի-
նակները, բնավլ չդափանաներով իրենց արևելյան բնույթին, կարողանում են
խուսափել այն տարօրինակ համեմատություններից, ութեւք ու հաճախ ան-
միտ ալեգորիաներից, որ հանդիպում ենք այլ ասիացիների մոտ» («Եցլան
ՎՅԼԱԴ», էջ 7):

² «Սով. գրակ. և արվեստ», 1945, № 1-2, էջ 86:

կարելի է Բըյուսովի իրանականության հելենականություն հակագրելը ոչ այնքան ճիշտ համարել, որովհետև հելենականությունը սոսկ արևոտյան մի «սկզբունք» չէ, այլ հենց արևմտյան և արևելյան կուլտուր-պատմական տարրերի յուրատեսակ մի խառնուրդ։ Ասիականության տեսական տիբական տիբակալությունը ևս 14—18-րդ դարերի ընթացքում հայ ժողովրդի վրա տաճկական լծի օրոք գժվար թե հնարավոր լինի համարել երկմիասնություն կազմող սինթեզի մի տարր. դա պարզապես հայ ժողովրդի բախտի վրա ծանրացած մի չարիք է և ուրիշ ոչինչ, Համաձայնվելով, վերջապես, հայ ժողովրդական պոեզիայի, հայ միջնադարյան պոեզիայի ու հայ նոր պոեզիայի բըյուսովյան բնութագրումների հետ առանձին-առանձին վերցրած, կարելի է առարկել նրան, որ իթե ֆրանսիական դրականության ազգեցությունը հայ գրականության «թյուրքահայ» հատվածի վրա «արևմտյան» սկզբունքի գրսեորում է, ապա միթե ոռւս զրականության ազգեցությունը միենույն հայ գրականության «ոռուսահայ» հատվածի վրա—այդ խորությունը, կապը ժողովրդի հետ—«արևելյան» սկզբունքի գրսեորում է ու, վերջիվերջո, առնչվում է անզուսպ գունագեղության, պատկերների կուտակման և առհասարակ չափի զգացման թուլության այլ և այլ արտահայտումների հետ Միթե ոռւս գրականությունը, ընդհանրապես, «Արևելքի սկզբունք» է—բըյուսովյան իմաստով—և ոչ թե «Արևմուտքի սկզբունք»։

Դեռ շատ բան կարելի է ասել ու գեր շատ առարկություններ կարելի է անել Բըյուսովին։ Բայց մի բան անսառարկելի է, մի բան աներկա, որ իր մեծությամբ երկրորդական է դարձնում վերև հիշված բոլոր վիճելի կետերը։ Դա այն է, որ Բըյուսովը, մեծ ու բանիմաց վարպետի հմտությամբ, կարողացավ գտնել հայ գրականության միանգամայն ինքնուրույն ու պատվավոր տեղը համաշխարհային գրականության դարգացման ուղիներում ու գրանով անհունորեն բարձրացնել նրա նշանակությունը։ Այսուհետև մենք գերազույն երջանկություն չպիտի համարենք մեզ համար երրայական կամ որևէ այլ ժողովրդի գրականության «տկար արձագանք» կամ «աղքատ հավելված» լինելու հանգամանքը (Դաթըրձյան), այսուհետև մենք վիզը ծուծ չպիտի հայտարարենք մեզ «աղքատ» ու «չքաղզոր» (Զալըրհանացան), այլ բաց ճակատով պիտի ասենք, որ հարուստ ենք մենք,

տվել ենք համաշխարհային նշանակություն ունեցող արժեքներ, Արմիկ հաղորդակից ենք մարդկային մտքի ամենաբարձր թոփչքներին ու մարդկային հոգու ամենախորը ապրումներին։ Բըյուսովվը առաջիններից է եղել, որ Խորենացու հայտնի ասացվածքը հայ ժողովրդի քանակով փոքր, բայց զործով մեծ լինելու մասին՝ «գործ» հասկացողությունը մեկնաբանել է ոչ միայն ուզմի դաշտում կատարած սիրության, այլև ոգու ասպարիզում կատարած մեծագործության իմաստով։

Բըյուսովվը վերջ դրեց աղղեցությունների այն այլանդակ տեսության, որով համակված է Գաթըրճյանի հայ ամբողջ գրականության պերիոդիզացիսն և որի վերջին արձագանքն է Զամինյանի տեսությունը պարսկական պոեզիայի ուսցըրած աղղեցության մասին միջնադարյան հայ պոեզիայի վրա։ «Հայ միջնադարյան քնարերգությունը համարյա ոչ մի կախում չունի հվարոպական պոեզիայից, — ասում է Բըյուսովվը։ Եվ ի՞նչ կարող եր տալ լիրիկական ստեղծագործության 13—14-րդ դարերի արևմտահվարդական պոեզիան, որ գեռ նոր էր ծնունդ առնում բռնրար երկրներում, չբացառելով և առաջավոր իտալիան»։ Ինչ վերաբերում է Արեկելքին, «վերջին տարիներս դիտության մեջ առաջ է քաշվում այն կարծիքը, — շարունակում է Բըյուսովվը, — որ հայ պոեզիան շատ ավելի պակաս է ենթարկվել Արեկելքի ուղղակի աղղեցության, քան առաջ էին կարծում, որ Առաջավոր Ասիայի ամրող կուտուրական աշխարհը, այդ թվում և հայերը, համատեղ են, աշխատել ստեղծելու համար այն ոճը, որ բնորոշ դարձավ թե արաբների ու պարսիկների քնարերգության, թե Միջնադարի հայ պոեզիայի համար»¹։

Բայց ոչ միայն այդ։ Հայ պոեզիան ոչ միայն ինքնուրույն է, այլև իր բաղմադարյան պատմության ընթացքում կարողացել է կանխել համաշխարհային պոեզիայի մի շարք բնորոշ երեվույթները։ Հայ ժողովրդի կրոնական պոեզիայի նմուշները, նրա օրինաբաները, հավասար լինելով հունական և հռոմեական օրինաբներին, «իրենց գեղարվեստական կերպերի նրբագեղությումը մոտենում են արգեն նոր ժամանակների բանաստեղծություններին, ընդհուպ մինչև վեռլինի ոգեշնչումները»։ Գրիգոր Նարեկա-

1. Առաք. գրակ. և արվեստ, 1944, № 10—11, էջ 69—70։

յին «բարձր կատարելության է հասցըիլ բանաստեղծության ձևավորվ մշակելով «հնչյունագրությունը» շատ ավելի առաջըքան դա կծաղկել պարսկական և արարական քնարերգության մեջ։ Հովհաննեսը «գտել է այնպիսի խոստովանություններ («Եսքո սիրուն չեմ դիմանար...»), որոնք լիովին հասկանալի դարձան միայն մեր օրերում, միայն այն բանից հետո, երբ և՛ Ալֆրեդ զը-Մյուսեն, և՛ Հայնեն, և՛ Բողերը տվին իրենց հայտնությունները...»։ Նահապես Քուչակը 16-րդ դարում «իր պոեզիայի մեջ ավել է իսկական լիրիկայի նմուշներ այն իմաստով, ինչպես այժմ մենք հասկանում ենք բառը՝ ինտիմ ու անկաշկանդ, անձնական և լոկ մի նպատակ դնող պոեզիա՝ արտահայտել այդ վայրկյանին բանաստեղծին համակած զգացմունքը», այսինքն արել է այն, ինչ 19-րդ դարում արել են Հայնեն ու Վեոլենը։ Վերջապես, Սայաթ-Նովան 18-րդ դարում «կատարեց այն պատգամը, որ մեկ գար հետո տվեց Վեոլենը. ոչ թե գույնը, այլ միայն նրբերանգը»,¹

Այսպես է հայ պոեզիան ըստ Բրյուսովի։ Հայ պոեզիան մտնում է այն պանթեոնի մեջ, որ «ամեն մի կուտուրական մարդ կանգնեցնում է իր հոգում, որպեսզի այդանու պահի բոլոր երկրների և բոլոր դարերի բանաստեղծների սքանչելի ստեղծագործությունները»²։ Հայ ժողովրդական երգերը այնքան են բարձր իրենց կատարելությամբ, որ «քիչ ժողովուրդներ կարող են պարծենալ, որ իրենց ժողովրդական երգերը հասնում են գեղարվեստական այսպիսի մակարդակի, այսպես նրբագեղորին գերիշեն, այսպես ինքնատիպորեն ուրույն են՝ իրենց ամբողջ անմիշականությամբ և անսեթենթ անկեղծությամբ հանդերձ»³։ Մեզ արգեն հայտնի է Բրյուսովի բարձր կարծեքը հայ կրոնական պոեզիայի մասին։ Գալով աշուղական պոեզիային ու մասնավորապես Սայաթ-Նովային, Բրյուսովն ասում է. «Այնպիսի բանաստեղծներով, ինչպես Սայաթ-Նովան է, կարող է և պետք է պարծենա բովանդակ ժողովուրդը. զրանք երկնից վեհ ընծաներն են, որ ուղարկվում են ոչ ամենքին և ոչ հաճախակի. դրանք նա-

¹ Անդ, 1944, № 10—11, էջ 62, 68, 72, 74 և № 12, էջ 64,

² Անդ, 1944, № 10—11, էջ 63.

³ Անդ, էջ 62:

Հասկնամության ընտրյալներն են, որոնք օրհնենք են դրոշմում իրենց դարի և իրենց հայրենիքի վրա»:¹

Ինչ վերաբերում է, վերջապես, միջնադարյան պոեզիային, աղա բրյուսովյան մի շարք փայլուն բնութագրումների մեջ միջնադարյան հայ պոեզիային տված բնութագրումը այնքան է բացառիկ իր խորությամբ ու գեղարվեստական ավարտվածությամբ, որ մենք այն մեջ ենք բերում ամրողջությամբ։ «Ծիծածանի բոլոր գույներով շողողացող, բոլոր թանկարժեք քարերի փայլով վետիտացող, գաշտային ծաղիկների պես հոտավետ և որպես նուրբ բույրեր, մերթ անտառի աղբյուրի նման կարկաչանոս, մերթ լեռնային վտակի պես խոխոջուն, քնքույշ սիրո քաղցրահամ բառերը և հաղթանակող կըքի կեղիչ խոսքերն իմացող, միշտ բարեշնորհք, ներդաշնակ, մասը ընդհանուր մտահղացման ենթարկել կարողացող—միջնադարյան հայ քնարերգությունը հայկական ոգու ճշմարիտ հաղթանակն է համաշխարհային պատմության մեջ...»²

Բրյուսովի՝ հայ գրականությանը մատուցած ծառայությանը բովանդակությունն ու մեծությունը վերջնականապես պարզելու համար անհրաժեշտ ենք համարում—որքան էլ այդ տխուր լինի— հայ միջնադարյան պոեզիայի վառ այս բնութագրումից հետո մեջ բերել Զարբենանալյանի կարծիքը հայ պոեզիայի մասին ընդհանրապես։ «Բանաստեղծությունը—ասում է մեծարգո Մխիթարյանը—քիչ առաջադիմություն և քիչ արդյունք ունեցող տարրը մըն է մեր հին մատենագրության մեջ Նարեկացի և Շնորհալի՝ որ երկու ընտրելագույն քերթողք են, և իրենց լեզվովն ու գըչով արժանավորք այդ անունը կրելու, քիչ հետևողք ունեցած են, ինչպես սակավորք էին նաև իրենց հառաջընթաց նախորդք։ Համանման աղքատության մը կհանդիպենք նաև մեր մատենագրության մեջ...»³

Զարբենանալյանի և ընդհանրապես Մխիթարյանների համար ու մասամբ նաև մեր արագիցիոն բանասիրության համար ոսկեդարյան պատմագրությունն է ու լեզուն այն գերագրույն արժեքները, որ կարողացել է ստեղծել հայ ժողովուրդը հոգեոր

¹ Անդ, 1944, № 12, էջ 65.

² Անդ, 1944, № 10—11, էջ 70.

³ «Պատմություն հայերեն գպրության», Բ. մաս, էջ 234։

կուլտուրայի ասպարիզում իր բազմադարյան գոյության ընթացքում: Բըյուսովը շուր տվեց այդ դրությունը՝ նա չժխտեց, իհարկե, ոսկեղարը, նրա զրականությունն ու լեզուն, որոնց մեծարելով հայ բանասիրությունը ի նկատի ուներ ոչ այնքան համաշխարհային հեռանկարներ, որքան ազգային, հայկական: Նա ցույց տվեց միայն, որ ուկեդարի հետ միասին ու դրա կողքին կա մի այլ արժեք ևս՝ անտեսված ու ենթակա մինչ այդ սոսկ հավաքման և բանասիրական սառն ուսումնասիրությունների: այդ արժեքն է միջնադարյան հայ պոեզիան: Բըյուսովի հայտաբերած անհուն հարստություններ պարունակում մի գանձարաններ, որ ինքնավտահություն և հպարտանք ներշնչելով իր տիրոջը, հասրավորություն էր տալիս նրան աշխարհիս ամենակուլտուրական ու մեծ ժողովուրդների հետ միասին հավասար իրավունքներով բազմելու: միհնույն սեղանի շուրջը իր սեփական արժանիքները ճանաչեցնելու մեջ է, այդպիսով, Բըյուսովի մեծառայությունը հայ ժողովրդին:

7

Այս վիճակումն էր հայ հին զրականության պատմությունը. իրեն գիտություն 20-րդ դարի առաջին տասնամյակներում թէ ընդհանրապես և թե առանձին խնդիրների ու հողինակների նկատմամբ: Յոթանասունից ավելի տարվա ընթացքում, նազարյանի առաջին զրքից մինչև Բըյուսովի հոդվածը տեղի էր ունեցել մեծ փոփոխություն, զարգացում: Գրականության պատմությունը հարստացել էր փաստերով շնորհիվ հայ բանասիրների տքնաջան ու մանրակրկիտ ուսումնասիրությունների: Ընդարձակվել էր մտահորիզոնը: 60-ական թվականների վերելքը և 1905 թ. ազատաբար շունչը այս կամ այն չափով դրոշմվել էին վերև քննարկված հետազոտությունների վրա:

Պարզելու համար, թե որոնք են Մանուկ Աբեղյանի ծառայությունները հայ հին զրականության պատմության հետադա ուսումնասիրության ասպարիզում, անհրաժեշտ է նաև և առաջ համառոտ տեղեկություն տալ այն մասին, թե ինչ աղխատություններ ունի Աբեղյանն այս ուղղությամբ:

Ինչպես երկում է Աբեղյանի «Հայոց հին զրականության»

պատմության» առաջին հատորի առաջաբանից, հեղինակը այս գիտագիտականայով սկսել է պարապել 90-ական թվականների վերջին Հայտնի է, որ 1898—99 թվերին նա արդեն ուներ հայ հին գրականության մասին Դևորդյան ճեմարանում կարդացած իր գասախոսությունների սեազրությունները¹

1908—1909 թ. թ. «Արարատ» ամսագրի համարներում Արեգյանը հրապարակեց իր բազմահմուտ ու սպասիչ հոգվածաշարը՝ «Ուրվագծեր 19-րդ դարու հայոց գրականության պատմությունից» վերտառությամբ, որ ընդգրկում էր նշված դարի առաջին տասնամյակների գրաբար գրականության տեսությունը:

1916 թ. «Ազգագրական հանդիսաց»-ում լույս տեսավ Արեգյանի փայլուն հետազոտությունը Գրիգոր Նարեկացու մասին: Մի տարի անց հրապարակվեց նրա «Հայոց հին բանաստեղծությունը» վերնագիրը կրող գրքույկը, ուր նա թերեւս առաջին անգամ դնում է հայկական վերածնության խնդիրը:

1923 թ. Երեանի ժողովրդական համալսարանը տպագրեց Արեգյանի «Համառատություն հայ ժողովրդական վեպի և հին գրականության պատմության» դասընթացը: Ապակետիպ այդ դասընթացից ընդլայն քաղվածքների մի հանրագումար է ներկայացնում իրենից արդեն Արեգյանի «Վերածնությունը հայոց հին գրականության մեջ» հայտնի հոգվածը, տպված ՍՍՌՄ Գիտ. Ակադեմիայի Հայկական ֆիլիալի «Տեղեկագրի» 1941 թ. 5—6-րդ համարում:

Վերջապես, մի կողմ թողնելով՝ Արեգյանի ուսումնասիրությունը գուսանական երգերի մասին, իրքև գերազանցորեն ժողովրդական բանահյուսության վերաբերող նյութ, 1944 թ. լույս տեսավ նրա «Հայոց հին գրականության պատմության» մոնումենտալ գործի առաջին հատորը, իսկ 1946 թ.—երկրորդ հատորը:

Երկու այս հատորները մեծ դիտնականի քառասուն և հինգ տարվա ընթացքում հայ հին գրականության պատմության շուրջը կատարած պրատումների սինթեզն են: Խոշորագույն երկույթ է առ սովորական հայագիտության ասպարիզում: Արեգյանի

¹ Տե՛ս 1) Մ. Արելյան—«Ուրվագծեր 19-րդ դարու հայոց գրականության պատմությունից», «Արարատ», 1908, էջ 890 (ծանոթություն) և 2) Մ. Արեգյան—«Վերածնությունը հայոց հին գրականության մեջ», ՍՍՌՄ Գիտ. Ակադեմիայի Հայկական ֆիլիալի Տեղեկագրի, 1941, № 5—6, էջ 85:

«Հայոց հին գրականության պատմությունը» իրեն նախորդող
փորձերին վերաբերում է այնպես, ինչպես «Հայկագնեան բառա-
րանը» իրենից առաջ լույս տեսած բառզբերին:

8

Ինչպես վերևում ասացինք, Գաթը ճանալյա-
նը և Զամինյանը գրականություն, մատենագրություն կամ
դպրություն ասելով հուսկանում էին տվյալ ժողովրդի կամ աղ-
գության մտավոր կյանքի արտադրանքն իր ամբողջությամբ,
իր բոլոր ճյուղերով և ենթաճյուղերով։ Այդ իսկ պատճառով
վերջին երկուսի գրականության պատմության գրքերում տեղ
են գրավում ոչ միայն գեղարվեստական երկերը, այլև գիտու-
թյունը իր բաժիններով հանդերձ, բժշկությունը, դավանաբառ-
նությունը և այլն, այն տարբերությամբ, որ Զամինյանի մոտ
բանաստեղծության վրա մի փոքր ավելի է ուշադրություն դարձ-
ված, քան Զարբհանալյանի մոտ։ Հին պատմաբաններից միայն
Պալասանյանն էր, որ գրականության պատմության առարկա
ընդունում էր բանաստեղծությունը և պիրճախոսությունը, որոնց
մեջ ամենից թանձրացած էր արտահայտվում աղգային կյանքը
ու բնավորությունը։ Բայց, ցավոք, մեզ հայտնի չէ, թե ինչպես
պիտի կիրառեր իր տեսակետը Պալասանյանը, որովհետեւ նա
գրեց իր գրականության պատմության միայն ասածին զլուխը,
ժողովրդական բանահյուսությունը։

Այս խնդիրը Արեգյանի մոտ շատ որոշակի է գրված։ «Հին
գրվածքներից ինչը իրու հատկակի գրական երկ՝ պետք է նյութ
դառնա գրա-պատմական ուսումնակրության»—հարց է տալիս
Արեգյանը ու անմիջապես պատասխանում։ «Անշուշտ գեղարվես-
տական երկերը»։

Կոնկրետ մտածողության տեր գիտնական լինելով ու երե-
վույթների հանդեպ ունենալով պատմական մոտեցում, Արեգյա-
նը մանրամասնում է իր այդ լնդհանուր պատասխանը առանձին
գարաշրջանների նկատմամբ։ «Նոր գրականության պատմության
համար այդ պարզ է—ասում է նա—գրամա, վեպ, քնարերգու-
թյուն իրենց ենթատեսակներով։ Ինչ վերաբերում է հին գրա-
կանության, ապա «բանն այն է, շարունակում է Արեգյանը, որ

հնում մեզնում չի եղել ոչ դրամա, ոչ վեպ այժմյան իմաստով, ոչ էլ ընդհանրապես այնպիսի մի գեղարվեստական գրականություն, որ ոչ-գեղարվեստական տեսակետներից անջատ և անկախ լիներ իրբեք մի ինքնուրույն բնագավառու Այնտեղ բանաստեղծականը և ոչ-բանաստեղծականը կազմում են մի շտարբերակված միություն»¹

«Հայոց հին գրականության պատմության» առաջին հատորի առաջարանում, որտեղից արված են այս մեջբերությունը, Արեգյանը սահմանում է հին գրականության այլ և այլ ժանրերի առնչվածության չափը բանաստեղծության ու, հիմնականում, համաձայն այդ սկզբունքների մշակում թե այս առաջին և թե երկրորդ հատորի գրական-պատմական նյութը»:

Հստ այդք, առաջին տեղը առաջին հատորում, օրինակ, գրավում են—իրեն մաքուր գեղարվեստական ժանրեր—քնարերգությունը՝ Կոմիտաս կաթողիկոսից սկսած մինչև Գրիգոր Նաբեկացին ու ժողովրդական բանահյուսությունը՝ Հայկից սկսած մինչև Պարսից ու Տարոնի պատերազմները, թեև առաջինի գեղարվեստականությունը—անգամ Նարեկացու մոտ—հաճախ թուլանում է մեկնաբանության և դավանաբանության ազդեցության տակ, իսկ երկրորդը մեզ անմիջապես չի հասել, այլ պատմիչների միջոցով։

Քնարերգությունից ու ժողովրդական բանահյուսությունից հետո հատուկ ուշագրություն է գարձվում պատմագիրների վրա։ «Երանց գրվածքները—ասում է Արեգյանը—երրեմն խառնուրդ են բանաստեղծականի և պլողայիկի. միևնույն երկի մեջ գրական և արտագրական տարրերը գտնվում են փոխեփոխ իրար կողքիւ Դրանց մեջ կան գեղեցիկ հատվածներ, մասնավանդ երր պատմագիրները գրի առել կամ քերթողաբար մշակել են ավանդական

1 Մ. Արեգյան—«Հայոց հին գրականության պատմություն», գիրք առաջին, էջ 2, Երևան, 1944, ՀՍՍՌ Գիտ. Ակադեմիայի հրատարակություն, Գրականության Ինստիտուտ։ Հարկ է գիտել, որ Արեգյանի հայ հին գրականության այս բնութագրումը գեղարվանցորեն ընդգրկում է նրա հնագույն շրջանը։ Ինչ վերաբերում է միջնադարին, ապա կյանքը այդ ժամանակ հոխացել էր ու բազմազն դարձել և դրա հետ միասին գրավոր խոսքը տարբերակվել էր, առաջ էին հեկել նոր ժանրեր, գրական նոր տեսակներ և ենթատեսակներ Արեգյանի մոտ այդպես է ստացվել այն պատճառով, որ նա, այդ տղերը գրելիս, եղել է հիմնականում իր երկի առաջին հատորի նյութից։

վիպական պատումներն ու դրույցները կամ մանրամասնորին պատճել են որևէ իրողություն, կամ անկեղծ քնարական գեղուժներով նկարագրել են իրական կյանքի եղելությունները Հասկանալի է, որ պատմադիրները, որոնք պատկառելի քանակով են մեր գրականության մեջ, այդ կողմերով մասամբ մտնում են գեղարվեստական զբականության մեջ»:¹

Արեղյանի նախորդները գրականության պատմություն շարադրելիս պատմիչներին քննարկել են նրանց կարևորության տիսակետից պատմագրության համար: Արեղյանը, իհարկե, չեանտեսում այդ հանգամանքը, բայց միացնում է գրան զեղարվեստականության խնդիրը: Ու միանգամայն բնական է, որ մինչդեռ Խորհնացին, Եղիշեն և Փարպեցին, առաջին հատորի ամենափայլուն էջերից մեկը հանդիսանալով, զբավում են այնտեղ յուրաքանչյուրը մի քանի տասնյակ երես, Թովմա Արծրունուն հատկացված է ընդգամենը չորս, իսկ Մովսես Կաղանկատվացուն՝ մեկ ու կես երես:

Արեղյանի ուշագրությունից, վերջապես, չեն վրիպում վկայաբանությունները, կրոնական գրականության շատ ցայտուն ու տարածված այդ ճյուղը, որ նրա կարծիքով «Երկրորդ կարգի» գեղարվեստական երկեր են, ինչպես նա զբաղվում է նաև պերճախոսությամբ և ճուռերով, որոնք, նրա բնութագրումով, «Երկրորդ գրաբար» են պատկանում գեղեցիկ գրականությանը:

Սակայն մաքուր գեղարվեստական ու գեղարվեստականության այս կամ այն չափով առնչվող երկերով չի սպառվում Արեղյանի գրականության պատմությունը: Հարցն այն է, որ պատմական պրոցեսի միասնականության սկզբունքից ենսելով, Արեղյանը չէր կարող հայոց հին գրականության զարգացումը մեկուսացած դիտել: Զուտ գրական երկույթների հետ միասին նա անհրաժեշտորեն պիտի ընդգրկեր նաև այս կամ այն չափով կուլտուրայի այլ բնագավառները:

Այս խնդրի մասին ինքը Արեղյանը ասում է հետեւյալը: «Մի կողմն են մնում բազմաթիվ մաքուր պրոցայիկ գրվածքներ, ինչպես են՝ ժամանակագրություններ, կենսագրություններ, կառուններ, թղթեր, դավանաբանական ճառեր, մեկնություններ»:

¹ Անդ, էջ 3:

մաթեմատիկական ու տիեզերագրական երկեր և այլն, հաջորդ շընառում նաև բժշկական, իրավաբանական և այլ աշխատություններ։ Այս ընդարձակ գծականությունից առնված է Անանիա Շիրակացու գործը, որ Եղնիկ Կողբացու գեղեցիկ հականառության հետ միասին կազմել են մեր միջնադարյան աշխարհայինցության հիմքը։ Մնացածների մասին խոսված է այնքանմիայն, որքան զրանք նշանակություն են ունեցել հայկական ընդհանուր կուլտուրայի մեջ, որի գարգացումից մեկուսացած չէ գրականության պլրոցեսը»¹

Ենելով այս սկզբունքից, Արեգյանը երկրորդ հատորում ընդարձակ տեղ է հատկացնում, օրինակ, Գրիգոր Մագիստրոսի թղթերին կամ էլ Մխիթար Գոշի «Դատաստանագրքին», բայց բոլորովին չի քննարկում, դիցուք, —ինչպիսի այդ անում էին իր նախորդները, —հայ բժշկական կուլտուրայի գրավոր հուշարձանները, որքան էլ նրանք ինքնին կարենոր լինեին։ Ունենալով ճիշտ մոտեցում, Արեգյանը կարողանում էր որոշել կուլտուրայի տվյալ մարզի, կուլտուրական տվյալ հուշարձանի առնչության չափը գրականության հետ ու ըստ այդմ էլ ուշադրություն հատկացնել նրան, միշտ ուղեցույց ունենալով իրականությունը, իրականության այլազան արտահայտումների մեջ դրսեորվող միասնական աշխարհայեցությունը։

Այդպիսով, Արեգյանի «Հայոց հին գրականության պատմության» քննարկման նյութ են հանդիսանում նախ և առաջ մաքուր գեղարվեստական երկերը, ապա այն գործերը, որոնք այս կամ այն չափով առնչված են գեղեցիկ գրականությանը, վերջապես, գրավոր կուլտուրայի այն ոչ-գեղարվեստական, «ժաքուր պրոպայշիկ» գրվածքները, որոնք ընդհանուր կուլտուրական գարգացման կարենոր օղակներն են կազմում։

Սակայն սրանով չի սպառվում Մանուկ Արեգյանի գրականության պատմության բովանդակությունը՝

Իր գործի առաջաբանի մեջ Արեգյանը դանդատվում է, որը մինչև այժմ լույս չտեսավ հայոց պատմության մի գիտական ուսումնասիրություն... Այդպիսի մի գործը պիտի օգներ գրականութեատին իր աշխատանքը կատարելիս և երբեմն հեշտացներ

1 Անդ, էջ 4.

հայտաբերել տվյալ դարաշրջանի այն քաղաքական ու սոցիալական իրականությունը, որի անդրադարձումն են եղել այս կամ այն գրական հիշատակությունները: Եվ քանի որ չկա այդպիսի պատմություն, գրականագետն ինքը պետք է մտնի պատմական խնդիրների պարզաբանման մեջ...»¹

Մյուս կողմից, շարունակում է Աբեղյանը, «պետք է ասել, որ գրականության պատմության համար առաջուց պիտի որոշված լինեին բանասիրական խնդիրները... Առանց գրանց հնարավոր չէ ամեն մի հեղինակ ու երկ դնել իր տեղում իրեն տվյալ ժամանակաշրջանի արտահայտություն և գրականության զարգացման պրոցեսն անսխալ կապել հայոց պատմության ընդհանուր ընթացքի հետա: Քանի որ նման բանասիրական հետազոտություններ ևս բավարար չափով չեն կատարված, գրականագետը պատմություն գրելիս ստիպված է կանգ առնել այդ խընդիրների վրա, ինչպես նաև «բանասիրական քննադատության վրա և շատ անգամ մտնելու հակածառության մեջ ընդդեմ ուրիշների կարծիքների»:²

Եվ իսկապես Մանուկ Աբեղյանի «Պատմության» թե՛ երկրորդ և թե՛ մանավանդ առաջին հատորը հարուստ են այդպիսի պատմական և բանասիրական էքսկուրսներով, որոնց մի մասը զետեղված է «Պատմության» բուն տեքստում, մյուս մասը՝ աշխատությունը չձանրաբեռնելու գիտավորությամբ՝ կցված է նրան իրեն հավելվածներ: Այդ հավելվածները Աբեղյանի երկի օրգանական մասն են հանդիսանում ու նրանցից յուրաքանչյուրը փոքրիկ փայլուն պատմաբանասիրական մի մոնոգրաֆիա է, որտեղ հղուակացությունները հիմնավորված են սրամիւ արգումենտացիայով, նյութի սպառիչ իմացությամբ, աղբյուրների հիմնավոր բաղդատությամբ: Այս հավելվածների մեջ է գերազանցորեն, որ Աբեղյանը հայտաբերում է պոլեմիկական հուժկուաղանդ ու կիրք՝ իր հղոր բանականության թրթուրների տակ առնելով անողոքաբար այն ամենը, ինչ արգելակում է տիրանալու ճշգրտությանը:

Իր հավելվածներում Մանուկ Աբեղյանը կանգ է առնում

¹ Անդ, էջ 1:

² Անդ, էջ 2:

Մաշտոցի կատարած գործի կոնկրետ բովանդակության հայտաբերման վրա Եղեսիայում և Սամոսատում, պարզում է Փափառոս Բուլղանդի «Պատմության» առաջին և երկրորդ դպրությունների խնդիրը, ըստ որում այդ գպրությունների մեջ պարփակված պետք է լիներ հայ ժողովրդի նախնական պատմությունը, ձատում է Տիմոթեոս Կուղի «Հակաճառութեան» թարգմանելու ժամանակը, այն է՝ 480—84 թվականները, որ կարենոր նշանակություն ունի հունաբան գպրոցի պատմության ու քաղկեդոնականության դեմ մղած պայքարի տեսակետներից, վերլուծում է «Պարսից պատերազմ» վեպի պատմականության խնդիրը, Խորենացու Թղթի վավերականության խնդիրը, երկրորդ հատորում մանրամասն կանգ է առնում Հովհաննես Սարկավագի ու Ֆրիկի կենսագրությունների մութ կետերի պարզաբանման վրա և այլն, և այլն:

Արդեն ոչ թե հավելվածներում, այլ իր «Պատմության» բուն տեքստում, Մանուկ Արեգյանը մանրամասն քննարկում է Խորենացու «Պատմության» գրության ժամանակի՝ այնքան վեճեցիր հարուցող խնդիրը ու մանրամասն վերլուծելով նրա «քննափետողների» թեր ու դեմ արտահայտած կարծիքները, գալիս այն եղրակացության, որ «այդ բոլոր փոխադարձ հերքումներից, ժխտումներից ու բացասումներից հետո՝ մեր պատմահայր ու քերթողահայր Մ. Խորենացուն էլ ուրիշ բան չի մնում անել բայց եթե ետ քաշվել ու նստել իր հին ու բնական տեղում՝ 5-ըդ դարում»:¹

Առհասարակ նկատելի է, որ Մանուկ Արեգյանը թերահավատորեն էր վերաբերվում հայ գասական պատմագիրներին, իրենց ընդունված ժամանակաշրջանից տեղահան անելու խնդրին, համարելով այդ բանասիրական ավելորդ նախանձախնդրություն։ Խոսելով Եղիշեի ժամանակի մասին, Արեգյանը ասում է. «Երբ բանասերները 19-րդ դարի վերջին տասնամյակից սկսեցին ելեւել հին հայ գրողներին իրենց ժամանակից ու տեղից խախտելու համար, Եղիշեն ևս ենթարկվեց հարձակումների»:² «Ելեւել այս բառը արդեն շատ բան է ասում Արեգյանի վերաբերմունքի մասին։

1 Անդ, էջ 258.

2 Անդ, էջ 294։

Մեղ հայտնի է, որ հայ հին գրականության պատմաբանները, բացառությամբ Զամինյանի, տեղահան չէին անում հայ պատմիչներին իրենց ընդունված ժամանակից: Այն բանասերները, որոնք կանդնած էին տվանդական տեսակիտի վրա, Զարբեամնալյանը անվանում է «պահպանողական»: Մանուկ Արեգյանը, այդ իմաստով, հետեղական «պահպանողական» էր:

Արդ. ի՞նչն էր ստիպում Արեգյանին «պահպանողական» լինել: Գուցե՞ն ավանդապահությունը, այն նկատառումը, թե չի կարելի ձեռք տալ գարերով սրբագործված լուսալսակ անուններին: Կամ գուցե՞ն ոռմանտիկական երկյուղած վերաբերմունքը դեպի անցյալը: Իհարկե, ոչ այս, ոչ էլ այն: Արեգյանը շատ էր հեռու թե ավանդապահությունից և թե, առավել ևս, ոռմանտիկայից: Մանուկ Արեգյանին ստիպում էր համառել իր տեսակետի վրա սիմիայն նրա ուղղագատությունը, միմիայն նրա խորին համոզմունքը այն բանի մեջ, որ չկա, զոյություն չունի մի այնպիսի փաստ, որը հնարավորություն տար մեղ հիմնավորելու պատմիչներին իրենց ժամանակից տեղաշարժելու անհրաժեշտությունը: Չե՛ որ միևնույն Արեգյանը, զինված փաստերի ու երկաթե զատողությունների մի հսկա արսենալով, փարատեց Քուչակի շուրջը ստեղծված լեզենդան: Ապա ինչու նա պիտի խնայեր Խորենացուն կամ Եղիշեին, եթե, իսկապես, ճշմարտացի համարեր նրանց 5-րդ դարի մատենագիր չլինելու հանգամանքը:

Կա մի այլ հանգամանք ևս Զարբեանալյանը, ի նկատի ունենալով հայ գասական պատմիչների գեմ բարձրացած ուլտրաֆիզիկան ալիքը, ասում է. «ու երբ մեկ կողմանէ քաղաքականաբար կմտածվեր անհետ ընել հայերը իրենց հայրենյաց և բոլոր աշխարհիս երեսնեն, մատենագրությունն ալ քիչ հալածանք չկրեց»:¹ Գուցե՞ն Զարբեանալյանը շատ սուր է գնում խնդիրը, բայց որ Խորենացու կամ Եղիշեի բացասումը, նրանց կեղծ համարելը, նրանց վարկարեկումը, նրանց «քննափետումը» կաղված է հայ կուլտուրայի նվաստացման, հայ գրականության արժեքի նվաստացման տեսնենցի հետ—մենք գիտենք, որ այս խնդրում Զարբեանալյանը ևս մեղքեր ունի—դա, իհարկե, ակնհայտ փաստ է: Բայց փաստ է և այն, որ Արեգյանը ոչ միայն

1 Զարբեանալյան, Յ-րդ հրատ., 1897, էջ ՓԳ:

ոչ մի կապ չունի նման տեսդենցների հետ, այլև նրա գրական-դիտական ամքողջ գործունեությունը — ինչպես կտեսնենք — մի-անդամայն հակառակ թեղն է ապացուցում:

Այդպիսով, պատմագրական և բանասիրական լրացումներով քոլորվում է Արեգյանի հատորների բովանդակությունը: Բարդ է այդ բովանդակությունը, բայց ամեն ինչ կարգավորված է այնտեղ, ամեն ինչ այնտեղ տեղ է գրափում անհրաժեշտության հետեանքով: Արեգյանը ճշգրիտ պատկերացում ուներ հայ գրա-կանության պատմության առարկայի մասին, նրա ստհմանների մասին — մի բան, որ համարյա բացակայում էր նրա նախորդնե-րի մոտ:

9

Անցնենք պերիոդացիայի խնդիրներին: Հայ գրականու-թյան իր՝ մեզ հայտնի պերիոդիցացիայի մասին Գաթըրձյանն ասում է. «... նշանակված ժամանակներուն մեջ ելած գրվածնե-րուն ունեցած ընդհանուր նման հատկություններն՝ որոշման ու-րաժանաւում հիմն ու պատճառ տված են»:¹ Այդպիսով, Գաթըրձյա-նը ելնում է գրական հուշարձանների ընդհանրությունից:

Մանուկ Արեգյանն էլ հայ գրականության պատմության պերիոդացիան մշակելիս ելնում է ընդհանրությունից, բայց արդեն էպոխայի, դարաշրջանի ընդհանրությունից: «Պերիոդի-ցիան կատարված է ոչ թե ձևականորեն, — ասում է Արեգյանը, — ... այլ ըստ բովանդակության, նայելով գրականության մեջ արտահայտված պատմական իրականությանը»:²

Այդպիսով, մեկը ելնում է իրականությունից, մյուսը այդ իրականության արտացոլումից, գրական երկից:

Ենելով իր արծարծած սկզբունքից, Արեգյանը ամբողջ հայ հին գրականության պատմությունը բաժանում է չորս շրջանի:

Առաջին շրջանն ընդգրկում է հայոց պատմական իրակա-նությունը հնագույն ժամանակներից մինչև Յ-րդ դարը, զա «նախ-նական առասպելա-պատմական բանահյուսության» շրջանն է:³

1 Գաթըրձյան, էջ 4:

2 Արելյան, Ա. հասոր, էջ 4:

3 Անդ, էջ 4: «Վերածնությունը հայոց հին գրականության մեջ» հոդվա-

ժում Արեգյանը առաջին շրջանը հասցնում է մինչև 5-րդ դարը — «Տեղեկագիր» ԾՈՒՄ Գիտ. Ակադ. Հայկ. Ֆիլիպալիս, 1941, № 5—6, էջ 80:

Երկրորդ շրջանը անդրապատկերում է հայկական պատմական իրականությունը՝ սկսած 3-րդ դարից մինչև 11-րդ դարը՝ մինչև Փրիգոր Նարեկացին ներառյալ՝ դա «եկեղեցաքաղաքական մաքառման գրականությունն» է:¹

Երրորդ շրջանն ընդգրկում է 11—17-րդ դարերը. դա գրականության աշխարհականացման դարերն են, «արդյունք հայկական ինքնուրույն վերածնության՝ քաղաքների աճման հետևանքով, ձգտում զեպի աշխարհիկ կյանքն ու բնությունը, մերժում կերատմիստիկական զաղափարախոսության, գրական նոր թեմաներ ու նոր տեսակներ, ժողովրդական լեզվով»:²

Վերջապես, չորրորդ շրջանը արտացոլում է հայ պատմական իրականությունը սկսած 17-րդ դարից մինչև 19-րդ դարի առաջին երրորդ ներառյալ—«եկեղեցական գրականության վերածնություն նոր կրոնական շարժման հետևանքով 14—16-րդ դարերի անկումից հետո. Նոր գրաբար և աշխարհիկ գրականություններ, տարբեր հոսանքներով և ազգեցություններով»:³ «Հայոց հին զրականության պատմության» 2-րդ հատորի ձեռագրում Արեղյանը նույն այդ շրջանը համառոտ բնութագրում է հետեւյալ կերպ. «գրականության նորոգումը 17—19-րդ դարերում» (19-րդ տեսարակ, 1059-րդ թերթի հետեւյալ երեսը):⁴

Ի՞նչ բովանդակություն է զնում յուրաքանչյուր այս շրջանի մեջ Մանուկ Արեղյանը:

Առաջին, «նախնական առասպեկտապատմական բանահյուսության» շրջանը փաստորեն այն շրջանն է, «որով սպառվում են թե Գաթըրճյանի և թե Պալասանյանի մեզ հայտնի աշխատությունները. Երկու այդ բանասերներից, ինչպես նաև Մկրտիչի մինից, Արեղյանը ժառանգել է սեր ու հետաքրքրություն. գեղագիտության մեջ պատգամը—ու խորացնելով այն՝ ստեղծել մի մեծ, լայնածավալ գիտական հաստիպելինա:

¹ Առաջին և երկրորդ շրջանները պարփակված են Մանուկ Արեղյանի «Հայոց հին զրականության պատմության» առաջին հատորում:

² Անդ, էջ 86.

³ Անդ, էջ 86.

⁴ Երրորդ և չորրորդ շրջանները պարփակված են Արեղյանի աշխատության երկրորդ հատորում:

Այս ասելով, մենք, անկախ մեր կամքից, դուքս հնք գալիս հենց այդ առաջին շրջանի ահմաններից, որովհետև հիշած գիւղիպինան չէ սպառվում միայն Արեղյանի «Հայ ժողովրդական առասպելները» Մովսես Խորենացու հայոց պատմության մեջ¹ սովոր աշխատանքով, որտեղ քննարկվում են Հայկին, Արային, Արտաշեսին և ուրիշներին վերաբերող դյուցազներգությունները, այսինքն այն, ինչ այդ առաջին շրջանի անմիջական առարկան է հանդիսանում, այլ այդ զիսցիպինան ընդգրկում է իր մեջ առաջին հերթին հայկական էպոսը, «Սասնա ծռերը», որով Արեղյանը սկսել է հատաքրքրվել դեռ անցյալ դարի 80-ական թվականներին և որի ուսումնասիրության և ժողովրդականացման գործում նա հակայական ծառայություն ունի:

Այդ զիսցիպինայի մեջ է մտնում Արեղյանի ուսումնասիրությունը հայ գուսանական երգերի մասին,² որով Արեղյանը, ճիշտ է, փարատեց մի զեղեցիկ լեզենդա Քուչակ Նահապետի մասին, բայց գրա փոխարեն մի ամբողջ ժողովուրդ դարձրեց այդ գողարիկ, նրբակերտ, կյանքի ուրախությունը երգող բանաստեղծությունների հեղինակ։ Վերջապես, այդ զիսցիպինայի մեջ հն մտնում Արեղյանի մի շարք այլ ուսումնասիրությունները։³

Սակայն մենք գուրս եկանք ոչ մեյս Արեղյանի պերիոդիզայի առաջին, «Նախնական առասպելաւատմական» բանահյուսությունը կոչվող շրջանի սահմաններից, այլև մեր թեմայի, թեսակուելով «Արեղյանը և հայ ժողովրդական բանահյուսությունը» թեմայի սահմանները։ Կատարելով այդ խախտումը ու մեծարելով Արեղյանին, մենք չենք կարող միաժամանակ կանգչառնել—թեկուղ համառոտ կերպով—Արեղյանի հայացքների մեջ նկատվող ակնբախ մի հակասության վրա։

Այդ հակասությունն այն է, որ Արեղյանը, մի կողմից իրավացիորեն պնդելով, որ հայ հին վիպական-ալանդական բանա-

1 Մանուկ Արեղյան—Հայ ժողովրդական առասպելները Մ. Խորենացու պատմության մեջ, Վաղարշապատ, 1901։

2 «ՀՍԽՀ Պետական Համալսարանի գիտական տեղեկագիր», 1927—1930 թ., ԱԱ 2—3, 4, 6 և «Դուսանական ժողովրդական տաղեր», Երևան 1940, ՍՍՌՄ Գիտ. Ակ. Հայկ. Գիլբալի հրատարակություն (Դրականության և լեզվի հնատիտոււա)։

3 Մ. Արեղյան—«Ժողովրդական խաղիկներ», Երևան, 1940, և այլն։

հյուսությունը անկախության, երկրի, աշխարհի, հայրենիքի պաշտպանության մարմավորում է,¹ հայտարարելով, որ այն ժմեծ մասամբ գյուղացու ստեղծագործություն է», «ցողացնում է իր մեջ բուն ժողովրդի կյանքը»;² մյուս կողմից նա միենույն ավանդական բանահյուսությունը, միենույն հայկական վեպը որակում է իրեն «ազնվական դասի արտահայտություն», «մասամբ նրա պատվերով ստեղծված», «նրա շահերի և գաղափարների արտահայտություն»,³ որով և իջեցնում է—միանգամայն հայկառակ գիտնական-մատածողի իր ընդհանուր նկարագրին—այդ մեծ ստեղծագործությունների համաժողովրդական և աղգային-պատմական նշանակությունը:

Ի պատիվ Արեգյանի հարկ է նշել, որ նրա տատանումների մեջ հայ վիպական բանահյուսության ծագումն ու բովանդակությունը վերագրելու ազնվականությանը թե ժողովրդին՝ նկատվում է ակնհայտ հակում դեպի խնդրի լուծման երկրորդ վարիանտը ու մենք մեր ասածը վերջացնում ենք այն խոսքով, որով Արեգյանը վերջացրել է իր «Հայ ժողովրդական վեպը» ուսումնասիրությունը ու ապա, 30—35 տարի անց կրկնել «Մատենագրություն «Սասունցի Դավիթ» հայ ժողովրդական վեպի մասին» հոդվածում, տպված Սասունցի Դավիթի 1000-ամյակին. նվիրած ժողովածուում. «սիրելի պիտի լինի մեզ համար մեր վեպը, որ մերն է, մեր սեփականը, մեր ժողովրդի դարավոր պատկերը... Ուսումնասիրենք այն բազմակողմանի կերպով, և մենք կգտնենք նրա մեջ մեր ժողովրդի հոգու խորքերը»;⁴

Այժմ մենք կարող ենք պատասխանել այն հարցին, որ տրվեց վերեւ. որն է Արեգյանի պերիոդիզացիայի առաջին, նախնական առասպելա-պատմական բանահյուսության շրջանի բովանդակությունը: Այդ բովանդակությունն է հերոիկան և նրա հետ կապված կյանքի ուրախության գովերգումը:

¹ Մ. Արեգյան, Ա. հատոր, էջ 213, 223 և այլն:

² Անդ, էջ 115:

³ Անդ, էջ 41, 43, 46, 54, 58 և այլն.

⁴ «Սասունցի Դավիթ. հորելյանական ժողովածու, նվիրված էպոսի 1000-ամյակին», հրատ. ՍՍՌՄ Գիտ. Ակ. Հայկ. Փելիքալի, Երևան, 1939, էջ 59.

Արեղյանի պերիոդիզացիայի երկրորդ շրջանի «Եկեղեցաքաղաքական մաքառման գրականություն» վերնագիրն ինքնին արդեն խոսում է իր բովանդակության մասին: Այդ շրջանի գրականությունը զերազանցորեն մաքառման գրականություն է, տարերկրյա բանապետությունների գեմ հայ ժողովրդի մղած ազատագրական գարավոր ու անդուլ մաքառումներն ու քաղաքական պայքարն արտացոլող մի գրականություն:

Եթե մենք վերհիշենք, թե ինչ մտայնություն էր տիրում այս ասպարիզում Արեղյանից առաջ, ապա կհամոզվենք, թե որքան համարձակ էր Արեղյանի՝ 4—10-րդ դարերի հայ գրականության էության մասին մշակած այս կոնցեպցիան: Զամինյանի կարծիքով, ամբողջ հայ գրականությունը համակված էր կրոնական ողով, իսկ նշված ժամանակաշրջանը՝ տուավելապես: Կրոնական էին, ըստ Զամինյանի, ոչ միայն հատկապես կրոնական, դավանաբանական, եկեղեցական-աստվածաբանական երկերը, այլև ինքը պատմագրությունը, որովհետև այն էլ վերջիվերջո ճառում էր եկեղեցու ու քրիստոնեության հավիտենական փառքի մասին: Արեղյանը զարգացրեց միանգամայն հակառակ տեսակետը, դիտելով ոչ միայն պատմագրության, այլև ամենախիստ կրոնական գրվածքների մեջ քաղաքական տենդենցիան ու միտում, հետեւապես և որևէ աշխարհիկ թեզի հաստատում:

Եվ իսկապես. Մովսես Խորհնացու «Պատմությունը—տառում է Արեղյանը—ծագած է դարի պահանջից, այն քաղաքական գրությունից, որով առաջ էր եկել 5-րդ դարի մտավոր շարժումը, որ և ավելի վատացած կերպով իշխում էր գեռ այդ դարի 2-րդ կեսին: Քաղաքական անկումն առաջացրել էր բնականաբար վհատություն, միաժամանակ և ձգտում նորից հին անկախությունը ձեռք բերելու: Պետք էր այս գաղափարը զարգացնել, հուսադրել Անա հիմնական ինքիրը, որ զբաղեցնում էր հասկացող մտքերին: Դա ազգային շահերի պաշտպանությունն էր, Դրա համար հարկավոր էր անցյալից ստեղծել օրինակելի քաղաքական տիպարներ, գովերգել անցյալի հերոսներին: Այդ նպատակից էին թելադրված Փ. Բուզանդի, մասամբ և Ազաթան-նպատակից

գեղոսի հերոսական պատկերները ժողովրդական բանահյուսության հիման վրա:

Ոչ թե Բազրատունիներին հռչակելու, այլ այս քաղաքական միտումն է, հուսաղբությունը, ջերմ հայրենասիրությունը, որ սկզբից սինչև վերջն անց է կացրած Խորենացու Պատմության մեջ։ Սեր ծնեցնել դեպի հայրենիքը, սեր դեպի ազատություն, դեպի հայրենիքի բարզավաճումն արվեստներով, գիտությամբ, շինարարությամբ։ Այս նպատակին են ծառայում նրա մշակած կերպարները, և՝ Հայկը, և՝ Արամը, և՝ Տիգրանը, և՝ մյուսները։¹

Եղիշեի գրած պատմության նպատակը—ասում է Արեգյանը այդ պատմիչին հատկացված գլխում—ներշնչել ազատության, քաջության ոգին, տոգորել ներսությամբ, ընդհակառակն՝ ատելի դարձնել դավաճանությունը, բռնությունը։ «Նա չի կարողանում սառն, հանգիստ շարագրել կնվում է զրչով. շահագրգոված է իր պատմած դեպքերով, ինքը հուզվում է իր աղջի նեղյալ դրությամբ, ցավում է, տանջվում է զրա գիտությամբ, հիանում, հափշտակվում նրա հերոսների սիրագործություններով. բարկանում, ատում է իր ժողովրդի տառապանքների զրգիչներին, ոգենորվում և աշխատում է նույն զգացումները հարուցել ընթերցողի մեջ, որպիսզի նրանք էլ իր հետ գովեն կամ պարսավեն»։²

5-րդ և հետագա գարերի զրականությունը,—ասում է Արեգյանը մի այլ տեղ,—«ինքը մի զենք էր կուտուրական պայքարի ու մաքառման համար ընդդեմ պարսիկների, ապա հույների և արաբների։ Նույն նպատակին ծառայում էին իսկապես նաև թե՛ քրիստոնեական-կրոնական ոգու և զաղափարախոսության ծավալումը կյանքի մեջ և թե՛ մաքուր կրոնական զրվածքները, քանի որ սրանք էլ վերջին հաշվով մաքառելու միջոցներ էին ընդդեմ հեթանոսության—պարսիկների և արաբների, իսկ դավանաբանական երկերն՝ ընդդեմ հույնների»³ և այլն, և այլն։

Այդպիսով, ըստ Արեգյանի, սեր ամբողջ հին, մինչ վերածնության շրջանի զրականությունը—պատմությունը, կրոնական-դավանաբանական երկերը, հոգեոր երգերը—մաքառման, պայքարի զրականություն է՝ հանուն հայ ժողովրդի պետականա-

1 Արեգյան, Ա. հատոր, էջ 284, 285.

2 Անդ, էջ 303.

3 Անդ, էջ 84։

քաղաքական, հոգեոր-կուլտուրական անկախության և ինքնուշության:

Անգամ վկայաբանությունների, սրբերի վարքերի մեջ, որ երկնային առաքինությունների ու արքայության մասին պիտի ճառեին, Արեղյանի սուրբ դիտուղությունը պայքար է նկատում կամ աշխարհիկ որևէ դրույթի ապացուցում. Շուշանիկի վկայաբանությունը, օրինակ, ասում է Արեղյանը, «Էապես մի ընտանիան զրամա է, սրտաճմլիկ միանգամայն և սարսուալի նկարագիր այն գաֆանությունների, որոնց ենթակա են եղել թույլ և անօդնական կանայքն իրենց բռնակալ ամուսինների ձեռքին, որոնք կատաղում, գաղանանում էին նրա համար, որ իրենց կանայքը չէին լսում իրենց և անկախ էին մտածում, հաստատմալով իրենց համոզմունքին, իրենց իդեալին, Բայց դա միաժամանակ և զորեղ բողոք է այն ստրկական դառն վիճակի դեմ, որ կանայք ունեցել են նույնիսկ բարձր ազնվական տներում: Այս վկայաբանությունն իսկապես առաջին և գեղեցիկ վիպակն է կողմանը ապատագրման մասին հայոց գրականության մեջ»:¹

Անկասկած, որոշ չափով միակողմանի է Արեղյանի մաքառման այս կոնցեպցիան, հայ ժողովրդի ներքին սոցիալական հակասություններն անտեսող, բայց իր միտքը Արեղյանը հետեւագականորեն անց է կացնում մինչև վերջը, նա սպառում է տվյալ խնդիրը՝ տեղ հարթելով այլ խնդիրների առաջացման ու նրանց լուծման համար:

Ե՞րբ է կառուցվել Արեղյանի վիտակցության մեջ 5—10-րդ դարերի մեր հին գրականության ըստ էության ժաքառման գրականություն լինելու այս կոնցեպցիան: Դիմելով 1941 թվականի հոդվածին վերածնության մասին, մենք կարգում ենք պերիոդիկայի բաժնում. «5—11-րդ դար: Եկեղեցական գրականություն, եկեղեցա-քողովալական բովանդակությամբ, եկեղեցական ձևով և տեսակետներով»:² Ոչ «Եկեղեցա-քաղաքական» արտահայտությունը կա այս ձևակերպման մեջ, ոչ էլ «մաքառման գրականություն» արտահայտությունը, ամբողջը եկեղեցական է — գրականություն, բովանդակություն, ձև, տեսակ:

¹ Անդ, էջ 354:

² «Տեղեկագիր», 1941, № 5—6, էջ 86:

Պարզ է միանգամայն, որ վերոհիշյալ կոնցեղցիան հինգեր գրականության ըստ էռթյան մաքառման գրականություն լինելու մասին ձևավորվել է Արեդյանի գիտակցության մեջ այդ գրականության պատմությունը, այսինքն՝ իր «Պատմության» առաջին հատորը գրելու ընթացքում, այն է՝ 1941—42 թվականներին:

Մաքառման տեսության այս ուշ ձևավորումով պիտի բացատրել ըստ երեսութին, Արեդյանի որոշ հակասությունները որ նկատվում են 5—10-րդ դարերի հայ կյանքի մի քանի քառական՝ կուլտուրական երեսությներին նրա կողմից արված գնահատականների ասպարիզում:

Ճիշտ կերպով նշելով, օրերի գյուտի հսկայական պետական նշանակությունը, իրեն ինքնուրույնությունը կորցրած հայ ժողովրդին քաղաքականապես զոդող մի հանգամանքի,¹ Արեդյանը միաժամանակ կուլտուրական այդ խոշորագույն նվաճման քաղաքական նշանակությունը հակված է մեկնաբանել իրը և միայն եկեղեցուն և հոգեորականությանը սպասարկող մի ձեռնարկի²:

Մինչդեռ Ստեփանոս Նազարյանը գեռ 1844 թվականին ասել է հետեւյալը. «որ հայերը, որպիս քրիստոնյա ժողովուրդ, պահապանեցին իրենց ինքնուրույնությունը փոթորկանույղ կյանքի այն պայմաններում, որ սկսած 4-րդ դարից վրդովում էր Փոքր Ասիան և Հայաստանը—զրանով նրանք պարտական են այդ դեպքին», այսինքն զրերի գյուտին:³ Նույն կերպ է արտահայտվել—ինչպես մեղ հայտնի է—թե զրերի գյուտի և թե մի շարք այլ խնդիրների մասին անգամ Զամինյանը:

Մի այլ օրինակ. Արեդյանը, մի կողմից ճիշտ գնահատելով Ավարայրի ճակատամարտը իրեն «պարսից տերության գետ մասսայական կոփիվ, որ սխալ կերպով կոչել են «կրօնական պատերազմ»,⁴ բացահայտելով, այդպիսով, նրա ժողովրդական, լայն քաղաքական նշանակությունը, մյուս կողմից վահան Մամիկոնյանի գլխավորությամբ մղվող պայքարին նեղ կրօնաքաղա-

¹ Արեդյան, Ա. հատոր, էջ 70, 80, 83, 84, 114:

² Անդ, էջ 69, 73, 82, 113:

³ „Բեգլայի վզգլայդ“, էջ 16:

⁴ Արեդյան, Ա. հատոր, էջ 300:

քական իմաստ է տալիս նա, ասելով, որ «Վահանյանների մաքառումը մղվում էր եկեղեցագեղական շահերի համար...»:¹

11

Մանուկ Արեգյանի հայ հին գրականության պատմության պերիոդիցիայի երրորդ շրջանը հայկական ինքնուրույն վերածնությունն է, կրօնական-միստիկական գաղափարակոսության մերժման ու գրականության աշխարհականացման դարերը:

Հայկական վերածնության հայտաբերման առաջնությունը անվիճելիորեն պատկանում է Մանուկ Արեգյանին: Այդ մասին 1941 թվականի նրա զբաձը «Տեղեկագրում» ոչ այլ ինչ է, եթե ոչ քաղվածքներ 1923 թվականին ձեռագրի իրավունքով հրատարակված «Համառոտություն հայ ժողովրդական վեսլի և հին գրականության» գործից: Իսկ մինչ այդ, 1917 թվականին, թիֆիսում հրատարակվել է նրա՝ «Հայ հին բանաթվականին», թիֆիսում հրատարակվել է նրա՝ «Հայ հին բանաստեղծությունը» վերնագիր կրող գիրքը, ուր հենց առաջին անգամ Արեգյանը խոսել է հայկական վերածնության մասին: Ավելացնենք, որ գեռ 1899—1900-ական թ. թ. Գևորգյան ձեմարտում կարդացած դասախոսությունների գրառումների մեջ կարելի է դիտել Արեգյանի հայկական վերածնության տեսության սաղմերը:

Հայկանան վերածնությունը, ըստ Արեգյանի, «արգասիք է ներքին ուժերի վրա հիմնված անընդհատ զարգացման»:² Նա սկզբնավորվում է քաղաքների, քաղաքային կյանքի ու քաղաքացիության աճման հետևանքով ու ծայր առնելով 11-րդ դարի սկզբին շարունակվում է մինչև 18-րդ դարի սկիզբը, մինչև Նաղաշ Հովհաննը:

Վերածնության առաջին, այն է 11-րդ դարը, այսինքն Գրիգոր Մագիստրոսի, Արիստակես Լաստիվերացու ու Հովհաննես Սարկավագի ժամանակաշրջանը Արեգյանը հակված է կոչելու վաղ վերածնության շարը:³ 12-րդ ու 13-րդ դարերը 14-րդ դարի սկզբի հետ միասին, ուրեմն՝ սկսած Ներսես Շնորհալուց ու

¹ Անդ, էջ 334:

² Մ. Արեգյան, Բ. հատոր, էջ 3:

³ Անդ, էջ 15:

վերջացրած Խաչատուր Կեչառեցվով, նա կոչում է «աշխարհիկ ոգու վերաճման» դարաշրջանու¹ Երկու այդ դարաշրջանները միւսին ընթացքած նա անվանում ե—թեև չի վերնազրում—հայկական վերաճմանության առաջին էտապ:²

Պիտի կատարելագործե՞ր, արդյոք, Մանուկ Արեղյանը վերաճմանության գրականության էտապների այդ բաժանումը, թե թողներ այն սույն ոչ լրիվ մշակված վիճակում—հայտնի չէ մեզ: Ենելով նրա «Պատմության» մշակման փորձից՝ մենք հավանական ենք համարում երկրորդը:

Սակայն, անկախ վերաճմանության գրականության էտապների ճշգրտումից՝ այդ գրականությունը Մանուկ Արեղյանի համար մեծագույն մի շարժում է, առաջխաղացում, կրոնական աշխարհայցությունից ազատագրման, կյանքի ու մտածողության աշխարհականացման անընդհատ մի խորացում ու ծավալում, գրպացում դարից դար, հեղինակից հեղինակի:

Ընդամենը կես դարի տարբերություն կա Գրիգոր Նարեկացու ու Արիստակես Լասարիվերտցու միջև, առաջինը վախճանվել է 11-րդ դարի սկզբին, երկրորդը ապրել է նույն դարի միջին տասնամյակներում, բայց որքան զանազանվում են երկու այդ ողբերգութակները իրարուց՝ իրենց աշխարհայցքով, հոգեբանությամբ, վերաբերմունքով դեպի իրականությունը:

Լաստիվերտցին, ասում է Արեղյանը՝ ի նկատի ունենալով Հայաստանի ավերածությունները սելջուկյան արշավանքների օրոք 11-րդ դարի կեսերին, «ամեն թշվառություն համարույ է աստվածային պատիժ մեղքի համար... Այդպիս խոսում է նա իրեւ մեկնաբան և բարոյախոս վարդապետ, մեղք և ապաշխարեւ մեղքը լալ փրկության համար: Կարծես դա հին բանաստեղծության, ասլաշխարության շարականների և Գրիգոր Նարեկացու ողբերգության իշխող գաղափարն է: Բայց այդ ըստ երեսոյն միայն նույնն է: Մեղք և ապաշխարեւ նմանությունը միայն այսքան է. զրտնից զենն արդեն դալիս է նոր ոգին: Մինչև հիմա մեղավորն էր անհատ մարդը, նա լալիս էր իր սեփական անձնական մեղքը... Հիմա մեղավոր է ազգը, նա ողիսք է ապաշխարի: Անհատն ապաշխարում էր մարմինը տանջելով.

1 Անդ. էջ 73:

2 Անդ. էջ 346:

զրանով նա ձգտում էր գտնելու իր հոգու փրկությունը, որ մահից հետո հանդերձյալ կյանքումն էր լինելու աստծու հետ միացումով։ Իսկ Արխատակես Լաստիվերտցու համար այդպիսի բան չկա. Նա հեռու է միստիցիզմից։ Այստեղ ապաշխարությունը քառողվում է տանջանքից ազատվելու և ազգի փրկության համար, որ այս աշխարհում պիտի լինի, այն էլ ոչ թե մարմինը մեռցնելով, այլ բարքերի մաքրությամբ, կյանքի բարոյական կարգավորությամբ։¹

Ապա, ավելի խորացնելով ապաշխարության հասկացողությունը ըստ Լաստիվերտցու, ընդգծելով, որ աշխարհն իր գեղեցկություններով արգեն մեծ արգեք է ստացել «սպավոր այդպատմիչի» աչքում, Արեգյանը ավարտում է զուգահեռ իր բնութագրումը հետեւյալ խոսքերով։ Լաստիվերտցին «Հայաստանի շեն և ուրախ կյանքի, շինանիստ ավանների ու բարդավաճ քաղաքների երգիչն է, միայն ոչ ցնծությամբ ու բերկրանքով, այլ դառն վշտով ու հառաջանքով։ Ոչ թե ուրախության երգ հորինելով, այլ ողբերգություն։ Բայց նա ոչ թե աշխարհի ու կյանքի ունայնությունն ու ոչնչությունն է երգում, ինչպես Գրիգոր Նարեկացին իր ողբերգության մեջ, այլ աշխարհի, հայոց գեղեցիկ ու շեն աշխարհի ոչնչացումը։ Ունայնության զաղափարի նշույլ անդամ չի երևում նրա մեջ... Նա սիրում է իրական կյանքը. միայն նա ցավում ու լալիս է, չի ուզում, որ այդպիս ավեր լիներ... Այս նրա վշտի ու հեծեծանքի ազբյուրը — աշխարհասիրություն ու հայրենասիրություն։²

Եթե 11-րդ դարից անցնենք 12-րդ դարին ու այս անդամ համեմատենք Գրիգոր Նարեկացուն արդեն ներսես Շնորհալու հետ — տարբերությունը ավելի նկատելի կլինի:

«Գրիգոր Նարեկացու օրով, ասում է Արեգյանը, կրոնավորությունն ու ճգնավորությունը չափազանցության էր հասած թե ներքուստ մարդկանց բուրբոքված երեակայությամբ և թե արտաքուստ իր արտահայտության սուր ու բիրտ, ճշուն ձեռքով — մերկ ու բոկոտն մնալ, ...մեղադրել ինքն իրեն, սաստիկ ապաշխարել, լաւ արտասվել և նույնիսկ ինքն իրեն ծեծել և այլն, Նրանց հարկավոր էր իրենց հոգեկան պղտոր վիճակի հա-

¹ Արեգյան, Բ. հատոր, էջ 36—37.

² Արեգյան, Բ. հատոր, էջ 39.

մապատասխան զգայացունց ապաշխարական արտահայտությունները ու բուռն խոսք, ձեի չափազանցում... Թեթև, մեղմը, հանգարտը, միակերպը նրանց հաճելի չէին լինիլ և չէին էլ աղդիլ ու բավարարիլ քանի որ կյանքի մեջ կրում էին նույնը ծանրաթախիծ փոթորկահույզ կերպով։ Արդ՝ ինչպես կրօնավորությունն էր, նույնպես և նրա պահանջած և նրա արտահայտիչ բանաստեղծությունը, ոչ միայն բովանդակությամբ, այլև ուժեղ գույներով ու բազմադիմի խուռն ճնշող ձևերով, մեկը մյուսից ուժեղ պատկերներով, հորդանեղ ոճով։

Սա Գրիգոր Նարեկացու մասին։ «Այդպես չէր կարող լինել Շնորհալու ժամանակ, — շարունակում է Արեգյանը, — երբ կրօնավորությունը, այսպիս ասած, աշխարհիկ էր դարձած, և լոկ ձև էր մեծ մասամբ։ Կային, հարկավ, նաև զեր մեծ ջերմեռանդները բայց ապաշխարության հորդ եռանդը պակասած էր, կրօնավորության բարձրացած, հորձանահոս հեղեղը նստած էր, պղտորությունը պարզված։ Թափը թուլացած։ Զկար այլևս ըորբոքվածուղիների երկնաթռիչ միատիցիզմը, արտաքին ցուցադրությունը։ Զկար կրօնական հարբածություն իր արտաքին ծանր ու կեղեքիչ ձևերով։ Բավական էր միայն, որ բարեպաշտը, իր մեջ ամփոփված, ջերմ հավատով դիմել ասածուն։ Այս տիպի կրօնավորների լավագույն ներկայացուցիչն է եղել ինքը Շնորհալին։ ոչ միայն իր ապրած համեստ միակերպ կյանքով, այլև իր Ողբերդության թե՛ բովանդակությամբ և թե՛ ոճով, որ համապատասխան է իր և իրա նմանների ներքինին։ Առեն ինչ չափավոր, մեղմ, փափուկ, հանգիստ, և ոտանավորն էլ միակերպ, բայց սահուն ու սիրուն»։¹

Ինչպես տեսնում ենք, Մանուկ Արեգյանի կուռ մտածողությունը զուգակցվում է երեսությների խորաթափանց ըմբռնման ու նուրբ ճաշակի հետ։ Այդ բանի մեջ մենք պիտի համոզվեինք դեռ Խորենացու ու Եղիշեի փայլուն բնութագրումների հիման վրա։ Արեգյանի բնութագրումները հյութեղ են ու դիմամիկ, մի զարմանալի նըռությամբ նա կարողանում է գտնել գեղարվիստական ավյալ երկի յուրահատկությունները, բնորոշիլ տվյալ

1 Աբեղյան, Բ. հատուր, էջ 100—101.

զործից ստացված տպավորության երանգը՝ Երևույթների սպեցիֆիկումը դանելու մեծ վարպետ էր Մանուկ Աբեղյանը:

12-րդ դարից անցնենք 13-րդ դարին: «Որքան տարբերություն մեր այս երկու հին մեծ բանաստեղծների ոճի մեջ,— ասում է Աբեղյանը, ի նկատի ունենալով մի կողմից նորից Գրիգոր Նարեկացուն, մյուս կողմից Ֆրիկին, — մեկը վսեմ ու ճոխձեռվ, մյուսը պարզ ու հասարակ, բայց ոչ պակաս գրավիչ: Խոդիրը սակայն այդ չեւ Նրանք երկուն էլ դատ են սկսում աստծու հետո... Եվ որքան տարբերություն այս երկուսի շղատի» եղանակի, նյութի և նպատակի մեջ: Մեկն ազերսախառն խոնարհությամբ է զիմում «ահավոր դատաստան» անող «հղորին», մյուսը զժգոնությամբ ու համարձակ հարցավնդում է ուղղում նույն «ահեղ, ահավոր» «ամենազորին» իր արած դատաստանի համար: Մեկի դատի «խոսքն ընդ աստուծոյ» վերաբերում է իր և իրեն նման կրօնավորների անձնական հոգեսոր, այսինքն կրօնական կյանքին և իր «կորած հոգու» փրկությանը, որ լինելու է անգենի աշխարհում..., իսկ մյուսի «գատ ու վեճի բանի» նյութն է ընդհանրության, ժողովրդի իրական դժբախտ կյանքն այս աշխարհում և նրա մարմնավոր փրկությունը տառապանքից... Եվ այսպես մեր բանաստեղծությունն երկնքից իջնելով աշխարհականացել է արդեն և դարձյալ կապվել իրական աշխարհիկ կյանքի, երկրի հետ»:¹

Թեակոլիսենք 14-րդ դարը: Հայկական միջնադարը կրոնական երեք խոշոր գիրք է տվել — ասում է Աբեղյանը: — Պա Նարեկացու «Ողբերգութիւնն» է, ապա Ներսիս Շնորհալու «Յիսուս որդին», վերջապես, Առաքել Սյունեցու «Աղամ գիրքը»:

«Աղամ-գիրքը» — մեկը երրորդ բանաստեղծական մեծ երկնէ, ասում է Աբեղյանը, որ ունի իր բազմաթիվ առանձին գեղեցկությունները: Առաջին երկուաը՝ Գրիգոր Նարեկացու Ողբերգությունը և ներսիս Շնորհալու Ողբերգությունը («Յիսուս որդի») քնարերգություններ են, իսկ Առաքելի գործը մի առարկայական բանաստեղծությունն է: Այդ էլ ժամանակի պահանջը: Կրօնական ոգին չեր մեռած, բայց ստուծ էր մարդկանց հարկավոր էին կրօնական բանաստեղծական գրվածքներ, ոչ թե նրանց

¹ Աբեղյան, Բ. հատոր, էջ 274—275.

զիքա աղոթելու և իրենց մեղքերն ողբալու համար, այլ գվար-
ճությամբ կարդալու և սովորելու»:¹

Մենք վերև ասացինք, որ Մանուկ Արեղյանը երանգ և
առանձնատկություններ հայտաբերելու մեծ վարպետ էր. Մեջ
բերված հատվածը նորից ապացուցում է այդ—թե ինչպես Արե-
գյանը կարողանում էր ամուր կապերով կապել իրականության
հետ գեղարվեստական երկը՝ իր ոճական ամբողջ ինքնատիպու-
թյամբ, իր մեջ զբոշմված զարգացման գինամիկայով նախորդից
դեպի հաջորդը:

Առաջ անցնենք, 15-րդ դարը, Քննարկելով Մկրտիչ Նաղա-
շի «Աղք վասն մեռելի» հոչակավոր բանաստեղծությունը, Արե-
դյանն ասում է. «Եյս մահը և Նարեկացու մահը արդեն որքան
տարբեր են. վերջինս ամենեին չի հուղվում և չի ցավում, թե
կյանքից զրկվելու է, այլ միմիայն իր հոգու վրկության համար
է հոգում, մեռնելիս անգամ միմիայն ապաշխարելու և աղոթե-
լու վրա մտածելով. իսկ այստեղ էականն է այս դառն ցավը աշ-
խարհը թողնելու համար. հոգու փրկությունն արդեն ձեական է
գարձել»:²

16-րդ դարը նշանավորվում է աշխարհականացման առավել
խորացումով. Նահապետ Քուչակը—ասում է Արեղյանը դեռ իր՝
Գեորգյան ճեմարանում կարդացած դասախոսությունների սեա-
դրության մեջ—«Ճեր երկրագոր սիրո երգի մեծ վարպետն է,
ինչպես Նարեկացին՝ երկնավոր սիրո... Նարեկացու սերը զղջան
և անձնագարշանքի, աշխարհի ոչնչացման բուռն առգործումն էր
միստիկական մղամավանջից, մասյլ անձկությամբ, մինչ Քու-
չակը կապված է երկրին, զվարթ ու լուսավոր, հեշտալից ու
բուրավետ երկրին. զրա համար մինչ Նարեկացու հեծկլացող
թառանչների հետ մենք զալարում ու սարսում ենք, մեզ վրա
զգալով միջնադարյան ճգնավորի տվյալանքները մութ խու-
ցում, այստեղ մենք միայն գյուրանում ենք քնքուշ ու հաճելի
երազանքներով»:³

Սակայն, վերածնությունը, զորեղ թափ առնելով 11-րդ դա-
րի սկզբին, իր զարգացման գագաթնակետին է հասնում միայն

¹ Արելյան, Բ. հատոր, էջ 387:

² Անդ, էջ 399—400:

³ Անդ, էջ 421.

17-րդ դարի վերջին, հանձին Նաղաշ Հովսաթանի ստեղծագործությունն. «Եվ այսպիս, ասում ե Արեգյանը, հայ քնարերգությունը վերջապես հասնում է իր սկզբնական հեթանոսական դվարթ ու լուսավոր աղբյուրին. բայց միայն քրիստոնեական հոգով անցած լինելով՝ ավելի աղնվացած է, տարփալից վայրկյաններում նույնիսկ՝ պարկեցած ու զգաստ է... Այս պատճառով և Հովսաթանի սիրո և ուրախության տաղիրը, մի տեսակ խառնուրդ լինելով հեթանոսականի և քրիստոնեականի, մեր հին բանաստեղծության ամենից զգարթ և պայծառ երգերն են, որոնց մեջ կյանքի հրճվանքն արտահայտվում է նուրբ, միանգամայն և զորեղ կերպով...»¹

Այդպիսով, շրջանը ըոլորվում է, այն, ինչ լոկ նշմարվում էր Գրիգոր Նարեկացու մոտ, իր գարգացման տրամարանական վերջակետին է հասնում Նաղաշ Հովսաթանի ստեղծագործության միջ: Միայն թե Հովսաթանի «Երգը—ասում է Արեգյանը— ակտք է երեան գար ոչ թե 17-րդ դարի վերջերում, այլ 15—16-րդ դարերում»² Վերածնության ողութացահայտումը գտնվազում էր այն սոսկալի ավերածությունների հետևանքով, որոնց ենթակա էր Հայաստանը սկսած գեռ 14-րդ դարից, և նկթեմութիւ արշավանքից:

12

Դիտելի է, որ վերածնության կարևորագույն ներկայացուցիչներին բնութագրելիս Արեգյանը հաճախակի ենում է Գրիգոր Նարեկացուց (հաճախակի, բայց ոչ բացառապիս, որովհետեւ միջնադարյան գրականության այնպիսի հսկաները, ինչպիսիք են Վարդան Այգեկցին, Հովհաննես Թլկուրանցին, Գրիգոր Աղթամարցին և ուրիշները, որոնց վրա ազատախոհ դարը գըել է իր վառ կնիքը, բնորոշվում են անկախ Նարեկացուց): Դա բնական պիտի համարել այն հեղինակի նկատմամբ, որի հանճարեղ անձնագործության մեջ դրոշմվել է Արեգյանի հիմնական թեղերից մեկը «Հայոց հին գրականության պատմության» մեջ. «բանաստեղծությունը—ասում է նա—հետևելով իրական կյանքին»

1 «Տեղեկագիր», 1941, № 5—6, էջ 105—106:

2 Արեգյան, Բ.-Հատուր, էջ 436:

պիտի անհրաժեշտորեն շուռ գար իր հակադրությանը—գրականության աշխարհականացմանը¹

Գրիգոր Նարեկացին, ճիշտ է, քննարկվում է «Մաքառման» հատորում, բայց «Վերածնության» հատորի ամեն մի էջում զգացվում է նրա շրւնչը: Խոսելով Արեգյանի իսկ բառերով, կարելի է ասել, որ, իհարկե, Նարեկացին «պատկանում է զեր նախորդ շրջանին», բայց նա, «ինչպես էլ լինի, վերածնության կարապետ է արդեն»:² Գրիգոր Նարեկացին, կարծես, ամենազոր պահակ լինի, որ արթուն հսկում է միջնադարյան պոեզիայի յոթ դարի երկարությամբ տարածված գանձարանի ոսկե գոները:

Դրիգոր Նարեկացուն ելակետ ընդունելը միջնադարյան բանաստեղծներին բնութագրելիս ունի նաև այն իմաստը, որ ավելի ու ավելի հեռանալով վերածնության գրականության սկզբնաշեան կետից, նույն իսկ Նարեկացուց, բայց անընդհատ ետ նայելով ու ի նկատի ունենալով նրան, դրանով ավելի հնարավորություններ են տրվում—որովհետեւ տարբերությունը, քանի գնում, ավելի խորանում է—բացահայտելու յուրաքանչյուր գրողի առանձնահատկությունը: Այդ պատճառով էլ ևստիվերոցի—Շնորհալի—Ֆրիկ—Առաքել Սյունեցի—Նաղաշ—Բուչակ—Հովհաննի փայլուն շարքը վերածնության միասնական ֆորմուլայով ընդգրկվելով, միաժամանակ այդ շարքից ամեն մեկի անհատականությունը առավել ցցուն է բնորոշվում:—Մենք նորից տեսնում ենք առանձնահատկություն ու երանդ բացահայտող մեծ վարպետին:

Բայց, սովորեցնում է մեզ Արեգյանը, առանձնահատկություն և երանդ, առհասարակ անհատականություն բացահայտելիս, շատ զգուշ պիտի լինել: Գեղարվեստական երկի մեկնաբանման ժամանակ, նրա յուրահատկությունները որոնելիս, ըստ Արեգյանի՝ չպետք է ոչինչ ավելացնել ու պակասեցնել նրանից: Կոստանդին Երզնկացին, օրինակի համար, երդում է լույս ու արեգակ, և դա նաև մեր լույսն ու արեգակն է, բայց չմոռանք, որ այդ լույսի և արեգակի հետևում կանգնած է նաև Հիսուսը, որովհետեւ դարերի ընթացքում հենց լույսով ու արեգա-

¹ Աբեղյան, Ա. Հատոր, էջ 569:

² Անդ, էջ 569:

գով են բնութագրել Հիսուսին ու այդ բնութագրումից է առաջացել լույսի և արեգակի քնարերգումը, չմոռանանք, որ Հիսուսի հետեւմ, ավելի խորը ում, կանդնած է Միթրան, որ նույն հատկանիշներով է բնութագրվել, չմոռանանք, վերջապես, որ լուսածագն ու առավոտը, արեգակն ու գարունը կապված են մեռելների հարության հին հավատալիքի հետ:

Ուրեմն, որքան էլ երկրային, մարմնական լինի Երզնկացու լույսն ու արեգակը, այնուեղ, այնուամենայնիվ, կրոնականի միշեցած կա, շորշոփ, որից գեռ շատ ուշ պիտի ազատագրվեր մեր աշխարհիկ քնարերգությունը: Ուրեմն, շտապ եղրակացություններ չանենք, ուղղատես, ուղղամիտ և ուղղագատ լինենք—գիտական բարեխիղն ուսումնասիրության՝ Արեգյանի առաջադրած երեք սկզբունքներն են այդ—հավատարիմ լինենք պատմությանը, իրականությանը, չվերազրենք նրան այն, ինչ հատուկ չէ նրան, մի խոսքով ոչինչ չավելացնենք ու չպակասիցնենք նրանից, լինենք կոնգենիալ:

«Անձահ և անժուռ կերպով հրատարակել են և սովորեցնում են,—ասում է Արեգյանը իրեն հատուկ կրթով,—թե Կոստանդին Երզնկացին այս քերթվածներով իր հանդիսանում է «պանթեստ»: Այդ մարգիկը կամ պանթեիզմ չեն հասկանում, կամ մնամությամբ բարձրացնել են ուղում մեր հին բանաստեղծներին: Այդպիսիների ասելով՝ Ֆրիկի համար աստվածը գոյություն չունի, նա «աթեիստ» է, Կոստանդին Երզնկացին, անգամ Գրիգոր Նարեկացին, «պանթեիստ» են... Առանց դրան էլ մեծ է մեր հին բանաստեղծների փառքը»:²

Հարկավ, հաճախ շատ էր զգուշ իր եղրակացությունների մեջ Մանուկ Արեգյանը—մեր խոսքը, իհարկե, չի վերաբերում ոչ Երզնկացուն, ոչ էլ Ֆրիկին—հաճախ նա իր ուղղագատության մեջ բախնդիր է: Բայց մի բան անժխտելի է: Այդ այն է, որ Մանուկ Արեգյանի համար գեղարվեստական երկը, նրա անհատականությունը թափանցիկ էր միանգամայն. նա պարզ տեսնում էր դարի կնիքը երկի վրա, այն, ինչ պատկանում է տվյալ ժամանակաշրջանին ու արտացոլում այդ ժամանակաշրջանը,

¹ Մ. Արելյան—«Վեշտապներ» կոչված կոթողներն իրեն Աստղիկ Դերկեռու դիցուհու արձանները, Երևան, 1941, էջ 27:

² Արելյան, Բ. հատուր, էջ 318:

միաժամանակ նա պարզ տեսնում էր նաև այն, ինչ տվյալ երկը բերել էր անցյալից և ինչ—թեկուղ սաղմնային վիճակի մեջ—հղում էր նա ապագային, այդ ապագայում առավել ուռնացման պոտենցիան տանելով իր հետ:

Ի՞նչպես մաքառման գրականությունը քննարկելիս Արեգյանը ստիպված էր լինում անընդհատ դուրս գալ գրականության սահմաններից և թեակոխել բանասիրության ու պատմության սահմանները, այդպիս էլ նա վարվում է վերածնության գրականությունը քննարկելիս: Իր այս էքսկուրսներում ևս Արեգյանը շարունակում է լինել բնութագրման, անհատականության եղբերը նրբորեն գծել կարողացող վարպետ: Այս տեսակետից չափազանց հետաքրքիր է հայ քաղաքական մտքի այն էվոլուցիան միջնադարի առաջին հարյուրամյակներում, որ տալիս է Արեգյանը:

Մեզ հայտնի է, որ Դրիգոր Նարեկացու ապաշխարումը խորապես անձնական բնույթ է կրում: Արիստակես Լաստիվերացին էլ հրավիրում է ապաշխարման, բայց այդ ապաշխարման ելակետն արգեն ոչ թե անհատն է, այլ հասարակությունը, ժողովրդի շահը, հայրենասիրությունը: Ռեքեմն, մի քայլ առաջը Լաստիվերացուց հետո բնութագրելով Հովհաննես Սարկավագի հայրենասիրությունը, որը տարագիր ժողովրդին հավաքելու և փրկելու մի տարտամ իղձ էր և աղոթք, մի ողբ, Արեգյանը անցնում է Ներսես Շնորհալու երազին՝ արեմտյան ազգերի ձեռով (խաչակրաց արշավանքների ժամանակներն էին) փրկելու հայժողովուրդը: Շնորհալուց հետո, Արեգյանը, վերջապես, կանգ է առնում Ստեփանոս Օրբելյանի վրա, որի հայրենասիրությունն արգեն միանգումայն ուեալ էր ու կոնկրետ, առաջադիմ, մի քանի քայլ առաջ, որը քարոզում էր վերջ տալ ողբանքին, ինսամառնել սեփական երկրին, ձգտել բնիկ երկրում ունենալու սեփական պետականություն: Հասարակական մտքի զարգացման, այդ զարգացման առանձին օպակների յուրահատուկ գծերի բացահայտումը ակնհայտ է:

Բովանդակությամբ այսչափ հարուստ լինելով ու գարից դար նորանոր հայտնությունների հանգելով, նորանոր թեմաներ նվաճելով, վերածնության գրականությունը չէր կարող նույնպիսի անկանգ զարգացում չունենալ նաև գրական նոր ձե-

վերի ստեղծագործության ասպարիզում։ Զգատելով ձեր խնդիրները բովանդակության խնդիրներից, բխեցնելով առաջին երկրորդից, Արեգյանը մեծ ուշադրություն է դարձնում ձերի այդ ստեղծագործության վրա, սուր աչքով անընդհատ նորություններ գտնում այդ ուղղությամբ ու անմիջապես արձանագրում այն։

Խոհելով Ներսես Շնորհալու «Շարադրութիւն» հոմերական վիպասանութեամբ սակա Հայկակեանցն սեռի և Արշակունեացն զարմից երկի մասին, Արեգյանն ասում է. «Այս գրվածքը բանաստեղծական արվեստի տեսակետից ընդհանրապես մի հետեակրան է. բայց մի գյուտ կա մեջը։ Դա առաջին չափածո պատմական քերթվածն է մեր գրականության մեջ»:¹ Խոսելով միենույն հեղինակի «Ողբ Եգեսիոյ» հայտնի քերթվածի մասին, Արեգյանն ասում է. «Այն գարում ամենամեծ նորությունն էր այդ—բանաստեղծություն հորինել ժամանակակից քաղաքական դեպքերի վրա»:²

Կերպուծելով Մխիթար Գոշի գրական գործունեությունը, Արեգյանն ասում է. «Ամեն անդամ որ մեր հեղինակները մի նոր բան են մացնում գրականության մեջ, սովորված են կամ աւացուցանել, թե թույլատրելի է իրենց արածը, կամ ինդը ել, որ չծաղրեն իրենց»,³ ասկա օրինակ բերում Կորյունին, Ներսես Շնորհալուն և նույնիսկ Մխիթար Գոշին վերջինիս «Դատաստանագիրքը» ու առավել ևս առակները ու նշում, որ «մեծ դժվարությամբ... առակի տեսակը մուտք է գործում եկեղեցական գրականության մեջ»:⁴ Մխիթար Գոշից անցնելով Վարդան Այգեկցուն, Արեգյանն ասում է. «Այսպիսով նա իսկապես ստեղծել է մի նոր ձե, մի «առանձին գրական տեսակ», առակավոր ճառեր, խրատներ։ Դրանով նա իր խոսքը բազմապան է դարձրել և ավելի գրավիչ, հետաքրքիր և ազգու...»⁵

Հետաքրքիր են Արեգյանի գատողությունները «Պատմութիւն» Աղեքսանովի Մակեդոնացւոյ» երկի մասին. «Թաթարների

¹ Անդ, էջ 89։

² Անդ, էջ 102։

³ Անդ, էջ 155։

⁴ Անդ, էջ 156։

⁵ Անդ, էջ 164։

Եշխանության օրով, 13-րդ դարի երկրորդ կեսին, ինչպես տեսանք, կանգ չի առել հայկական քաղաքների բարգավաճումը։ Նրանց բնակիչներն էլ ունեին իրենց գրական պահանջը, Բացի դուսանական երգերից, որոնք զվարձացնում էին փարթամ քաղաքացիներին նրանց ուրախության խնճույքների միջոցին, ծագում է նաև թեթև ընթերցանության գրքերի կարիքը։ Սրբերի վարքերը, «Յայսմաւուրքի» մեջ մտած և ուրիշ վկայաբանություններն այլևս չէին զոհացնում ընթերցաներին։ Հարկավոր էին, այսպիս ասած, զբոսուցիկ կամ զվարձական վեպեր ևս, «ըոնցով նրանք զբաղվեին իրենց պարապ ժամերին»։¹ Այդպիսի զբոսուցիկ վեպ էր «Աղեքսանդրի Մակեդոնացւոյ» պատմությունը։ Մենք տեսնում ենք, թե ինչպիս Արեգյանը, իսկապես, ձեր բխեցնում է իրականության բովանդակությունից։

Ապա Արեգյանը նշում է, որ «առակների հետ միաժամանակ 13-րդ դարի վերջին քառորդից ի վեր, մինչև 17-րդ դարը և հետո, ծաղկում է իմաստական և ուսուցական կամ խրատական բանաստեղծությունը»։² Կոստանդին Երզնկացու մասին խոսելիս արձանագրում է, որ առաջին անգամ հայ զբականության մեջ նա է կիրառում վարդ ու սոխակի սիրավեպը, ինչպիս նաև նա է ռատեղծում մի նոր տեսակի քնարերգություն—անձնական բանաստեղծություն։³ Տաթեացու մասին ասում է, որ նրա «քարոզը» փոխանակել է հին «Ճառին» և «ներբողյանին»,⁴ Առաքել Սյունեցու «Աղամ-գրքի» մասին ասում է, որ մինչդեռ նարեկացու և Շնորհալու ողբերգությունները քնարերգություններ են, առաջինը մի նոր տեսակ է արգեն, այն է «առարկայական բանաստեղծություն»⁵ և այլն, և այլն։

Հայկական վերածնությունը, այդպիսով, ըստ Արեգյանի, բոլվանդակության, թեմատիկայի, ձևական բազմազան եղանակների ու տեսակների շռայլ ու անկանգ մի ստեղծագործություն է, որ դարից դար առավել խորությամբ հայտարարել է մարդու բոկական էռությունը։ Արեգյանի նախորդները համարյա ոչինչ

¹ Անդ., էջ 230—231։

² Անդ., էջ 295։

³ Անդ., էջ 321, 328։

⁴ Անդ., էջ 364։

⁵ Անդ., էջ 387։

Հուներն ներկայացնելու այս կոնցեպցիայի դիմաց. Զամբնյանի մի քանի բառերը «Հումանիզմի» մասին, թերես, վերածնության աղոտ կուհումը հայ տրադիցիոն բանասիրության կողմից սահմանված «արծաթե գար» (12-րդ դարի) հասկացողության մեջ—և ուրիշ ոչինչ:

Բացառությունն է կազմում միայն Վալերի Բրյուսովը:

Սակայն Բրյուսովը էլ, ճիշտ է, ընդհուպ մոտեցավ հայկական վերածնության գաղտփարին, բայց, այնուամենայնիվ, չհասավ նրան: Խոսելով Կոստանդին Երզնկացու «Բան գարնան» բանաստեղծության մասին, Բրյուսովը ասում է. «Տողերի և լեզվի ուժով և ավյունով՝ այս պոեմը պատիվ կրերեր այդ գարու Արևատյան Եվրոպայի աւեն մի գրականության, մինչդեռ Եվրոպան նույնին ոչինչ չունի դրան հակագրելու: Իսկ պոեմը համակող ոգով՝ նա իր բոլոր մասնիկներով պատկանում է վերածնության վեհ շնչին, իրը դա այն ժամանակ հազիվ էր ծագում Արևելութիւ առաջավոր երկրների վրա և անհայտ ուղիներով տարված էր Հայաստանի հեռավոր լեռները»:¹ Այդպիսով, ըստ Բրյուսովի, մի կողմից Եվրոպան «ոչինչ չուներ զրան հակագրելու», մյուս կողմից այն, ինչ դեռ չկար, «անհայտ ուղիներով» արդեն հասել էր Հայաստան...

Ինչ վերաբերում է Բրյուսովի բնութագրութներին, որոնց մեծ արժեքի մասին մենք արդեն խոսել ենք, ապա՝ նախ՝ մենք համոզվեցինք, որ Արեգյանի բնութագրութները ևս—ու մասնավոնք համեմատական բնութագրութները—հսկայական ուժ են պարունակում իրենց մեջ. երկրորդ, որ Արեգյանի բնութագրութներն ընդգրկում են միջնադարի ամրող գրականությունը (ներառայալ և պատմագրությունը), մինչդեռ Բրյուսովը սահմանափակվում է միայն պոեզիայով. և, վերջապես, երրորդ, որ մինչդեռ Բրյուսովի բնութագրութները—շատ փայլուն լինելով—գերազանցողական էսթետիկական բնույթ են կրում, Արեգյանի բնութագրութները սերտ կապված են իրականության հետ, բխում են էպոխայի էությունից ու միավորվում են այդ էպոխան ընդգրկող մեծ ու համայնապարփակ ֆորմուլայով, հայկական վերածնության հասկացողությամբ, որ բացակայում է Բրյուսովի մոտ:

1. Պ. Բրյուսով—«Հայաստանի պոեզիան», «Սովետական գրականություն և արվեստ», 1944, № 10—11, էջ 71.

իր «Ուրվագծեր 19-րդ դարու հայոց գրականության պատմությունից» հմտալից հոդվածաշարում Արեղյանը, խոսելով՝ Գրիգոր Փեշտիմալճյանի մասին՝ ասում է. «Մեր այժմյան պահանջն իհարկե Փեշտիմալճյանը բավարարություն չի տալ. բայց պատմության մեջ ամենայն բան յուր տեղում պիտի առնել և այն ժամանակ հաճախ այժմյան անարժեքը ստանում է արժեք՝ դառնալով մի օղակ դեպի կատարելություն գիմող զարգացման շղթայի մեջ»¹

Այս պարբերության, բայց պատմության մեջ ամենայն բան յուր տեղում պիտի առնելու իմաստալից խոսքի մեջ պիտի որոնել Արեղյանի գրականագիտական կոնցեպցիայի ու գրականագիտական պրակտիկայի ուղն ու ծուծը, առանցքը. Այդ առանցքն է՝ պատմականությունը:²

Նախորդ երկու գլուխներում մենք բազմիցս ասացինք, որ Արեղյանը բնութագրման, երեսույթների առանձնահատկությունների հայտագործման վարպետ է: Դա վերացական մի շնորհք չէ, որ իջել է երկնքից, այլ ուեալ հետեանք այն բանի, որ յուրաքանչյուր երեսույթ Արեղյանը դիտում էր իր տեղում, այսինքն՝ յուրաքանչյուր երեսույթի նա մոտենում էր պատմականորեն:

Ո՞սի ինսղիբներն էլ Արեղյանը ոչ թե վերացականորեն էր զիտում, անկախ շրջապատից, այլ հենց շրջապատի, դարսշրջանի մեջ ու հետեապես՝ նորից պատմականորեն: Նարեկացու կրոնական ստեղծագործությունը կրքոտ էր ու իր արտահայտչական միջոցներով սուր, իսկ Շնորհալու ստեղծագործությունը մեղմ ու չափավոր ոչ միայն երկու այդ բանաստեղծների անձնական խառնվածքի հետեանքով, այլ առավելագույն չափով նրանց ստեղծագործությունների բովանդակության տարբերության:

¹ «Արարատ», 1909, էջ 329:

² Ավելորդ չենք գտնում մեջ բերել այստեղ նաև Արեղյանի հետեւյալ խոսքերը. «Մի բանաստեղծի որեէ գրական երկի արժեքը, սակայն, պետք է չափել ոչ միայն գրա գեղարվեստականությամբ և իբրև արտահայտություն իր ժամանակի հոգու, այլև այնու, թե գա որքան և որպիսի գրական-կուլտուրական ազգեցություն է թողել հետազայի վրա» (Արեղյան, Բ. հատուր, էջ 88):

պատճառով, այն պատճառով, որ մեկը քրիստոնեական կրօնականության բուռն զարգացման վերելքի արտահայտիչն էր, մյուսը միենույն պլոտիկաի վայրէջքի, մեկը արտացոլում էր քաղաքային կյանքի աճման առաջին քայլերը, մյուսը՝ այդ միենույն քաղաքային կյանքի ու քաղաքացիության աճման ավելի փարթամ փուլը: Ու, օգտագործելով Արեգյանի խոկ գարձվածքը, կարելի է ասել՝ ինչպես դարաշրջանը, այնպես էլ բանաստեղծությունը:

Խոսելով Հովհաննես Սարկավագ Վարդապետի հայտնի «Բանի մաստութեան» (Սարեկ) գործի մասին, Արեգյանն ասում է. «Քերթվածի ամբողջության գեղեցկություններից մեկն էլ այն է, որ բովանդակության առաջխաղացությունը լինում է կրոնական առեջքի վրա, որը սակայն, երկրորդական տեղն է բռնում: Մի կողմից՝ իր դարից տարբեր և անկախ մտածողն է հանդիսանում, մյուս կողմից՝ ամեն ինչ պարուրված է կրոնական պարուտակով, որ բնական է այն ժամանակի համար: Փիլիսոփա մտածողը գտնվում է իր ժամանակաշրջանի մեջ և ոչ նրանից դուրս, և այդ տալիս է նրա երկին իրականության դրոշմ, որով և ավելի գրավիչ է դառնում այն»:¹

Արեգյանի այս խոսքերը նրա այն, մեզ ծանոթ պահանջի արտահայտությունն են, համաձայն որի գեղարվեստական երկը մեկնարանելիս չպետք է ոչինչ ավելացնել ու պակասեցնելնրանից, պահանջ, որը դարձյալ առնչվում է նրա գրականագիտական կոնցեպցիայի պատճականության հետ: Մենք դուրս ենք դալիս զարաշրջանից, երբ, գիտելով մեր ակնոցներով, Նարեկացուն «պանթեիստ» ենք հոչակում, կամ Թրիկին՝ «աթեիստ»: Այդ նույնն է, եթե մենք Հովհաննես Սարկավագի մտքերի հիման վրա բնության ու արվեստի մասին՝ նրա հայացքները հավասարեցնենք Զերնիշեսկու Էսթետիկային... Մտածողը կամ գրողը շատ բան է շահում, երբ նրան «յուր տեղումն ենք առնում», պատճական ռեալ իրազբության մեջ:

Երբ հակապատճական մոտեցումը կիրառվում է գեղարվեստական երկում՝ ստացվում է անձաշակություն: Որքան անձաշակ է, օրինակի համար, Արտեն Բագրատունու փորձը քրիստո-

¹ Ա. Արեգյան, Բ. հատոր, էջ 52:

նեական սրբերին պարուրել հունական միջողոգիական հերոսների հանդերձներով, որի դեմ և բուռն բողոքում է Արեգյանը՝ «Բայց ինչ ավելի անդյուր և անպատճ՝ ասում է նա՝ քանի փրկչի խոնարհ ծնունդը վիպել հեթանոսարար և Քրիստոսին անվանել «վեհազուն ծնունդ անմահին Ոլիմպիան», և կամ «Ծիրաննեփառ» հայր Աստուծուն դնել Ոլիմպոսի կատարին, ինչպես հոմերական Զես, բարձր գահի վրա...»¹

Մեզ հայտնի է, որ Արեգյանի համար միջնադարը գրական նորանոր տեսակների ու ձևերի ստեղծագործության մի դարաշրջան է: Բայց ձևը սոսկ ձեւ, վերացական մի հասկացողություն, մեկուսացված մի երկույթ չէ Արեգյանի մոտ: Ձեր սաեղծագործությունը բխում է բովանդակության հարստացումից, աշխարհիկ ոգու այն ակնհայտ խորացումից միջնադարում, որ իր գրսեռման համար պահանջում էր նորանոր միջոցներ: Ձեզ Արեգյանի մոտ ամբողջովին շաղախված է բովանդակությամբ: Զեական գյուտերը պայմանավորված են դարաշրջանի աճող պահանջներով: Այստեղ ևս մենք տեսնում ենք պատմական մոտեցում:

Պատմական մոտեցում է հայտաբերում Արեգյանը նաև միայլ խնդրում, որ տակավին չէ քննարկվել մեր կողմից:—Հարցն այն է, որ եթե միջնադարը, մի կողմից գրական նոր տեսակների ու ձևերի զարգացման դարաշրջան է, ապա, մյուս կողմից, նաև, ըստ Արեգյանի, ժառանգել է անցյալից ոճական բնու, որ, կորցնելով իր բովանդակության կենսունակությունը, ծանրանում է զեղարվեստական երկի վրա ու դրանով դժվարացնումը իրականության ջինջ վերաբարումը:

Պարզ է միանգամայն, որ միջնադարյան գրականության աշխարհականացման ու նոր տեսք ու ձև ընդունելու պրոցեսի մյուս անհրաժեշտ կողմը պիտի հանդիսանա նրա աստիճանական ազատազրումը ձեական ավելորդ այդ բեռից, նրա ճիգերը թոթափելու այն, ինչ թեև պատմությունն էր բարգել նրա ուսերին, բայց խանգարում էր նրան:

Լաստիվերացու մասին Արեգյանը ասում է հետեյալը՝ «Լաստիվերացին ոեալիստ զբող է այն մաքով, որ նկատի ունի

¹ «Արարտա», 1909, էջ 258—259:

իրական կյանքը: Նա իրական դրության, եղելության ճշգրիտ վերաբռնությունն է անում, լինեն թշվառության օրերը, թե փառավոր անցյալի ցանկալի շինարարությունը, աշխարհի մարդաշատությունը, հարուստ քաղաքներն ու ավանները, նրանց բնակիչների ուրախ, բարելից ու բարեպաշտ կենցաղը: Այդ ամենը նա անդրագարձրել է ոչ թե իրեւ մի ձեւ, մի նմանություն պատկերավոր արտահայտության համար, և ոչ թե այլաբանութեն, այլ նպատակ ունենալով հենց իրականությունը ցուցադրել պատկերացնել ընթերցողի առաջաւ:¹

Մի մեծ հատված բերելով ներսես Շնորհալու «Ողբ Եղեսիոյ» երկից, ուր նկարագրվում են եղիսիա քաղաքի ու նրա շրջակա ավանների բնական գեղեցկությունները, Արեգյանն ասում է. «Նախորդ շրջանում չենք զանում այսպիսի բանաստեղծական նկարագիր, որի մեջ արտաքին բնությունը երգված լիներ ոչ թե պատկերների կամ նմանությունների համար, կամ այլաբանորեն իրեւ սիմբոլիկ պատկեր, այլ անկախ կերպով, բնությունն ինքն իրեւ երդի նյութ: Կա Գրիգոր Նարեկացու «Վարդապառի տաղը», որի մեջ արդեն զգացվում է վերածնության շունչը, թեակետ այդ էլ դարձյալ կրոնական նպատակ ու դիտում ունի...»:²

Ինչպես տեսնում ենք, Լաստիվերացու ու Շնորհալու ստեղծագործությունները, ըստ Արեգյանի, համեմատաբար ազատ են վերև հիշած բերից, իրականությունը չի աղոտանում նրանց առջև կրօնական-այլաբանական քողով: Այլազան ոճերի ընդհարում չի նկատվում նրանց երկերի մեջ: Այլ պատկեր ենք մենք դիտում կոստանդին Երզնկացու մոտ:

Քննարկելով Երզնկացու «Գարուն» տաղը, Արեգյանն ասում է. «Բանաստեղծն այս քերթվածի մեջ գեռ շատ անվատան է շարժվում իր հորինման ժամանակ: Կարծես նա իր առաջին փորձն է անում այսպիսի մի երկ ստեղծելու, ուստի չի խիզախում շատ հեռանալու ընդունված հին ձեւերից, և այնպես է հորինում, որ այլաբանությունը թափանցիկ լինի և անգետներն են հասկանան ըուն կրօնական իմաստը... Բայց չնայելով քեր-

1 Մ. Աբեղյան, Բ. հատոր, էջ 39:

2 Մ. Աբեղյան, Բ. հատոր, էջ 109:

թողի անհամարձակությանը՝ արդեն երկում է նրա ընտիր ճաշակը և մտածությունը յուրահատուկ գեղեցքի ձեռքով, առանձնապես գարնան հրճվալից նկարազրի մեջ, ինչ որ վերաբերում է արդարներին։ Այստեղ պատկերները ոչ թե հարասություն են Ավետարանի, այլ ինքնուրույն գյուղեր են և շատ թարմ ու զվարթ...»¹

Միենույն կոստանդին երզնկացու վարդ ու սոխակի սիրավեպը քննարկելով, Արեղյանն ասում է. «Միբո այս գովկը 13-ըդ դարի վերջերում կամ 14-րդի առաջին քառորդին մեր հին բանաստեղծության մի անմասն, մի փարթամ փթթած ծաղիկն է, որ, թեև այլարանությամբ, բայց այնպես գունագեղ ու գնիտ է հորինված, և այնպես պատշաճ է հարմարեցված իրական կյանքին, որ պարզապես հասկացվում է աշխարհիկ բովանդակությունը։ Զնայելով որ հեղինակը վերնադիրը դրել է՝ «Բանքս վարդի օրինակաւ զՔը իստոս պատմէ», բնականարար շատ դժվար կարելի էր կրոնական այլարանություն համարել այն։ Հեղինակն ինքը թերես սկզբից հենց մի կրոնական այլարանական բանք է ցանկացել հորինել աշխարհիկ սիրու երգի ձեռվ ու մոտիվներով, բայց նրա զբածն իսկապես աշխարհիկ բանք է դուրս եկել»²

Հին ձեմ և նոր բովանդակության ուայքարում երզնկացու ստեղծագործության մեջ՝ գերակշռությունը, այդպիսով, պատկանում է վերջինիս Եթե ճշմարտություն է այն, որ Գրիգոր Նարեկացին կոստանդին երզնկացու ուսուցիչն է, ապա, այնուամենայնիվ, երզնկացու «քերթվածները շատ ավելի մաքուր ու ջինջ են, ուստի և ավելի գեղեցիկ են, քան իր վարպետ Գրիգոր Նարեկացու Ծննդյան և Վարդավառի տաղերն իրենց մթնությամբ ու բառախաղերով»։ Ճիշտ է, այլարանությունը դեռ շարունակում է ազդել երզնկացու մաքի պայծառության վրա, բայց նրա արգեստն արդեն «ավելի զարդացած էն, բանաստեղծը արդեն «խուսափում է այլարանական անհստակությունից»։³

Անցյալից ժառանգած ձեւական բեռի մեջ է մտնում նաև գրաբարը, որի մասին Արեղյանը ասում է հետեւյալը. «Մեր բանաստեղծներն և առհասարակ մատենադիրները թողնում են

1 Մ. Արեղյան, Բ. հատոր, էջ 313;

2 Անդ, էջ 327.

3 Անդ, էջ 311.

անթեսք շինծու ձևերը, անհասկանալի հնարանություններն ու ձոռուս ոնց... Պարզությունն ու բնական մտածողությունն սկսում են իշխել ընդհանրապես: Գրականության մեջ երեսն է գալիս 12-րդ դարում կենդանի խոսակցական լեզուն՝ միջին հայերենը, որ արդեն բավական հեռացած էր հին դրական լեզվից՝ դրաբարեց»:¹

Նորի վերջնական հաղթանակը մենք տեսնում ենք միայն Քուչակ Նահապետի ստեղծագործության մեջ: «Այստեղ առաջին անգամ, առում է Արեգյանը, առակներից հետո, մեր գյուղացու, մասամբ և քաղաքացու մաքուր ձայնն ենք լսում առանց որևէ դիտման կամ այլարանության, ինչպես առակների մեջ»:²

Այդպիսով, ըստ Արեգյանի, Քուչակ Նահապետի ստեղծագործության մեջ է, որ վերացվում է ամեն մի բառախաղ ու խրթնություն, այլարանություն ու նմանություն, հարասություն ու սիմբոլ Իրուկանության արտացոլումը այլևս չի պատորվում որևէ հանգամանքով, որ գուրս է ստեղծագործությունից ու խորթնրան: Վերածնության գրականությունը բեւռնաթափ է լինում անցյալի ժառանգությունից ու ոչինչ այլևս չի աղարտում նշանամիջականությունը:

Արեգյանի խոսքերը Քուչակ Նահապետի մասին վերաբերում են նրա գիտական-բանասիրական դորձունենության այն շրջանին, երբ նա դեռ չէր Ժխտում Քուչակի՝ հայրենների հեղինակ լինելու հանգամանքը: Սակայն, այդ խոսքերը ճշմարիտ են և այն գեպքում, եթե մենք ընդունենք, որ հայրենները սոսկ ժողովրդական ստեղծագործություն են, որովհետեւ, ըստ Արեգյանի, ժողովրդական ստեղծագործությունն է, որ միշտ եղել է իրականության ջինջ արտացոլում, որ միշտ եղել է անկաշկանդ, աղատ ու ինքնարուխ, մի իդեալ, որի անդադրում մերձեցմամբ է իմաստավորվում միջնադարյան գրականությունը:

Արեգյանի խոսքերի մեջ Քուչակ Նահապետի մասին կանակ մի այլ ճշմարտություն: Վերածնության գրականության պատմական խնդիրներից մեկը, ինչպես տեսանք, եղել է այն, որպեսզի կամաց-կամաց նա մաքրի գրական անդաստանը քարցած այն ձևերից, որ նա ստացել է իրեն նախորդող գրակա-

¹ Անդ, էջ 61:

² Անդ, էջ 422:

նության տրագիցիաներից: Բայց վերածնության դրականությունը, իր զարգացման ընթացքում նորանոր ձևեր, նորանոր գրական տեսակներ ստեղծելով, բացարձակ արժեք չէր դարձնում այդ տեսակները ու պատմական ավելի ուշ ժամանակում նա կարող էր ժխտել իր վաղ շրջանի հորինածը, ինչպես հենց այս դեպքում, երբ խրատը կամ առակը 16-րդ դարում արգեն գիտվում է — ճիշտ այլաբանության ողես—որպես խոչընդուռ գեղարվեստական մաքուր արտացոլման: Մենք նորից տեսնում ենք, թե որպիսի նրբությամբ է Արեղյանը և ենարանում ձեր և բովանդակության փոխարարերության խնդիրները: Զեն ու բովանդակությունը շաղախված են իրարով, փոխանցում են միանց: Ավելացնենք, որ անցյալից ժառանգած քարացած ձևերն անգամ սոսկ ձեւ չեն Արեղյանի համար, այլ նաև բովանդակություն, որ արգելակի գեր է կատարել գրականության աշխարհականացման պրոցեսում: Արեղյանի մտածողությունը իսկապես որպեստական է ու գիտելիկաթիկական:

Չեր և բովանդակության խնդիրներին Արեղյանն անդրադառնում է նաև Արսեն Բագրատունու փայլուն բնությունը մեջ, որ անհրաժեշտ ենք համարում մեջ բերել «...Ընդհանուր առամբ Բագրատունու տաղերի մեջ ավելի ճարատասանություն կա քան բանաստեղծություն, ասում է Արեղյանը, ավելի սովորովի է, արվեստ ունի, քան ինքնարուխ ստեղծագործություն և զգացում. ուստի նրա նկարեն ու պերճ ոճը յուր բոլոր սեթենթանքով հանդերձ՝ միակերպ է, ձանձրալի է յուր զիմումներով, պարագոր նվազումներով և այլն: Նա ոչ միայն իշխան է լեզվի, այլև ոտանագորի. միանման հաջողությամբ նրա գրչի տակից դուրս են զալիս կարճ, սրբնթաց տողեր, և գանդաղ, ծանր ու մեծավայելուչ ասացվածներ երկար տողերով: Հիշտալուր հնչյուններն ու վանկերը, երաժշտական շեշտերն ու հանգերը երբեմն հափշտակում են ընթերցողին: Բայց ավաղ, այդ ամենն ապարզյուն են անցնում, որովհետեւ տաղերն արտաքին գեղեցելության հետ չունեն ներքին հարստություն, և մարդ հոգնում, նույնիսկ ուժապառ է լինում, երբ կարդում է մի չնչին միտք անվերջ երկարությամբ զարգացրած, մանավանդ երբ հաճախ այդ չնչին միտքն իս բառերի և խոռքերի հեղիղի մեջ կորչում է: Մարդ պառը է շարունակ, որ մի սնամեջ քերթվածության հետ գործ

ունի. իսկ այդ բավական է ամենայն բանաստեղծություն մեռց-
նելու համար»¹

Այս տողերի մեջ ոչ միայն Արսեն Բագրատունին է, այլև ինքը
Մանուկ Արեգյանը։ Մի կողմից ճարտասանություն, արվեստակա-
նություն, ձանձրալի միակերպություն, մեռած գեղեցկություն ու
սնամեջ քերթողություն, մյուս կողմից իսկական պոեզիայի, ինք-
նարուխ ստեղծագործության, լիարյուն բովանդակության, բարձր-
գաղափարականության ու կենսաթրթիու գեղեցկության պահանջ։
Ամուր կանգնած հողի վրա, ճենվելով իրականության վրա, Արե-
գյանը կարողանում է իր այդ անպարտելի գիրքերից պատմության
գատավճիռը կարդալ այն ամենի վրա, ինչ պապղում է, բայց ներ-
քին արժեք չունի, ինչ արեգակի ճառագայթի սոսկ անկենդան
անդրագարձում լինելով՝ ճառագայթի համարում ունի։ Վենետ-
կեցիները կարող են Բագրատունուն «սովորական» դուրս հան-
ձար մըն» համարել, անվանել նրան «ատտիկեցի և լատին քեր-
թողաց արժանավոր անձն՝ իր լեզվով, մաքով ու սրտով», հա-
մոզված լինելը որ նա «ոչ լոկ ազգային՝ այլ նոր ժամանակաց
ընդհանուր ժատենագրության ասպարիդին մեջ աև իրավամբ և
պատվով նշանավոր տեղ մը կրնա գրավիլ»։ Այս ամենը, վեր-
ջին հաշվով, պատկանում է միենույն պսպղուն, բայց իմաստով
աղքատ Փրազների շարքին։ Իսկ իրականության մեջ, պատմա-
կան զարգացման անաշառ գնահատման տեսակետից Բագրատու-
նին «իրք բանաստեղծ ոչ միայն արժանի չէ այն գովեստին,
որ տալիս են նրան, այլև չի կարող յուր ժամանակի առաջնա-
կարգ հայ բանաստեղծների շարքը դասվել...»²։

Այս է վիճակը բոլոր այն գրողների, որոնք կտրված լի-
նելով իրական կյանքից, պատմությունից ու ժողովրդից՝ կը ե-
նակի են կտրվում նրանցից, երբ իրենց ամբողջ ուշագրությունը
կենտրոնացնում են ձեր վրա, շեշտում, ուժեղացնում, բացար-
ձակ սկզբունք դարձնում այն։ Զեի չափազանցում կար նաև նա-
րեկացու մոտ, բայց այդ չափազանցումը օրինաչափորեն հետե-
վում էր միջնադարյան քերթողի ստեղծագործության մեծ բո-
վանդակությունից։ Մինչդեռ հենց այդ մեծ բովանդակությունը
բացակայում է Բագրատունու մոտ, կապարե ծանրության նախա-

1 «Արթատա», 1909, էջ 269—70։

2 «Արթատա», 1909, էջ 257—58։

դասություններ, բառերի բլուրներ, փայլ որոտ ու գղրդյուն—իսկ արդյունքը սակավարյուն մի միտք։ Միջնադարյան գրականությունը, հարուստ բովանդակություն ունենալով, մի կողմից այդ բովանդակությունից բխող նորանոր ձևեր ստեղծեց, մյուս կողմից վերացրեց անցյալից ժառանգած, բայց իր բովանդակությանը չառընչվող մի շարք ձևեր ու գարձավ մեծագույն պատմական-կուլտուրական արժեք։ Բազրատունու ստեղծագործությունը, արտաքին փայլ ունենալով, զուրկ էր ներքին այդ հարստությունից ու պատմությունը չընդունեց, չճանաչեցնրան։ Ամենուրեք, ըստ Արեգյանի, առաջնությունը պատկանում է բովանդակությանը։

Զախշախյանի մասին խոսելիս, Արեգյանն ասում է, որ բանաստեղծության արմատը օբուն ազգային կյանքն» է, «ամարդութբժուռն սիրտը», «ժողովուրդն ու իրական կյանքը»—որ չունի Զախշախյանը։ Այս միենույնը կարելի է կրկնել նաև Բազրատունու մասին։

Վերադառնալով խրատին ու առակին, որ, ինչպես տեսանք, խոշնդոտ են հանդիսանում իրականության մաքուր արտացոլմանը գեղարվեստական երկրում, գիտենք, «որ նրանք, ըստ Արեգյանի, խանգարում են նաև լիրիկական զեղումների ծավալմանը։ «Հիշված բոլոր նոր տեսակի երկերը—ասում է Արեգյանը Շնորհալու մասին՝ ի նկատի ունենալով հենց խրատն ու առակը—թեպետ ունեն գեղեցիկ հատվածներ, բայց իրենց նյութով արդեն հնարավորություն չեն տվել բանաստեղծին ոչ երեակայության թոհջքներ գործելու և ոչ էլ ներսուզվելու իր հոգու խորքերը և քրքրելու իր զգացումները»¹։

Սակայն, լիրիկական զեղումների ծավալմանը խանգարում են ոչ միայն խրատն ու առակը, այլ առավել ևս քարացած ձևերի այն կույտը, որ մեզ արդեն բավականին ծանոթ է Խոսելով կաստիվերացու ու նորից Շնորհալու մասին, Արեգյանն ասում է. «Մեր հին պատմագրությունների մեջ էլ պակաս չի եղել հայրենասիրական ողբազին զգացման զեղումը։ Բայց այդ ամենն արձակ են և, բացի կաստիվերացու գրածից, ավելի հոետորական, քան մաքուր քնարական-բանաստեղծական։ Ներսես Շնորհալու այս մեծ «Ողբի» («Ողբ Եղեսիոյ»; Խ. Ա.) 1070 երկա-

¹ Մ. Արեգյան, Բ. հատուր, էջ 97.

տող տների մեջ առաջին անգամ լսում ենք մի չափածո և հանդիպող սրտահույզ քնարերգություն»:¹

Կարելի է դիմել որ Արեգյանը մի ինչ որ կապ և առնչություն է տեսնում ուսալիզմէ: (գործածելով այդ բառը պայմանական իմաստով միջնադարյան հայ գրականության նկատմամբ) ու լիրիզմի միջև: Սակայն, անկախ գրանցից, արձանագրենք, որ Արեգյանը «քնարականության էական պայմանը» իրավացիորեն տեսնում է «լուրաթափանց անկեղծության» մեջ:² Որ այդ «իսորաթափանց անկեղծության» արտահայտություններից մեկն էնրակարծիքով լաստիվերտցու երկը. «Եվ նրա գրվածքի կենդանության գլխավոր գաղտնիքն այն է հենց, ասում է Արեգյանը, որ նա ապրած է իր գրածների նյութը, և երբեմնի ուրախ, և հետագայի տխուր իրականությունը, զենց գրանցից էլ բխում է նրա լիրիզմը—քնարականությունը, որ անպակաս է»:³ Որ, վերջառպես, լիրիզմը այնպիսի մի մեծ ուժ է, որ իր առկայության դեպքում կարող է ծածկել գեղարվեստական երկի կարևոր թերությունները, եթե, իհարկե, այդ թերությունները, իսկապես, կան. «Բայ ոճի կամ մանրամասների արտահայտութեան, սակայն,—ասում է Արեգյանը, խոսելով Ստեփանոս Օրբելյանի «Ողբ ի դիմաց կաթողիկէին» երկի մասին,—ըավական աղքատ է, չունի պերճություն. հայ թագավորությունների մասին պատմող կտորների մեջ նույնիսկ պրողայիկ է հնչում: Բայց գրվածքն ընդհանրապես չոր ու ցամաք չէ, ինչպես գուցե թվա ոմանց: Դա ազգում է, որովհետեւ հնչում է մի անկեղծ չերմ զգացմունք, որ կենդանություն է տալիս ամբողջին...»:⁴

Այս գլխում մեր հիմնական խնդիրն էր ցույց տալ Արեգյանի աշխարհայացքի պատմականությունը: Ավելացնենք, որ Արեգյանի աշխարհայացքի այդ պատմականությունը, այն հանգամանքը, որ, ըստ Արեգյանի, «պատմության մեջ ամենայն բան յուր տեղում պիտի առնել», այն, որ երեսույթները նա դիտում է իրրե օղակ դեպի կատարելություն զիմող զարդացման զգթայի մեջ,—այս ամենը մեծ գիտնականի օպտիմիզմի ամուր պատ-

¹ Մ. Արեգյան, Բ. հատոր, էջ 105—106.

² Անդ, էջ 101.

³ Անդ, էջ 40:

⁴ Անդ, էջ 227:

վանդանն է հանդիսանում։ Եթե, իրոք, մենք, չնայած բազմաթիվ պատմական աննպաստ ու խանգարող հանդամանքների (առանձնատվես առատ հայ ժողովրդի համար), այնուամենայնիվ դիմում է մեր տեսողությունը, նախապայմաններ է ստեղծում յուրաքանչյուր երկույթի մեջ մի նոր բան որոնել Եվրիակապես. մենք տեսանք, թե որքան զգայուն է Արեգյանը դեպի նորը, որպիսի խանդով է արձանագրում նա այդ նորը Անապատում անդամ Արեգյանը դիմում է կանաչ մի տերե, կենդանի մի ընձյուղ։ Որքան տաղակալի է 17—18-րդ դարերի գրաբար գրականությունը, բայց և այստեղ Արեգյանը գտնում է վերանորոգության, այսինքն՝ կյանքի զարթոնքի, նորի սննդատու մի երակ Խստահայաց ոեալիստը միաժամանակ անուղղա օպտիմիստ էր։

14

Մանուկ Արեգյանի հայ հին զրականության պատմության պերիոդիցիայի չորրորդ և վերջին շրջանը գրականության նորոգումն է 17—19-րդ դարերում։

Այս շրջանի մասին Արեգյանը ծավալուն արտահայտվել է դեռ 1908 թվականին,¹ հայկական վերածնության իր տեսությունից (1916 թ.) շատ առաջ։ Հետագայում, 1940—44 թթ., զրականության պատմությունը զբելիս, Արեգյանը, ինչպես մեզ հայտնի է, հնարավորություն չի ունեցել անդրագառնալու այդ շրջանին վերաբերող խնդիրներին, թարմացնելու ու վերանայելու այն և քանի որ նախորդ, վերածնության շրջանին վերաբերող խնդիրները հակառակ վիճակի մեջ են գտնվում, այսինքն վերանայված են ու մշակված, այդ իսկ պատճառով երկու այդ քնարավառների բովանդակության և այլ հարցերի վերաբերյալ սահմանումների մեջ հաճախ չի նկատվում ձգորիտ համապատասխանություն։

Արեգյանը չորրորդ շրջանը սկսում է 17-րդ դարից, որ բնորոշվում է հայ կյանքի ու կուլտուրայի ծայրահեղ անկումով, «Պետք էր, — ասում է Արեգյանը, — հայությունը փրկել վերջնական անկումից և վայրենացումից, եվ ահա 17-րդ դարու սակա-

¹ Մ. Արեգյան — «Ռւբագծեր» 19-րդ դարու հայոց գրականության պատմությունից, «Արարտ», 1908, № 10, էջ 890—895.

վաթիվ լավագույն մարդկանց բոլոր ձգտումը կենտրոնանում է այն բանի մեջ, որ կենդանացնեն մեռնող հայ կյանքը»:

Ի՞նչ ուղիներով կարելի էր իրականացնել այդ վերանորոգումը: «Դրա համար երկու ճանապարհ է ներկայանում նրանց, — տում է նա, — վերածնել հին հայ կյանքը, գիրն ու գրականությունը և ապա օդովկել եվրոպական գրականությունից...»

Ի՞նչ հարաբերությունների մեջ էին երկու այդ ուղիները: «Այս երկու ուղղությամբ, — շարունակում է Արեգյանը, — առաջ է ընթանում մեր մտավոր շարժումը Շահարաս Ա..ի օրերից սկսած մինչև 19-րդ դարու վերջը, հարկավ ժամանակի բնական շրջափոխությամբ: Եվրոպացիներից ազգվելը սկզբում շատ թույլ էր..., բայց այդ ազգեցությունը հետզհետե զորանում է և 19-րդ դարու երկրորդ կեսից առաջին տեղն է բռնում. մինչ հնի վերածնությունը հենց սկզբից զորեղ էր և նույն թափով շարունակում է մինչև 19-րդ դարու կեսերը, երբ թողնելով յուր կրոնական բնավորությունը՝ աշխարհականանում է»:¹

Նորոգման շրջանի գրականության բովանդակությունը, — առում է Արեգյանը, — հայրենասիրությունն է ու կրոնասիրությունը: Այդպիսով, ըստ Արեգյանի պիրիոդիզայնի, դուրս է գալիս, որ 17-րդ դարը, մի կողմից, ինչպես մենք արդեն շատ լավ գիտենք, հանձին նաղաշ Հովսաթանի ստեղծագործության՝ գրականության աշխարհականացման գագաթնակետն է, մյուս կողմից, ինչպես հիմա տեսանք, կրոնականության սկիզբն է: Ինչպես համաձայնեցնել երկու այդ հակադիր մոմենտները, ինչպես պատահեց, որ նրանք հանդիպեցին իրար: Գուցե դա պատմականորեն պայմանավորված է:

Այդ, թվում է, իրավացի հարցերին Արեգյանը հնարավորություն չի ունեցել անդրադառնալու: Միայն թե նա իր բաղմիցս հիշատակված հոդվածը հայկական վերածնության մասին ավարտում է ցավակցություն հայունելով, որ որովհետև 17-րդ դարում առաջ է դալիս հնի, կրոնա-եկեղեցականի վերածնություն և նոր գրաբար գրականություն», այդ իսկ պատճառով ողգիրաբարաբար այս հին բանաստեղծությունն (Արեգյանը ինկատի ունի Հովսաթանին ու նրա նախորդներին) իր լեզվով, ձեռով և ոգով չի շարունակվում մինչև 19-րդ դարը...»:

¹ Անդ, էջ 891:

Գրականության նորոգման շրջանի կրօնականությունը, ըստ Արեգյանի, շատ ուժեղ է հղել ժմամանակի ողին էր այդպես կրօնական ջերմեռանդությունը մեծ էր, ուստի և պահանջ էր զգացվում ոչ միայն նոր կրօնական տաղերի ու գանձերի, այլև նոր աղոթքների։ Նույնիսկ ժողովրդական երգիչները՝ որոնց մեջ գլխավոր տեղը բռնում է Սայաթ-Նովան 18-րդ դարու երկրորդ կեսում, կրում են իրենց մեջ ժամանակի այդ ողին։¹

Սայաթ-Նովայի մասին Արեգյանը մինչև իր կյանքի վերջը այս հետաքրքիր տեսակետն էր պաշտպանում։ Իսկ գեռ Գեղորակյան ճեմարանի դասախոսությունների սևագրություններում նա ընդդում էր Սայաթ-Նովայի երկվությունը, նրա գեղերումները երկրի ու երկնքի միջև, ճիշտ այնպես, ինչպես այդ արտահայտված է Հ. Թումանյանի հայտնի քառյակի մեջ։

Ո՞ր աշխարհքում ունիմ շատ բան.
միտք եմ անում՝ է՞ս, թե էն.

Մէջտեղ կանգնած միտք եմ անում,
չեմ իմանում՝ է՞ս, թե էն...

Իր պերիոդիպացիոյի չորրորդ, նորոգման շրջանի մասին խոսելիս, Արեգյանը առանձին ուշազրություն է դարձնում երկու խնդրի վրա։

Առաջինը Մխիթարյանների խնդիրն է Դեռ Ս. Նազարյանը, —ինչպես մենք գիտենք, —այն կարծիքն է հայտնել, որ հին, ուկե զարերից հետո, հայ գրականության երկրորդ ծաղկումը տեղի է ունեցել Մխիթարյանների օրոք, որ հայ ժողովրդի վերածնունդը նոր գարերում սկզբնավորել են Մխիթարյանները, որ ինքը Մխիթար Սեբաստացին մի նոր լուսավորիչէ, երկրորդ Մեսրոպ և այլն։ Նույն կարծիքն են հայտնել Վ. Բրյուսովը և ուրիշները։

Մանուկ Արեգյանը համաձայն չէ այս տեսակետի հետո «Ես կարծում եմ, —ասում է նա, —որ Մխիթարյաններն և ինքը Մխիթար Արքան սկիզբ չեն, այլ ծնունդ և շարունակող են այն մեծ շարժման, որ առաջ է գալիս հայոց եկեղեցու մեջ 17-րդ դարում և տեսում է մինչև 19-րդ դարի կեսերը և այս կողմն ևս։² «Ճնշմեսի լության մեջ—շարունակում է Արեգյանը մի փոքր հետո—

¹ Անդ, էջ 896.

² Անդ, էջ 890։

վերածնությունն առաջ է բերում ոչ թե Մխիթար Աբբան և Մխիթարյանները, այլ Ամբերդցի Սարգիս եպիսկոպոսը (—1620 թ.)... և Տրավիզոնցի Տեր Կիրակոսը (—1621 թ.), որոնք բուն երկրի մեջ հիմնում են Սյունյաց անապատը Տաթևի մոտ։¹

Արեգյանը համառոտ, բայց սպառիչ ցույց է տալիս, թե ինչ դեր են ունեցել այդ ընդհանուր շարժման մեջ էջմիածինը, Նոր Զուղան, Կոստանդնուպոլիսը և Վենետիկը։ Արեգյանը բնավ չի բացասում Մխիթարյանների մեծ դերը, այլ միայն եղակի չի համարում այդ դերը, մեկնաբանում է այն իրբու ընդհանուր երեկույթի մասնավոր մի արտահայտություն, կապում 17—19-րդ դարերում հայ ժողովրդի ընդերքում կատարվող կուլտուրական մեծ պրոցեսի հետ, ըստ որում—ինչպես տեսանք—հատուկ ուշադրության է արժանանում նրա կողմից այն, ինչ կատարվում է բուն երկրում, այսինքն ժողովրդական զանգվածների անմիջական շրջապատի պայմաններում։

«Այսպիսով՝ Մխիթարյանները—եղափակում է իր խոսքը Արեգյանը՝ Մխիթարյանների ծառայությունները նշելուց հետո պատմագրության և բանասիրության, ինչպես նաև գրաբարի գտման ու հարստացման ասպարեզներում—գլուխ են բերում այն, որ երկու հարյուրից ավելի տարիներ առաջ ձեռնարկել էին հայ վարդապետներն արևելքում։ բայց բուն երկրի մեջ մեծամեծ դժվարությունների և քաղաքական գժրախտ պատահարների հետ կապված լինելով՝ գլուխ չեր գալիս այնպես, ինչպես կցանկանային կատարած լինել այդ գործի համար աշխատողները»²

Երկրորդ խնդիրը, որի վրա հատուկ ուշադրություն է դարձնում Արեգյանը—դա 19-րդ դարի գրականության կապն է ոչ միայն 18-րդ, այլև 17-րդ դարի գրականության հետ։ Արեգյանն ասում է, թե ինքն ուզում է շեշտել, որ ինչպես մեր՝ 19-րդ դարու կյանքի ձգտումը, նույնպես և գրաբար գրականությունը ընական շարունակություն է նախորդ երկու դարերի։ Այն, ինչ որ 17-րդ դարն սկսել էր և որ այդ և հաջորդ դարում շատ զանգաղ կերպով և մեծ ընդհատումներով էր առաջ գնացել բուն երկրի մեջ, 19-րդ դարն ստանում է իրեն ժառանգություն և ավելի հաջող հանգամանքների մեջ ավելի արագ է

¹ Անգ, էջ 891.

² Անգ, էջ 895.

առաջ տանում և զարգացնում: Անցած դարու նոր գրաբար գրականության սկիզբն՝ ուրեմն 17-րդ դարու շարժման մեջ պետք է տեսնել և ոչ 18-րդ դարու մեջ: Եվ որովհետև 19-րդ դարու գրաբար գրականությունը կարելի չէ բաժանել աշխարհաբար գրականությունից, քանի որ առաջինն իր գրական խնդիրներն ավանդում է երկրորդին և լինում է ժամանակ, գրաբարից աշխարհաբարին անցման շրջանում, երբ միենույն մարդիկը երկու լեզուն ևս, հինը և նորը, բանեցնում են, — ապա և մեր նոր գրականությունն սկսվում է 17-րդ դարում, և այս վերջին երեք դարերը շարունակություն են միմյանց¹:

Արեղյանը իրավացի է, երբ 19-րդ դարի առաջին կեսի գրաբար գրականության ակունքները 17-րդ դարի մեջ է որոնում, երբ զարգացման մի շղթա է տեսնում այն գրականության մեջ, որ սկսվել է — ինչպես ինքն է ասում մի տեղ — Առաքել Դավթի ժեցիով ու ավարտվել Արսեն Բագրատունիով՝ իր մեջ առնելով Մխիթարյաններին:

Արեղյանը իրավացի չէ, երբ 19-րդ դարի երկրորդ կեսի գրականությունը նա դիտում է իրեւ այդ շղթայի սոսկական շարունակություն: Ինարկե, կարող է պատահել, որ ազգային-քաղաքական մի շարք գաղափարներ, որ հատուկ են, օրինակ, Հովհանն Վանանդեցուն, ակտուալ էին նաև Ալիշանի, Պատկանյանի, Պեշիկթաշլյանի և Արովյանի համար — ինչպես ասում է իր՝ մեզ հայտնի՝ «Ուրուագեր»-ում Արեղյանը²: Կարող է պատահել, որ 19-րդ դարի երկրորդ կեսի մի շարք գործիչների լիզուն հաճախ գրաբարն է, ինչպես, օրինակ, Արովյանի կամ անգամ Նալբանդյանի լեզուն: Սրանք թե անխուսափելի և թե անհրաժեշտ երեսություններ են մի դարաշրջանից մյուսին անցնելու պահին: Բայց զրանց հիման վրա այն եղբակացությանը հանգել, երբ 19-րդ դարի երկրորդ կեսի գրականությունը, այսինքն մեր նոր գրականությունը, նույն որակի է, ինչ որ երկու նախորդ գարերի գրականությունը — դա, ինարկե, ճիշտ չէ: Դա նշանակում է անտեսել սոցիալական այն տեղաշարժերը, որ կատարվել են անցյալ դարի կեսից սկսած: Դա նշանակում է անտեսել Արովյանի հետ կապված լուսավորական շարժումը, որ բոլորովին

¹ Անդ, էջ 893,

² «Արարատ», 1909, № 5—6, էջ 432:

նոր երանգավորում տվեց ոչ միայն գրականությանը, այլև մեր ամբողջ կուլտուրային։ Դա նշանակում է անտեսել Նալբանդյանի հետ կապված ռեզուլտին-դեմոկրատական շարժումը, որ նոր կերպարանք տվեց մեր կյանքին։ Արեղյանը անտեսում է մեր նոր գրականության միանգամայն նոր որակը՝ կապված քաղաքական-դասակարգային հեղաշրջումների հետ—ու, իհարկե, սխալ-վում է։

Այդպիսով, Արեղյանի պերիոդիզացիայի չորրորդ այդ շրջանից մնում է այն, ինչի մասին ասվեց վերև, այսինքն 17—19-րդ դարի առաջին կեսի գրականության միասնությունը իրեւ հայ գրականության զարգացման առանձին մի էտապի։ Իհարկե, այս սահմաններում ևս տարակուսանքներ կարող են լինել—այդ մեզ հայտնի է արդեն։ Սակայն, Արեղյանի մտքի հզորությունը այստեղ ևս զիտելի է, նրա կուռ արգումենտացիան այստեղ ևս առկա է։ Ինքնըստինքյան մենք կարող ենք և պետք է քննադատորեն մոտենանք դեպի այս շրջանին վերաբերյալ կոնցեպցիան ևս։ Բայց մինչև որ նրա փոխարեն մի նոր տեսություն չտանք—այն կպահպանի իր տեղը, ուժը և նշանակությունը։

* * *

Մենք ավարտում ենք մեր ասելիքը Մանուկ Արեղյանի մասին, իրեւ զիտնականի, իրը հայ հին գրականության պատմաբանի։ Մենք տեսանք, թե որպիսի ճշգրտությամբ Արեղյանը սահմանեց հայոց հին գրականության առարկան։ Տիսանք, թե որքան մտածված էր, նոր և օրիգինալ հայոց հին գրականության պատմության նրա պերիոդիզացիան։ Համոզվեցինք, որ Արեղյանը գեղարվեստական բնութագրման խոշորագույն վարպետ է, որը նրան մեծապես օժանդակեց կառուցելու հայ հին գրականության պատմությունը։ Ծանոթագանք մասնակի նրա էսթետիկական հայացքների հետ, որի հիմքն էր սհալիզմը։ Եվ որ ամենակարևորն է, տեսանք, թե որպիսի մեծ բովանդակություն էր զնում հայ հին գրականության պատմության մեջ Մանուկ Արեղյանը։

Հերոիկա—մաքառում—վերածնություն—վերանորոգում—ահա այդ բովանդակությունը չորս բառով։

Իր տեղում մենք տեսանք, որ 5—10-րդ դարերի հայ գրականությունը՝ իրեւ մաքառման գրականություն մեկնաբանելու գաղափարին Արեգյանը հասավ իր կյանքի վերջին միայն; 1940—42թթ. իրավացի է հարց տալ, թե ո՞րն է «մաքառման գրականություն» կոնցեպցիայի բանալին: Պարզ է միանգամայն, որ «վերածնության գրականության» ուղիով Արեգյանը հասավ «մաքառման գրականության» գաղափարին, որովհետեւ, ըստ էության, երկուսի հիմքն էլ նույնն է, այն է՝ աշխարհի ու հայրենիքի սկզբունքը: Այդպիսով, երկրորդ հազարամյակի մեր գրականության առեղծվածը լուծելով 1916թվականին, Արեգյանը 1941—42թվականներին հնարավորություն ունեցավ լուծելու նաև նույն գրականության առաջին հազարամյակի առեղծվածը: Հաջորդը բանալի դարձավ նախորդի լուծման:

Առավել խորանալով, մենք կարող ենք հարց տալ մեղ. ապա ո՞րն է, իր հերթին, վերածնության գրականության հայտաբերման բանալին: Վերածնության գրականության հայտաբերման բանալին մասամբ Արեգյանի 1908—9թ. թ. խոճերն են վերանորոգման գրականության շուրջը՝ ի տարբերություն վերածնության գրականությունից, իսկ հիմնականում — դա ժողովրդական հերոսական բանահյուսությունն է, որի կոթողների ուսումնասիրությանն էր նվիրվել Արեգյանը դեռ անցյալ դարի 80-ական թվականներից և որի շուրջը հետագայում, տամնյակ տարիների ընթացքում — ինչպես մեզ հայտնի է — նա տարել է հսկայական տեսական-աղբյուրագիտական աշխատանք:

Ըստ Արեգյանի, ժողովրդական բանահյուսությունը միշտ էլ գոյություն է ունեցել. Հայկի և Արայի առասպելներին հաջորդել են «Պարսից պատերազմ» և «Տարոնի պատերազմ» ավանդական վեպերը, սրանց — «Սասնա ծոերը», Գողթան երգերը տեղի են տվել գուսանական երգերին: Ժողովուրդն իր երգերում ու վեպերում միշտ էլ մեծարել է հերոսությունն ու հայրենասիրությունը, աշխարհն ու սերը: Վերածնության մեր գրականության իմաստությունը հենց այն բանի մեջ է, որ նա անընդհատ աշխարհականանալով՝ մոտենում է եղել՝ թե ըստ բովանդակության և թե ըստ ձեի՝ ժողովրդական մեր բանահյուսությանը:

Սերը դեպի ժողովուրդը, ժողովրդի ստեղծած բանահյուսությանը:

Թյան իմաստության ըմբռնումը, այդ բանահյուսության առնաշկանությունը, հայրենասիրությունը ու կենսութախությունն հնարավորություն տվեցին Արեղյանին հայտաբերելու մեր միջնադարյան գրականության գերազանցորեն աշխարհիկ բնույթը, որի վրա, իր հերթին, նա կառուցեց մաքառման գրականության իր տեսությունը: Այդպիսով, ըստ Արեղյանի, ամբողջ հայ հին, բանավոր ու գրավոր գրականությունը, իր առավել արժեքավոր հատվածներով, տոգորված է մի սկզբունքով—ժողովրդայնության ակզրունքով: Ժողովրդայնությունն էլ հենց Արեղյանի աշխարհայացքի հիմքն է: Գիտական նրա զգաստությունը, նրա առողջամիտ դատողությունը, նրա՝ լայն իմաստով ըմբռնած՝ ուսալիզմը, մի խոսքով—ասենք Արեղյանի իսկ բառերով—նրա ուղղատեսությունը, ուղղամտությունն ու ուղղադատությունը լրւծվում են այդ ժողովրդայնության մեջ: Նրա մատերիալիստական մոտեցումը գեպի հետազոտելիք առարկան ներգաշնակում է ժողովրդից ժառանգած նրա իմաստությանը:

Մեզ արդեն հայտնի է ընդհանուր գծերով, թե ինչ ներքին կասդոյություն ուներ Մանուկ Արեղյանի և նրա նախորդների, հայ հին գրականության պատմաբանների միջև: Զարբհանալյանից Արեղյանը վերցրել էր առարկան իր ամբողջությամբ ու սպառիչ մանրամասնություններով ընդգրկելու հատկությունը: Գաթըրճյանից ու Պալասանյանից նա ժառանգել էր խոր սեր գեպի հայ ժողովրդական բանահյուսությունը: Միևնույն Գաթըրճյանի ու Զարբհանալյանի էսթետիկական դատողությունների նրբությունը և հարգանքը գեպի լեզվական կուլտուրան անպայման ազգեր էին Արեղյանի վրա: Սակայն, ամենամեծ և խորը կապ կարելի է դիտել Արեղյանի ու Պալասանյանի միջև:

Պալասանյանն է եղել առաջինը, որ հայ ժողովրդի գրականության պատմության մշակման խնդիրները կապել է հայ ժողովրդի քաղաքական պատմության խնդիրների հետ, մի համագամանք, որ հրամայողական պահանջ էր Արեղյանի համար: Սոցալական-դասակարգային մոտեցման սաղմերը գեպի գրական երեսութները առաջին անգամ դիտելի է Պալասանյանի մոտ: բայց հենց այդ մոտեցումը հնարավորություն տվեց Արեղյանին հայտաբերելու հայ գրականության պատմության մի ամբողջ գարագրականը՝ վերածնությունը: Դեռ Ս. Նաղարյանը իր „Օօ-

ՅՐԵՆԻԾ-ՌԵՄ շեշտում էր, որ հայրենի լեզվի, գրականության ու պատմության ուսուցումը ներշնչում է ժողովուրդներին սեփական արժանապատվության զգացում և ինքնաճանաչություն, իսկ Պալասանյանը առաջինն էր, որ ընդգծեց գրականության ազգայնության խնդիրը և ընդհուպ մոտեցավ ժողովրդայնության գաղափարին: Բայց Արեղյանի համար գրականության ազգայնությունը հիմնական թեզ էր արդեն, իսկ ժողովրդայնությունը այն տարերքը, որով համակված էր նրա հայոց հին գրականության պատմության ամբողջ կառուցվածքը:

Ու եթե Պալասանյանի գրականագիտական կոնցեպցիան, իր ժամանակի առաջավոր գիտության արտահայտություն լինելով, արտացոլում է հայ ժողովրդի ազգային ինքնաճանաչության այն էտապը, որին նա հասավ ԵՕ-ական թվականներին, ապա Արեղյանի գրականագիտական կոնցեպցիան ևս, նույնպես իր ժամանակի առաջավոր գիտության, սովորական հայագիտության արտահայտություն լինելով, արտացոլում է հայ ժողովրդի ազգային ինքնաճանաչության առավել բարձր էտապը, սովորական էտապը: Այդպես, մեծ գիտնականին արձագանքում է համեստ վաթունականը, որ առաջին քայլերն էր անում իմաստավորելու հայ ժողովրդի գեղարվեստական խոսքի հարուստ գանձարանը:

Մեզ համար այսօր պարզ է, որ հայ ժողովրդի ազգային ինքնաճանաչության խորացմանը մեծապես օգնել է ոռւսական կուլտուրան: Իր տեղում մենք համոզվեցինք, թե որքան մեծ է այդ տեսակի տիպը Բըյուսովի գերը: Սնկասկած է, որ ոռւս բանաստեղծն ու գրականագետը որոշ չափով նպաստել է նաև Արեղյանի հայացքների խորացմանը: Սակայն Բըյուսովը մեզ հիտաքրքիր է ևս մի այլ կողմից:

Իր գրականության պատմության առաջարանում Արեղյանը այն միտքն է հայտնում, որ ժողովուրդների գրականությունները մեկուսի չեն գարգանում, այլ սերտ փոխհարաբերության մեջ մտնելով իրար հետ և որ հայ գրականությունը, ինարկե, բացառություն չի կազմում այդ տեսակետից: Սակայն չի կարելի ասել, թե իր աշխատության մեջ Արեղյանը առանձին ուշագրություն է զարձնում այդ թեզի վրա ու զարգացնում այն: Արեղյանը բավարարվում է միայն նրանով, որ շոշափում է ազգեցության կամ էլ թարգմանական գրականության խնդիրները:

Այլ պատկեր մենք տեսանք Բըյուսովի մոտ Մենք համող-
վեցինք, որ Բըյուսովը առաջինն է եղել, որ ցույց է տվել հայ
դրականության պատվագոր տեղը ժողովուրդների գրականու-
թյունների մեծ ընտանիքի մեջ: Նա առաջինն է եղել, որ գտել
է հոգևոր այն առնչությունը, որ գոյություն ունի մի շարք հայ
քնարերգուների ու եվրոպացի քնարերգուների միջև—Սայաթ-Նո-
վա ու Վեռլեն, Հովհաննես ու Բոգլեր և այլն: Ճիշտ է, Բըյուսովը
միայն պոեզիան ի նկատի ունի ու նա հակած է ամենը բերել-
հասցնելու գերազանցորեն սիմվոլիզմին, բայց և այնպես առա-
ջինը նա է եղել, որ նշել է այդ ուղիով ընթանալու կարեորու-
թյունը:

Հայ գրականության պատմաբանները, քննադատորները յոււ-
բացնելով Արեգյանի մեծ ժառանգությունը, հետեւելով նրա լա-
վագույն արագիցիաներին՝ գիտական բարեխղճությանը ու ճշգր-
տությանը, այլև ուղղամտությանը, ուղղագատությանը և ուղղա-
խոսությանը, առավել խորացնելով նրա մի շարք ճշմարիտ գրույթ-
ները, ավելի ու ավելի հարստացնելով հայ գրականության ան-
դասանանը նորանոր փաստերով ու հղացումներով, երբեք չպիտի
մոռանան Բըյուսովի մեզ տված ավանդը,—հայ գրականության
մեծությունը դիտել համայն աշխարհի գրականության կոն-
տեքստի մեջ,—որի իրականացումը պահանջում է գրականագիտա-
կան մեծ կուլտուրա ու բանիմացություն:

Մեր խոսքը մենք սկսեցինք Ստեփանոս Նազարյանով՝ Ստե-
փանոս Նազարյանով էլ ավարտենք այն:

1844 թվականին Նազարյանը հրատարակեց իր Հայ գրա-
կանության պատմության առաջին գիրքը, ուր նա գրականու-
թյան պատմությունը հասցնում է մինչև 13-րդ դարը: Ուղիդ
հարյուր տարի հետո, 1944 թվականին, լույս տեսավ Մանուկ
Արեգյանի գրականության պատմության առաջին հատորը, ուր
գրականության պատմությունն ընդգրկում է մինչև 10-րդ դարը:

1846 թվականին, այսինքն երկու տարի անց, Նազարյանը
հրատարակեց իր երկրորդ գիրքը, ուր նա գրականության
պատմությունը 14-րդ դարից սկսած հասցնում է մինչև իր
ժամանակը, 19-րդ դարի կեսերը: Նորից ուղիդ հարյուր տարի
հետո, 1946 թվականին լույս է տեսնում Արեգյանի երկրորդ

(404)

98501 4 0

